

***Fudisa
dikwanyana
tša me***

(Laat my lammers wei)

Kaedi ya go tshegetso katakesema

(Handleiding by die kategismus)

Setswana

KAEDI YA GO TSHEGETSA KATAKESEMA

Mor. MJ. Booyens
"LAAT MY LAMMERS WEI"

e e fetotsweng, ya oketswa ke mor. O. T. Serobatse
Barulaganyi: mor. JJ. Venter le mongwe ka ene H. Mphata

HANDLEIDING BY DIE KATEGISMUS

(SETSWANA)
Ds. MJ. Booyens
"LAAT MY LAMMERS WEI"

Vertaal en bygewerk deur Ds. O.T. Serobatse
Medewerkers: Ds. JJ. Venter en Br. H. Mphata

KAEDI YA GO TSHEGETSA KATAKESEMA

ISBN 0-620-18369-1

KETAPELE

E setse e le sebaka go na le tlhokego ya gore go nne le sengwe se se ka thusang go tthalosa Katakesema ya Heidelberg ka Setswana. Ka itshimololelo ya lokgotlakopano ya dikereke tsa Gereformeerde e leng ya Noordbrug ga mmogo tsa Ikageng le Promosa le ka thuso le tiro tsa mor. O.T. Serobatse, yo o neng a setse a dirisa dikgaolo tse dingwe tsa "Laat my lammers wei", le ka kitso ya ga mor. M.J. Booyens, ga diragala gore go tlangwe kaedi ya go tshegetsa buka e. Fa tiro e ntse e tswelela pele, e ile ya dirwa mo phuthegong ya Ikageng le mo karolong ya Boskop.

Re lebogela Modimo dimpho tsotlhe tse a ileng a di abela batho ba ba neng ba tsaya karolo go dira gore kgatiso e e nne teng. Thatathata re batla go leboga batlhopiwa ba rio ya borongwa le dikwalo tsa teng ba Sinoto kakaretso mo Afrika-Borwa ba ba ileng ba thusa ka letlotlo gore kgatiso e e nne teng. A Modimo a e ba thusa ka letlotlo gore kgatiso e e nne teng. A Modimo a e segofatse mo dikerekeng tsa rona.

Le ka moso.

Mor. J.J. Venter 1993

VOORWOORD

Daar was lank reeds 'n behoefte aan 'n verklaring by die Heidelbergse Kategismus in Setswana. Op inisiatief van die Gekombineerde Kerkraad van die Gereformeerde Kerke Noordbrug, Ikageng en Promosa is daar toe in oorleg met Ds. O.T. Serobatse wat reeds vir eie gebruik dele van "Laat My lammers wei" vertaal het en asook in oorleg met Ds. M.J. Booyens, met 'n projek begin om 'n verklaring saam te stel. Soos wat die projek gegroei het, is die verklaring ook met groot vrug in die Gereformeerde Ikageng en die Boskopwyk gebruik.

Ons dank God vir die gawes wat Hy gegee het en al die persöne wat meegewerk het om hierdie publikasie moontlik te maak. In besonder wil ons die Deputate Sending en Nasorglektuur van die Nasionale Sinode van die Gereformeerde Kerke in Suid-Afrika bedank wat dit finansieel moontlik gemaak het om hierdie publikasie te laat druk.

Mag die Here gee dat dit met groot seën in ons kerke gebruik word.

Ds. J.J. Venter 1993

DITENG

SONTAGA SA BO 1.....	7
SONTAGA SA BO 2.....	8
SONTAGA SA BO 3.....	8
SONTAGA SA BO 4.....	9
SONTAGA SA BO 5.....	10
SONTAGA SA BO 6.....	11
SONTAGA SA BO 7.....	12
SONTAGA SA BO 8.....	14
SONTAGA SA BO 9.....	15
SONTAGA SA BO 10.....	15
SONTAGA SA BO 10(B).....	16
SONTAGA SA BO 11.....	16
SONTAGA SA BO 12.....	17
SONTAGA SA BO 13.....	18
SONTAGA SA BO 14.....	18
SONTAGA SA BO 15.....	19
SONTAGA SA BO 16.....	20
SONTAGA SA BO 17.....	22
SONTAGA SA BO 18.....	22
SONTAGA SA BO 19.....	24
SONTAGA SA BO 20.....	24
SONTAGA SA BO 21.....	25
SONTAGA SA BO 22.....	26
SONTAGA SA BO 23.....	27
SONTAGA SA BO 24.....	28
SONTAGA SA BO 25.....	29
SONTAGA SA BO 26.....	30
SONTAGA SA BO 27.....	32
SONTAGA SA BO 28.....	33
SONTAGA SA BO 29.....	37
SONTAGA SA BO 30.....	37
SONTAGA SA BO 31.....	39
SONTAGA SA BO 32.....	43
SONTAGA SA BO 33.....	43
SONTAGA SA BO 34.....	45
SONTAGA SA BO 35.....	47
SONTAGA SA BO 36.....	48
SONTAGA SA BO 37.....	49
SONTAGA SA BO 38.....	50
SONTAGA SA BO 39.....	50
SONTAGA SA BO 40.....	51
SONTAGA SA BO 41.....	52
SONTAGA SA BO 42.....	53
SONTAGA SA BO 43.....	54
SONTAGA SA BO 44.....	54
SONTAGA SA BO 45.....	56
SONTAGA SA BO 46.....	57
SONTAGA SA BO 47.....	58

SONTAGA SA BO 48.....	59
SONTAGA SA BO 49.....	60
SONTAGA SA BO 50.....	60
SONTAGA SA BO 51.....	61
SONTAGA SA BO 52.....	61

SONTAGA SA BO 1

KGOMOTSO YA ME MO BOTSHELONG LE MO LOSONG

1. Potso: Kgomotso ya gago mo botshelong le mo losong ke eng?

Karabo: Ke gore: Nna, ka mmele le ka moya, mo botshelong le mo losong, ge ke wa me; mme ke wa Mmoloki wa me yo o ikanyegang, e bong Jesu Keresete; yo ka madi a gagwe a a botlhokwa a ntefeletsehg dibe ka botlalo, yo o bileng a nkgolola mo puspung yotlhe ya ga Satane - a mpabalela jaana gore kwa ntle ga thato ya ga Rara yo o kwa legodimong go se ke ga ba ga wa le fa e le thiri epe go tswe tlhogong ya me. Ee, esita le tsotlhe tse di isang tshegofatsong ya me o ne a di dira. Ke ka gone a ntlhomamisetsang ka ga botshelo jo bo sa khutleng ka Moya wa gagwe o o Boitshepo, a ba a ntlhotlheletsa gore ke nne ke mo tshelela.

Buisa: Baroma 14:8; 1 Bakorinthe 6:19; 3:23; Tito 2:14; 1 Petero 1:18-19; 1 Johane 1:7; 2:2; Bahebera 2:14; 1 Johane 3:8; Johane 6:39; 10:28; 2 Bathesalonika 3:3; 1 Petero 1:5; Matheo 10:30; Luka 21:18; Baroma 8:28; 2 Bakorinthe 1:22; 5:5; Baefeso 1:14; Baroma 8:16; 8:14; 1 Johane 3:3.

2. Potso: O tshwanetse go itse dilo di le kae gore o tle o phele le go swa ka kgomotso?

Karabo: **Di le tharo:**

- (a) Santlha ke gore ke tshwanetse go itse bogolo jwa dibe tsa me le jwa bomadimabe jwa me.
- (b) Sa bobedi ke gore ke tshwanetse go itse ka fa nka gololesegang ka teng mo dibeng tsa me le mo bomadimabeng jwa me.
- (c) Sa boraro ke gore ke tshwanetse go itse ka fa nka lebogang Modimo ka ntlha ya kgololesego eo ka gona.

Buisa: Matheo 11:28-30; Baefeso 5:8; Johane 9:41; Matheo 9:12; Baroma 3:10; 1 Johane 1:9, 10; Johane 17:3; Ditiro 4:12; 10:43; Baefeso 5:10; Dipesaleme 50:14; Matheo 5:16; 1 Petero 2:12; Baroma 6:13; 2 Timotheo 2:15.

TLHALOSO (ka dikai)

A. Nna, ka bojotlhe jwa me, mmele, pelo le moya, ke wa ga. Keresete Jesu. Ena ke Monngwame; ke Mmoloki wa me. Nna ke leruo lwa Gagwe; Ena ke motlhokomedi wa me fela jaaka nku e na le modisa, motlhokomedi wa yona, Keresete o a nthata, o a ntlhokomela, o a ntshireletsa, o a ntaola.

Fa ke se na Modimo, ke se na Rara, ke lekgoba la sebe, le tiabolo; ke sesu/moswi ka ntlha ya sebe le ditiro tse di maswe, ga ke na kgomotso, mme ke emetswe ke loso le le sa feleng.

Mrne ka ntlha ya ga Keresete, ke na le kgomotso. Modimo Rara o mphile Keresete, yo o ntshireletsang mo bophelong le mo losong. Keresete o nthekolotse mo sebeng le mo go tiabolo ka madi a gagwe, mme o mphile botshelo jo bo sa feleng.

Buisa: Baroma 14:8; 1 Bakorinthe 6:19; Dipesaleme 73:23, 24.

B. Ka dintlha tse tharo tse, ke tshwanetse go itlhatlhoba gore ke bone fa di le teng mo go nne, ebong dibe tsa me; kgololesegoya me le tebogo ya me. Tsotlha tse, di kgaoganya Katekisima ya rona ka dikarolo tse thara, ebong:

- (1) GO WA GA MOTHO.
- (2) KGOLOLESEGO YA MOTHO (Sontaga sa bo 5-31).
- (3) TEBOGO GO MODIMO (Sontaga sa bo 32-52).

SONTAGA SA BO 2

KA GA BOMADIMABE JWA MOTHO

3. Potso: O ka itse bomadimabe jwa gago ka eng? **Karabo:** Ka molao wa Modimo.

Buisa: Barorna 3:20.

4. Potso: Molao wa Modimo o re batla eng?

Karabo: O re batla se re se rutwang ke Keresete mo mafokong a a mo go Matheo 22:37-40, a a reng: O rate Morena, Modimo wa gago, ka pelo yotlhe le ka moya otlhe le ka tlhalogano yotlhe leya gago. E ke yona taolo e kgolo le ya naha. Mme ya bobedi e tshwana nayo, ya re: Rata mongwe-ka-wena jaaka o ithata. Mo ditaolong tsoo pedi tse go akareditswe molao otlhe le baporofeti.

Buisa: Doiteronomio 6:5; Lefitiko 19:18; Mareko 12:30; Luka 10:27.

5. Potso: A o ka diragatse ditaolo tse tsotlhe ka botlalo?

Karabo: Nyaa, gonne ka mokgwa wa nama ke eletsa bogolo go ila Modimo le wa gaetsho.

Buisa: Baroma 3:10, 20, 23; 1 Johane 1:8, 10; Barome 8:7; Baefeso 2:3; Tito 3:3; Genesi 6:5; Jeremia 17:9; Baroma 7:23.

TLHALOSA (ka dikai)

A. Molao wa Modimo (Lefoko/Beibele) ke seipone sa rona, gore re ipone gore re tlhagelela jang fa pele ga Modimo. Molao ó, ga se seipone sa rona fa pele ga batho, ka gonne batho botlhe ke baetsadibe. Seno se kotsi gore o itumedise batho, mme o le ditshila fa pele ga Modimo.

Buisa: Baroma 3:9-20; sgolo thata temena ya 20.

B. Tshobokanyo ya molao wa Modimo: Tshobokanyo e', re e buisa gape mo go Doiteronomio 6:5 - buisa kgaolo le temana eo! Molao wa Modimo o re batla lerato. Lerato ka metlha le siame. Fa ke rata Modimo, ke gore ke phela ka mo tlotlisong ya Ona. Fa ke rata mongwe-ka-nna, ke gore ke dira ka mo kgatlhegong ya Modimo.

Buisa: 1 Johane 2:3-11, mme o lemoge gore go rata Modimo le motho go tshwaragana jang.

C. Fa o sa rate Modimo le mongwe-ka-wena, go raya gore o ba tlhoile. Maitsholo a a sa siamang go bangwe-ka-wena, ke sebe. Go tswa tlhologong, ga re ka ke ra nna le lerato la nnete, gonne lerato la nnete la rona go bangwe-ka-rona, le tswa go lerato le rona go Modimo. Le mo go bao ba sa dumeleng, go na le lerato leo ba ratanang ka lona, gonne Modimo o bipa tshiamololo ka kutlwelobothoko ya Ona.

Buisa: Baroma 3:20.

SONTAGA SA BO 3

6. Potso: A Modimo o bopile motho ka popego e e bodileng jalo?

Karabo: Nyaa, Modimo o bopile motho sentle, wa mmopa ka fa setshwanong sa Ona tota - ke gore ka tshiamo ya nnete, le boitshepo, gore a tle a itse Modimo Mmopi wa gagwe sentle; a o rate ka pelo yotlhe le go aga nao go ya ka bosakhutleng - go o galaletsa le go a baka.

Buisa: Genesi 1:31; 1:26,27; Baefeso 4:24; Bakolose 3:10, 11; Bakorinthe3:18.

7. Potso: Tshenyego e e mo mothong e tswa kae?

Karabo: E tswa mo go weng le go tlhoka-kutlo ga batlapelle, e bong bo-Atame le Efa

kwa Parateising, kwa go tlhologileng tshenyego ya rona gona, mme ra ithwalelwa ra ba ra tsalelwa mo dibeng.

Buisa: Genesi 3; Baroma 5:12, 18, 19; Dipesaleme 51:7; Genesi 5:3.

8. Potso: A mme re senyegile mo go kalo gore re tlhoka boitekanelo jwa go dira tshiamo ka gope, mme re sekamele bosuleng fela?

Karabo: Ee, fa e se go tsalwa sesa ka Moya wa Modimo.

Buisa: Genesi 8:21; 6:5; Jobe 14:4; 15:14,16,35; Johane 3:6; Jesaya 53:6; Johane 3:3, 5; I Bakorinthe 12:3; 2 Bakorinthe 3:5.

TLHALOSO (ka dikai)

A. Go nna le sebe gwa motho, ga go simologe kwa Modimong. Setshwano sa Modimo mo mothong ke gore motho o bopilwe a siame. Go kaya gore motho o tshwanetse go direla Modimo ka kelello, ka pelo le ka diatla (mmele).

(a) Motho o na le tlhogo gore a itse Modimo.

(b) Motho o na le pelo gore a rate Modimo.

(c) Motho o na le diatla gore a direle Modimo.

B. Tiabolo o raetse Adama le Efa gore ba tlhoke kutlo go Modimo. Seno ga se fela go wela mo sebeng, mme gape ke gotlhoka-kutlo gwa ka bomo. Sebe seno sa ga Adama le Efa, batsadi ba ntlha ba rona, se amana le tlhologo yotlhe ya botho. Rotlhe re tsholwa/tsalwa re le baetsadibe.

Buisa: Dipesaleme 51:7:

C. Jaaka baetsadibe, re mo kotsing e kgolo. Go tswa tsalong, ga go sepe sa tshiamo (se se ntle) seo re ka se dirang. Goo re go dirang fela ke tshiamololo.

Le fa go le jalo, Modimo o na le kutlwelobotlhoko e kgolo. O dira dikgakgamatso, mme o re fa tsalo ya bobedi ka Moya wa Ona.

Buisa: Johane 3:3, 5.

SONTAGA SA BO 4

9. Potso: A Modimo ga o siamololele motho ka go mo lopa mo molaong wa ona go dira se a se kakeng a se kgona?

Karabo: Nyaa, gonne Modimo o bopile motho ka mokgwa o o siameng. Mme motho, ka tsietso ya ga Satane le ka boitphetlho jwa botlhoka-kutlo, o bile a amoga dineo tse dintie tseo - ene le dikokomane tsa gagwe.

Buisa: Baefeso 4:24; Genesi 3:13; 1 Timotheo 2:13, 14; Genesi 3:6; Baroma 5:12.

10. Potso: A Modimo o tla lesa batlhoka-kutlo le bawi ba sa otlhaiwa?

Karabo: Nyaa, ruri nyaa. Mme o tla galefa thata, bogolo jang ka ga dibe tsa tlhologo le tsa jaanong - mme o tla di naya katlholo ya tshiamelo ya ona jaanong le ka bosakhutleng - jaaka o ne wa re: Go hutsegile mongwe le mongwe yo o sa bolokeng dilo tsothe tse kwadilweng mo lokwalong lwa molao go di dira.

Buisa: Genesi 2:17; Baroma 5:12; Dipesaleme 50:21; Nahume 1:2; Eksodu 20:5; 34:7; Baroma 1:18; Baefeso 5:6; Doiteronomio 27:26; Bagalata 3:10.

11. Potso: Mme a jaana Modimo ga o boutlwelobotlhoko?

Karabo: Ee, Modimo o boutlwelobotlhoko, o bile o siame. Ka ntlba eo tshiamo ya ona e bile e dira gore dibe tse di ikepiwang kgatlanong le puso ya Modimo di nne le

kwatlhao e e bokete - moo go rayang gore di bone kwatlhao e e sa khutleng mmeleng le moyeng.

Buisa: Eksodu 34:6; Dipesaleme 7:10; Eksodu 20:5; 23:7; 34:7; Dipesaleme 5:5, 6; Nahume 1:2,3.

TLHALOSO (Ka dikai)

A. Potso eno e bosula, mme le fa go le jalo, Katekisima ga e botse jalo gore re akanye tsa bosula, nyaa!! E re botsa jalo gore e re rute tsa tshiamo. Modimo o batla gore re O rate. Modimo o bopile motho jalo mo setshwanong sa Ona, gore motho a tle a kgone go O rata. Ka jalo motho o tshwanelwa ke kotlo fa a sa dire jalo.

Buisa: Genesi 3:6; Baroma 5:12.

B. (Bangwe) Baetsadibe/Batlhokakutlo ba batla tsela ya go tlhoka go otlhaiwa. Modimo o tshiamo, mme kgalefo ya Ona mo dibeng tsa rona e kgolo, e a tshosa.

Buisa/(Kwalolla): Doiteronomio 27:26.

C. Modimo ga o setlhogo, ga o tshiamololo, go ya jaaka bangwe ba bolela, gore a tlogele batho mo dihelong/mo dibeng. Modimo o kutlwelobotlhoko, ke ka moo baetsadibe ba bolokegang/ba sireletsegang; Modimo o siame/ga o tsietse, ke ka moo baetsadibe ba atlholwanag. Seno re se bona mo go bogeng le mo losong lwa ga Morena Jesu Keresete. (Modimo o lerato/Modimo ke lerato. Ka jalo lerato le bolela gore Modimo ka bo/Ona le tlotlo ya Ona, o tletse lerato, mme rona mo go Keresete re tletse lerato.)

KAROLO YA BOBEDI YA KATIKISIMA

(KGOLOLOSEGÓ YA MOTHO MO SEBENGO)

SONTAGA SA BO 5

12. Potso: E re ka re le mo kwatlhaong jaanong le ka bosakhutleng ka fa katlholong ya tshiamo ya Modimo, a go na le mokgwa o ka ona re ka falolawng kwatlhao e, mme ra bona boitshwarelo?

Karabo: Modimo o batla gore tshiamo ya ona e wediwe, mme moo, re tlamega go ituelela ka rosi kgotsa ra go duelelwa ke mongwe ka botlalo.

Buisa: Genesi 2:17; Eksodu 23:7; Esekiele 18:4; Matheo 5:25; 2 Bathesalonika 1:6; Luka 16:2; Baroma 8:4.

13. Potso: A rona ka rosi re ka o ituelela?

Karabo: Nyaa, legoka. Gonne ka rosi re oketsa tefo ka malatsi otlhe.

Buisa: Jobe 9:2; 15:15, 16; 4:8, 19; Dipesaleme 139:3; Matheo 6:12; 18:25; 16:26.

14. Potso: A go teng felo gongwe kwa goka bonwang sebopiwa sengwe se se ka re duelelang?

Karabo: Nyaa, gonne lantlha,- Modimo ga o batle go otlhaela sebopiwa sepe tefo e e dirilweng ke motho. Mme la bobedi, ga go na sebopiwa se se ka rwalang kgalefo e e sa khutleng ya Modimo.

Buisa: Esekiele 18:4; Genesi 3:17; Nahume 1:6; Dipesaleme 130:3.

15. Potso: Jaanong Motsereganyi le Mogolodi yo re tshwanetseng go mmatla ke yo o ntseng jang?

Karabo: Yoo, ke mongwe yo o leng motho wa nnete yo o siameng, yo o nonofileng go feta dibopiwa tsothe - le Modimo wa nnete.

Buisa: 1 Bakorinthe 15:21; Bahebera 7:26; Jesaya 7:14; 9:5; Jeremia 23:6; Luka 11:22.

TLHALOSO (ka dikai)

A. Modimo o *tshiamo*, mme o batla *tuelo* ya *molato* wa rona. Go ya ka karabo e e fa godimo é, re setse re lemoga *mohau* wa Modimo, fa go twe: "rona ka borona kgotsa mongwe/sengwe" (Kana ke mang yo mongwe yoo a re dueletseng??). Seno re se lemoga jang mo Kgolaganong ya Kgale (O.T.) ka ga molato" le "setlhabelo sa tuelo ya sebe"?

B. Mo botshelong, go na le batho bao ba itshepileng, bao ba ikutlwang go ka ituella dibe tsa bona, jaaka BAFARASAI. Buisa Baroma 2:17-23. O utlwe gore Paulose a reng. Mang le mang yoo a ratang go ituella dibe tsa gagwe, o dira jalo kwa katlholong ya dihele ka go se na bokhutlo.

C. Modimo ga o batle gore sebopiwa sengwe se re duelle dibe, ka gonne moo go tla bo go se na *bonnete/tshiamo*. Sebopiwa sengwe ga se ka ke sa kgona go re duella, ka gonne se le bokowa, bokowa go ka sikara *tshabego ya kgalefo ya Modimo*. Fa Modimo o galefile, ga go ope yo a ka emang fa pele ga Ona.

Potso ke e: Goreng fa madi a ditlhabelo a ne a sa tlhole a duelesega?

D. Moemedi e tshwanetse go *nna motho; éé . . . go nna motho wa mannete*, gonne e le ena motho a leofileng. *Moemedi yo a be motho ya siameng*, gape a be le Modimo wa boammaruri.

SONTAGA SA BO 6

TLHALOSO KA GA MOEMEDI

16. Potso: Go tla jang gore a nne motho wa nnete yo o siameng?

Karabo: Ke ka gonne tshiamo ya Modimo e batia gore popego ya motho e e sentsweng e nne yona e e mo rekololang, mo dibeng. Le gona motho, yo e leng moleofi ka esi, a se ka ke a rekolola ba bangwe.

Buisa: Esekiele 18:4, 10; Baroma 5:18, 1 Bakorinthe 15:21; Bahebera 2:14-16; 7:26, 27; Dipesaleme 49:8; Petoro 3:18.

17. Potso: Go tla jang gore a bo a nne Modimo?

Karabo: Gore ka nonofo ya bo/Modimo jwa gagwe a tle a kgone go rwala tshakgalo ya bogale jwa Modimo mo bothong jwa gagwe le go tla a re gapela tshiamo le botshelo mme a di re busetsa

Buisa: Jesaya 9:5; 63:3; Doiteronomio 4:24; Nahume 1:6; Dipesaleme 130:3; Jesaya 53:4, 53:5, 11.

18. Potso: Motsereganyi yo, yo e leng Modimo wa nnete le motho wa nnete, ke mang?

Karabo: Ke Morena wa rona Jesu Keresete, yo re mo abétsweng ke Modimo go nna botlhale, tshiamo, kgalaletso le kgololo ya rona.

Buisa: 1 Johane 5:20; Baroma 9:5; 8:3; Bagalata 4:4; Jesaya 9:6; Jeremia 23:6; Maleagi 3:1; Luka 1:42; 2:6,7; Baroma 1:3; 9:5; Bafilipi 2:7; Bahebera 2:14, 16, 17; 4:15; Jesaya 53:9, 11; Jeremia 23:5; Luka 1:35; Johane 8:46; Bahebera 4:15; 7:26; 1 Petoro 1:19; 2:22; 3:18; 1 Timotheo 2:5; Mateho 1:23; 1 Timotheo 3:16; Luka 2:11; Bahebera 2:9; 1 Bakorinthe 1:30.

19. Potso: O ka itse boammaaruri jo ka eng?

Karabo: O ka bo itse ka Efangele e e boitshepo e Modimo o e senotseng gale kwa Parateiseng; mme go tloga foo ya bolelwa ke bo-Aborahame le Baporofeti; mme le ka ditshupelo le ditirelo dingwe tsa molao tse di neng tsa e bonaletsa pele - mme ya felela e tlisitswe botlalong ke Morwa Ona wa motsalwa-esi.

Buisa: Genesi 3:15; 22:18; 12:3; 49:10; Jesaya 53; 42:1-4; 43:25; 49:5, 6, 22, 23; Jeremia 23:5, 6; 31:32, 33; 32:39-41; Miga 7:18-20; Ditiro 10:43; 3:22;24; Baroma 1:2; Bahebera 1:1; Bakolose 2:7; Johane 5:46; Baroma 10:4; Bagalata 4:4; 3:24; Bakolose 2:17.

TLHALOSO (ka dikai)

A. Ka metlha re tshwanetse go gopola jaana:-

Modimo o *tshiamo* mme o batla *tuelo* ya seo.

Motho ka boena o *tshwanetse go duela*, gonne ke ena ka boena a leofileng, mme ena ka boena ga a ka ke a kgona go duela, ka gonne sebe sa gagwe ke sa tsatsi lengwe le lengwe.

Ka jalo Moemedi yoo o tshwanetse go nna motho yoo a senang sebe.

Buisa: Esekiele 18:4, 20; Bahebera 7:26

B. Kgalefo ya Modimo kgatlanong le dibe tsa rona, ke e kgolo thata, eo re ka se kgoneng go e emela. Esita le motho yoo a senang sebe (ge a le teng), a ka se kgone go emellana le kgalefo e ya Modimo. Ka jalo, ga go na ope yoo a leng ka fa tlase ga Modimo (yoo e seng Modimo) a ka jarang kgalefo e, mme a re duella dibe tsa rona. Ga go ope yoo a ka re duellang molato wa dibe tsa rona. Ka jalo *ga go kgonagale* ka gope gore re ka rekollwa ke mongwe, fa e se Modimo ka bo/Ona fela o ka dirang jalo. (Gopola gore Morwa Modimo ka boena ke Modimo.)

Buisa: Jesaya 9:6; 10:21; 22:22.

C. Katikisima e re bontsha Morekolodi/Moemedi/Mogolodi. Tsalo ya ga Jesu e bidiwa "gonna nama" ga gagwe, gonne a sena tshimologo, mme mo tsalong ya gagwe, ke gona a tsayang tlholego ya rona ya setho. Mo go Ena, setshwano sa Modimo mo mothong se a tsosoloswa. Ena Jesu Keresete o itse Modimo ka *kgopolo/tlhogo* ya gagwe. O *rata* Modimo ka *pelo* ya gagwe; O direla Modimo ka diatla tsa gagwe, ka botlalo. Ke jalo, rone ka gonne re dumela mo go Ena Jesu, le rona *re amogela setshwano sa Modimo gape mo go rona*. Sethwano se, se ne se fifaditswe, se silafaditswe ke dibe tsa rona.

D. Mo kgolaganong ya Kgale (Old Testament) yotlhe, re bona tshepiso ya Keresete yo o tlang. Tshepiso e, e bonala sentle jaaka mogala wa gauta o o tlhamaletseng, o o bonalang sentle.

Buisa dibuka tsena sentle: Genesi 3:15; 22:18; 49:10; Jesaya 53:9-11-

Madi a diphologolo tsa ditlhabelo mo Kgolaganong ya Kgale, a supa le go senola madi a ga Keresete. **Buisa:** Bahebera 7:27 (o e ithute ka pelo). Ka jalo re lemoga gore *tsotlhe tseo di tshepitsweng mo Kgolaganong ya Kgale di phethagala mo Kgolaganong e Ntsha ka tsalo ya ga Keresete* Buisa Luka 1:26-38. mme o batlisisa bo-Modimo le botho jwa ga Keresete sentle.

SONTAGA SA BO 7

20. Potso: A batho botlhe ba tla bona kgololo ka Keresete jaaka ba ne ba wela mo tshenyegong ka Atame?

Karabo: Nyaa, mme kgololesego e bonwe ke bone ba ba lenilweng mo go ene ka tumelo ya nnete fela - ba ba bileng ba emogetse bomolemo jwa gagwe.

Buisa: Mateho 7:14; 22:14; Mateho 16:16; Johane 1:12; 3:16,18,36; Jesaya 53:11; Dipesalemo 2:12; Baroma 11:20; 3:22; Behebera 4:3; 5:9; 10:39; 11:6-

21. Potso: Tumelo ya nnete ke eng?

Karabo: Tumelo ya nnete ke kitso ya nnete - e bong go tshegetsa ka nnete tsotlhe tse Modimo o re di senolelang mo Lefokong la Ona - e bile gape ke boikanyego jo bo tlhomameng, jo Moya o o Boitshepo o bo bopang mo pelong ya me ka Efangele. Ke go itse fa boitshwarelo jwa dibe le poloko e e sa khutleng e se tsa ba bangwe fela, mme le nna ke di abetswe ke Modimo go tswa mo bopelotlhomoging jwa Ona, mme e le ka ntlha ya tirelo ya ga Keresete.

Buisa: Jakobo 2:19; Bahebera 11:1, 7; Baroma 4:18-21, 10:10; Baefeso 3:12; Bahebera 4:16; Jakobo 1:16; Bagalata 5:22; Matheo 16:17; 2 Bakorinthe 4:13; Johane 6:29; Baefeso 2:8; Bafilipi 1:19; Ditiro 16:4; Baroma 1:16; 10:17; 1 Bakorinthe 1:21; Ditiro 10:44; 16:14; Baroma 1:17; Bagalata 3:11; Bahebera 10:10, 38; Bagalata 2:16; Baefeso 2:8; Baroma 3:24; Baroma 5:19; Luka 1:77, 78.

22. Potso: Mme jaanong Mokeresete o tshwanetse go dumela eng?

Karabo: O tshwanetse go dumela tsotlhe tseo re di solofeditsweng mo Efangeding le tse re di rutwang ka botlalo ke ditemana tsa Tumelo ya Bokeresete tse di sa belaesegang.

Buisa: Johane 20:31; Matheo 28:19; Mareko 1:15.

23. Potso: Ditemane tsa Boipolelo jwa Tumelo di tsamaya jang?

Karabo: Die tsamaya jaana:

- (1) Ke dumela mo go Modimo Rafa, Mothatayotlhe, Motlhodi wa legodimo le lefatshe.
- (2) Le mo go Jesu Keresete Morwa Ona yo o esi, Morena wa rona.
- (3) Yo o ithwelweng ka Moya o o Boitshepo, a tsalwa ke Maria wa lekgarebe.
- (4) Yo o bogisitsweng mo nakortg ya ga Pontius Pilatus; yo o bapotsweng mo sefapaanong, a swa, a fitlha, a fologela felong ga baswi.
- (5) Ka letsatsi la boraro o tsogile gape baswi ng.
- (6) O tlhatlogetse kwa legodimong, mme o dutse ka fa letsogong le letona la Modimo Rara, Mothatayotlhe;
- (7) Kwa o tla tswang teng go athola batshedi le baswi.
- (8) Ke dumela mo go Moya o o Boitshepo.
- (9) Ke dumela Kereke ya Bokeresete e e boitshepo, e e gotlhe, kopano ya baitshepi;
- (10) Boitshwarelo jwa dibe,
- (11) Tsogoyammele
- (12) Le botshelo jo bo sa khutleng. AMEN.

TLHALOSO (ka dikai)

A. Mo botshelong go na le ditlhopa *tse pedi* tsa batho; ebong: -badumedi bao ba bolokwang le basadumeleng bao ba emetsweng ke katlholo. Buisa: Johane 3:18 (mme o e kwalolle). Pharologanyo mono ga se *baetsadibe* le *batlhomami* – Nyaa!! Lebaka ke gore *rotlhe/rona batho*, re *baetsadibe*. Badumedi ba *baetsadibe/baetsadibe* ba *badumedi* ke batho bao ba tshwaraganeng le go lwantshana le sebe gore ba se fenyee. Mme *baetsadibe* bao ba sa *dumeleng* bona ba phela mo sebeng ka tsatsi lengwe le lengwe, ga ba se lwantse ka gope.

Badumedi ke baetsadibe bao ba siametsweng, bao ba lemogileng bosula jwa sebe fa pele ga Modimo, mme ba lwana ka thata yotlhe kgatlhanong le sebe.

Rona baetsadibe *re fiwa* tumelo - ke kamoo Katikisima e re rutang gore re gokellwa mo go Keresete ka tumelo.

- B. Tumelo ya nnete ke *kitso e e tlatseng/kitso ya nnete, kitso e e tlhwekileng* - Modumedi wa nnete o itse gore ka nnete Beibele yotlhe ke Lefoko la nnete la Modimo. **Buisa** 1 Timotheo 3:16 mme o le kwalolle. Tumelo ya nnete gape ke *tshepo e e tiileng*. Seno ke gore modumedi wa nnete o na le tshepo e e tiileng ya gore ena ka boena o na le karolo mo ditshepisong tsa Beibele tsa tshwarelo ya dibe.

Buisa: Barome 10:9-11 le Bahebera 11:1- (BATLA DIBUKA TSE DINGWE GAPE TSEO DITSAMAELANANG LE TSE).

- C. Re dumela *Beibele yotlhe* gonne Beibele yotlhe e le *Lefoko la Modimo*. Dinnete tsotlhe tsa Beibele di akarediwa mo Dikwalong tse Boipobolo, moo Diartikele di le somepedi (Boipolelo - Tumeio ya Bapostole) di fitlhelwang teng. (Batla gore *Dikwalo tsa Boipolelo* tsa Gereformeerde ke difeng).

SONTAGA SA BO 8

24. Potso: Ditemana tse, di kgaogangwa jang?

Karabo: Di kgaogangwa ka dikerolo di le tharo:

- (1) ya ntlha e bua ka ga Modimo Rara le popo ya rona;
- (2) ya bobedi e bua ka ga Modimo Morwa le kgololesego ya rona;
- (3) Ya boraro yona e bua ka ga Modimo Moya o o Boitshepo le kgalaletso ya rona.

25. Potso: Fa e kete go Modimo o le mongwe fela, ke eng fa o umaka Rara. Morwa le Moya o o Boitshepo?

Karabo: Ke ka gonne go itshenotse Modimo jalo mo Lefokong la ona gore Boraro jo bo farologaneng jo, ke Modimo o le mongwe wa nnete le wa bosakhutleng.

Buisa: Doiteronomio 6:4; Baefeso 4:6; Jasaya 44:6; 45:5; 1 Bakorinthe 8:4, 6; Jesaya 61:1; Luka 4:18; Genesi 1:2,3; Dipesalome 33:6; Jesaya 48:16; Matheo 3:16, 17; Matheo 28:19; 1 Johane 5:7; Jesaya 6:1, 3; Johane 14:26; 25:26; 2 Bakorinthe 13:13; Bagalata 4:6; Baefeso 2:18; Tito 3:5,6.

TLHALOSO (ka dikai)

- A. Karolo-bororong é, e tswa mo polelo-kolobetsong (doopsformulier) mo go Math. 28:10 mo Tumelo ya Bokreste (12 Diartikele) e simologang teng: E kwalolle. (Eyang lo dire merafe yotlhe barutwa, lo ba kolobetse mo leineng la Rara le la Morwa le la Moya o o Boitshepo, mme lo ba rute go tlhokomela tsotlhe tseo ke di lo laetseng.)

Lemoga fela gore boipolelo jo bo khutswane jo (thomo é) bo akareditse dilo di le dintsi jang!!!

- B. Katikisima ga e leke go tlhalosa Bongwebororong jo, mme e bolela fela gore re bo dumele ka gonne Beibele e bo ruta. Gape, ga go na go fetoga, ka gonne boleng jwa Modimo (seo Modimo o leng sona) ga bo tlhalosege. Fa re ne re ka O tlhalosa, O ne O tlaa bo O sa tlhole O le Modimo tota.

Buisa Diatoronomi 6:4; Matheo 3:16; 28:19; 1 Joh. 5:7, 12; Joh. 14:26 mme o bolele gore o ithutang ka ga Bongwebororong jo.

SONTAGA SA BO 9

KA GA MODIMO RARA LE POPO YA RONA

26. Potso: O dumela eng ka mafoko a a reng: Ke dumela mo go Modimo Rara Mothatsayotlhe, Motlhodi wa legodimo le lefatshe?

Karabo: Ke dumela gore: Rara wa bosakhutleng, Rara wa Morena wa rona Jesu Keresete, o tlhodile legodimo le lefatshe le tsotlhe tse di mo go tsona e seng ka sepe -yo o bileng gape ka fa kakanyong ya gagwe ya bosakhutleng, le ka fa tlomelong ya gagwe, ke Modimo wa me le Rara ka ntlha ya ga Keresete Morwa wa gagwe - yo ke mo ikafletseng gore ke tlhoke le pelaelo mo go reng a o tla mpabalela mo go tsotlhe tse ke di tlhokang mo mmeleng le moyeng.

Le gore o tla mpipela masula a otlhe a o a letlileng gore a ntsalele molemo; ka gonne o nonofile go dira jalo jaaka Modimo Mothatayotlhe le jaaka Rara yo o ikanyegang.

Buisa: Genesi 1 le 2; Ekesodu 20:11; Jobe 33:4; 38 le 39; Ditiro 4:24; 14:15; Dipesalome 33:6; Jesaya 45:7; Behebera 1:3; Dipesalome 104:27-30; 115:3; Matheo 10:29; Baefeso 1:11; Johane 1:12; Baroma 8:15; Bagalata 4:5-7; Baefeso 1:5; Dipesalome 55:23; Matheo 6:15, 26; Luka U:22; Baroma 8:28; Jesaya 46:4; Baroma 10:12; Matheo 6:32, 33; 7:9-11.

TLHALOSO (ka dikai)

Boipolelo jo, ga se sengwe se se tsididi gongwe se se sa Utlwagaleng; mme ke *boteng jwa pelo* jwa ngwana yoo a nang le Rara gape ko legodimong, ka ntlha ya ga Krete.

Rara o tlhodile tsotlhe mme o tlhokomela tsotlhe. Re ipolela seo kgatlhanong le makgolokgolo a batho bao ba akanyang le go batla-batla ka moo dilo tsotlhe di simologileng ka teng, le ka moo di phelang ka teng.

Mme ka gonne Modimo O re *ratile mo go Krete gape o kgona go dira* tsotlhe, ga re a tshwanela go boifa sepe ka gonne ka dinako tsotlhe re mo tlhokomelong ya Ona.

Buisa Pesaleme 33:6, mme o bolele gore dilo tsotlhe tse, di tlhodilwe ke eng: Buisa gape Pesaleme 33:11 mme o bolele gore ga tweng ka ga *tsela ya Modimo*.

SONTAGA SA BO 10

27. Potso: O itse eng ka ga tlamelo ya Modimo?

Karabo: Ke itse gore Modimo ka bothatayotlhe le ka bogotlhe jwa ona, o laola legodimo le lefatshe le dibopiwa tsotlhe jaaka e kete o di babalela le go di busa ka seatla sa ona, gore dimela le bojang, pula le komelelo, ngwaga tsa kgona le tsa leuba, dijo le dino, itekanelo mo botshelong le koafalo, khumo le khumanego - le dilo tse dingwe tsotlhe jalo - ga di itlise ka bo tsona mme di tla go rona di tswa seatleng sa ona sa boRara.

Buisa: Ditiro 17:25-28; Jeremia 23:23, 24; Jesaya 29:15, 16; Esekiele 8:12; Bahebera 1:3; Jeremia 5:24; Ditiro 14:17; Johane 9:3; Diane 22:2; Matheo 10:29; Diane 16:33.

TLHALOSO (ka dikai)

A. Modimo o thatayotlhe; o *gotlhe*. Kamoo O kgona go *busa* le go *tlhokomela tsotlhe* mo *gotlhe*. Modimo o busa mo go tsotlhe: Le mo ditiragalong tsa kgale tota re lemoga seatla sa Gaagwe seo se busang. Babusisi ba lefatshe bao ba busang, ba tswelletsatsela lenanego la tsela ya Gaagwe kwa pele.

Modimo o tshegetsatsotlhe: Go tswa kwa magodimong a a kwa godimodimo, a

magologolo, go fitlhella mo dikhukhwaneng (dimelanyana), le tse di nnyanenyana go busa le go tshegetsisa Modimo ka bo-ona; esita le meritshana ya ditlhogo tsa rona, ke Ona o o e balang. (Buisa Luka 12:7 mme o kwalolle temana eo.)

Mo badumeding, tsotlhe tseo Modimo O dirang di siame. Modimo o tliša khumanego, malwetse le mathata mo go rona gonne go re siametse.

Buisa mme utlwe gore ga tweng: Pesaleme 119:67; Matheo 6:25-34; Baroma 5:3-5.

- B. Tswellopele le mathata di tswa mo seatleng sa Modimo. Mo monateng le mo tswellopeleng ke tshwanetse go leboga Modimo godimo ga dineo tse di siameng tsa One. Mo mathateng ke tshwanetse go itshoka ka gonne Modimo ke One o a tlišang mo go nna, mme o a tlišetsa tshiamo.

SONTAGA SA BO 10(B)

Potso 28: Gore thusa eng go itse gore Modimo o bopile dilo tsothle mme ontse o di tshegetsisa ka pabalelo ya ona?

Karabo: Ke gore re nne le boishoko mathateng le tebogo mo katlegong. Mme mo go tsotlhe tse dik a re tšelang re nne le boikanyo mo Modimong. Gore ga go na sebopiwa sepe se se ka re kgaoganyang le lorato lwa lona.

Mabapi le nako e e tlang/bokamoso, re tshwanetse go nna re kgotsofetse gonne re le mo seatieng sa Modimo, mme O a re tšhokomela.

Buisa: Pesaleme 37:5 mme o utlwe gore ga tweng ka ga Modimo mo go rona.

SONTAGA SA BO 11

KA GA MODIMO LE KGOLOLO YA RONA

29. Potso: Ke ka ntlha ya eng fa Mora Modimo a bidiwa Jesu e bong Mopholosi?

Karabo: Ka gonne e le ene yo o re direlang poloko le go re golola mo dibeng tsa rona tsotlhe - mme le gore ga go na ope yo mongwe yo go ka bonwang poloko kwa go ene.

Buisa: Matheo 1:21; Bahebera 7:25; Ditiro 4:12; Johane 15:4, 5; 1 Timotheo 2:5; Jesaya 43:11; 1 Johane 5:11-.

30. Potso: Ba ba batlang pholoso ya bona go baitshepi, kgotsa ka bobona, kgotsa gongwe le gongwe, a le bona ba dumela mo go Jesu, Mopholosi?

Karabo: Nyaa, gonne le mororo ba mo paka ka molomo, mme ka ditiro ba itatola Jesu Mopholosi. Gonne nngwe mo dintlheng tse pedi tse di latelang tse e tshwanetse ya bo e le nnete, e bong go re: Jesu ga se Mopholosi ka botlalo - kgotsa go re: Bona ba ba emogelang Mopholosi ka tumelo ya nnete, ba ka lebelela mo go ene tsotlhe tse di tšhokang polokong ya bona.

Buisa: 1 Bakorinthe 1:13, 30, 31; Bagalata 5:4; Behebera 12:2; Jesaya' 9:6; Bakolose 1:19, 20; 2:10; 1 Johane 1:17.

TLHALOSO (ka dikai)

A. Leina *Jesu*, le mo sebopegong sa se-Gerika sa leina la se-Heberu eleng JOSHUA leo le kayang gore: *Morena o tshiamo* kgotsa *pholoso*. Leina lé, le tshwanetse ena fela yoo e leng *mopholosi*, gonne leina lé, le bolela tota seo a leng sona, eleng *mopholosi/mogolodi*. Pele ga tsalo ya gagwe, Josefa o supile phatlalatsa gore o amogetse taelo ya Morena ya go bitsa ngwana jalo (gore Jesu).

Buisa: Matheo 1:21 (mme o kwalolle).

B. Karabo eno, e lebisitse, santlha godimo ga kereke ya Roma eo e rapelang mohumagadi Maria le digalaledi tse dingwe. Gape, ka kakaretso, go na le bangwe bao ba ipitsang Bakreste, etswe ba rapela disetwa ka go beya tshepo ya bona mo go tsona.

Buisa: Ditiro 4:10-12.

SONTAGA SA BO 12

31. Potso: Ke ka ntlha ya eng fa a bidiwa Keresete Motlodiwa?

Karabo: Ke ka gonne a tlhomamisitswe ke Modimo Rara, a na a tloদিwa ke Moya o o Boitshepo, go tla a nna *Moporofeta* wa ona yo mogolo le Moruti wa rona yo o re senoletseng kgopolo ya boteng jwa Modimo le thato ya ona ka ga kgololesego ya rona ka botialo. Le go tla a nna *Moperesita* wa rona yo mogolo, yo o swetseng kgololo ya rona ka mmele wa gagwe - Yo o bileng, ka thapelelo ya gagwe, o ntse a re emela fa pele ga Rara -Mme o bile a bewa *Kgosi* ya rona ya bosakhutleng, e e te busang ka Lefoko le ka Moya wa yona. Ke ene yo o re sereietsang polokong eo ya kgololesego, mme a ba a re tlamela.

Buisa: Pesalome 45:8; Bahebera 1:9; Jesaya 61:1; Luka 4:18; Doiteronomio 18:15; Ditiro 3:22; 7:37; Jesaya 55:4; Johane 1:18; 15:15; Pesalome 110:4; Behebera 10:12, 14; 9:12, 14, 28; Baroma 8:34; Behebera 9:24; 1 Johane 2:1; Baroma 5:9, 10; Dipesalome 2:5; Sakaria 9:9; Matheo 21:5; Luka 1:33; Matheo 28:18; Johane 10:28; Tshenolo 12:10, 11.

32. Potso: Mme ke ka ntlha ya eng wena o bidiwa Mokeresete?

Karabo: Gonne ka tumelo, nna, ke tokololo ya ga Keresete. Ka jalo ke na le kabelo mo go tlotsweng ga gagwe gore ke tle ke ipolele Leina la gagwe, le gore ka nosi ke mo ntshetse setlhabelo se se tshedileng; mme le gore ka letswalo le le siameng mo botshelong jono ke kampane le bolelo le mmaba; go tla ke buse dibopiwa tsotlhe nae ka bosakhutleng, morago ga bophelo bono.

Buisa: Ditiro 11:26; 1 Bakorinthe 6:15; 1 Johane 2:27; Ditiro 2:17; Matheo 10:32; Baroma 10:10; 12:1; 1 Petoro 2:5, 9; Tshenolo 1:6; 5:8,10; 1 Petoro 2:11; Baroma 6:12, 13; Bagalata 5:16; Baefeso 6:11; 1 Timotheo 1:18, 19; 2 Timotheo 2:12; Matheo 25:34.

TLHALOSO (ka dikai)

A. Krete ke popego ya se-Gerika ya lefoko la se-Heberu, eleng MESSIA. Messia ke gore *Motlodiwa wa Morena*. Go tlotsa go bontsha gore motho yo o *itlhapetswe*, le gore ka Moya o o Boitshepo o *kgorisitswe* go ka tsena mo tirong/pitsong/boikarabelong jo bo rileng. Ka jalo, *Kreste ke leina lapitso* la ga Jesu.

Buisa dibuka tse di latelang, o bo o di kwalolle, o utlwe gore di a reng ka ga go tloদিwa ga Jesu ka Moya o o Boitshepo. Pesaleme 45:8; Baheberu 1:9; Luka 4:18.

B. *Moporofeta* ke *Moreri* wa Lefoko la Modimo. Ke seo Krete a neng a se dira. Maikaelelo a go rera Lefoko la Modimo ke *go re itsise tsela le thato* ya Modimo, mabapi le *kgololesego* ya rona mo sebeng. Potso ke gore ao le gompiano Krete o santse a a re rerela? Gona jang?

C. Tiro ya Moperesita ke go *neela*, boemong jwa dibe tsa morafe we gaabo. Fela jalo, Krete o *ineetse* ka *Boena*, a ineella dibe tsa rona. Gape, tiro ya Moprista ke *go rapelela* pele, morafe wa gaabo. Le gompiano Krete o santse a re rapella.

Goreng fa Johane 17 a bidiwa thapelo ya Moprista o mogolo? (E buise sentle, mme o arabe potso é.)

D. Kgosi e busa le go *sireletsa* batho ba yona kगतlanong le dira. Krete le Ena o dira jalo mo go rona kगतlanong le *sebe/tiabolo*. O busa mo go rona ka Lefoko le Moya o o Boitshepo

wa Gaagwe. Mo Lefokong la Gaagwe o re bolella ka moo re tshanetseng go phela ka teng; mme Moya wa Gaagwe o re fa tlhotlheletso ya go utlwa Lefoko la Gaagwe.

Buisa mo katikisimeng: THAPELO YA BORATARO mme o utlwe ka moo e amanang ka teng le bogosi jwa go Krete mo go rona badumedi mo go Ena.

SONTAGA SA BO 13

33. Potso: Ke ka ntlha ya eng Kereseta a bidiwa Morwa Modimo motsalwa esi etswa le rona re le bana ba Modimo?

Karabo: Ke ka gonne Keresete e le ene e le esi yo e leng Morwa Modimo tota ka boskhutleng - fa rona re dule bana ba Modimo ka ntlha ya kutlwelobotloko le lorato lwa gagwe.

Buisa: Johane 1:14; Bahebera 1:1, 2; Johane 3:16; 1 Johane 4:9; Baroma 8:32; Baroma 8:16; Johane 1:12; Bagalata 4:6; Baefeso 1:5, 6.

34. Potso: Ke ka ntlha ya eng o mmitsang Morena wa rona?

Karabo: Gonne o re rekile mmele le moya dibeng tsotlhe tsa rona, e seng ka gauta le selefera mme ka madi a gagwe a botlhokwa; a re rekolola mo thateng yotlhe ya ga Satane, mme a re itseela go nna leruo la gagwe.

Buisa: 1 Petero 1:18, 19; 2:9; 1 Bakorinthe 6:20; 1 Timotheo 1:6; Johane 20:28.

TLHALOSO (ka dikai)

A. Morwayoesi (*Motsalwaesi*) ke gore Jesu ke ena fela ngwana. Ke ena fela ka gonne ke ena Mora fela wa tlhago wa Modimo. Krete o fapaana gape le rona ka gonne e le Morwa wa bosakhutleng wa Modimo, mme rona re le dibupiwa tseo e seng tsa bosakhutleng. Rona, ka *kutlwelobotlhoko* ya gagwe fela, re bidiwa le go amogelwa jaaka bana ba Modimo.

Kutlwelobotlhoko ke gore, Rara o re tshola le go re amogela jaaka *ditlogolwana* tsa Gaagwe, ka gonne O re rata fela ka Krete (mo go Krete), *Kwa ntle* ga lebaka lepe; *Kwa ntle* ga molemo ope o re o diretseng Modimo, *Kwa ntle* ga tuediso epe go Modimo. **Buisa:** 1 Johane 3:1 mme o utlhe gore ga tweng ka ga ntlha e. (E kwalolle). (*Tse dingwe:* Johane 1:14; Baroma 8:32; Bagalata 4:6 jalo-jalo.)

B. Krete o bidiwa *Morena* eseng *morena*, gore re kgone 'go bona pharologanyo gareng ga Modimo le motho. Krete ke *Morena* wa rona ka gonne e le MORUWI wa rona/mongwarona. Re diruiwa gongwe makgoba a Gagwe, bao a re rekolotseng/a re golotseng mo go mongwarona wa pele (moruwi wa rona wa pele), eleng tiabolo. (Buisa Sontaga sa 1 gape.)

Buisa: 1 Petero 1:18, 19; 1 Bakorinthe 6:20; Johane 20:28 malojalo, mme o ithute ka pelo, tseo o di kgonang. (Buisa Sontaga sa 1 gape.)

SONTAGA SA BO 14

35. Potso: Mafoko a a reng: "Yo o ithwelweng ka Moya o o Boitshepo: a tswalwa ke Maria wa tekwarebe^u, a raya eng?"

Karabo: A raya go re: Morwa Modimo, yo e leng Modimo wa nnete le wa bosakhutleng, a nna motho tota mo nameng le mading a ga Maria wa lekgarebe, ka tiro ya Moya o o Boitshepo - e le gore a tle a nne kokomana ya ga Dafita tota, jaaka mo go bagabo ie mo go tsotlhe, kwa ntle ga boleo.

Buisa: 1 Johane 5:20; Johane 1:1; 17:3; Baroma 1:3; Bakolose 1:15; Baroma 9:5; Bagalata 4:4; Luka 1:31; 42, 43; Matheo 1:20; Luka 1:35; Baroma 1:3; Dipesalome 132:11; 2 Sameule 7:12; Luka 1:32; Ditiro 2:30; Bafilipi 2:7; Behebera 2:14, 17; 4:15.

36. Potso: Ke eng se se leng mosola mo go wena ka ntlha ya ithwalo le tsalo e e boitshepo ya ga Keresete?

Karabo: Ke gore o Motsereganyi wa rona - mme ka go tlhoka mplato ga gagwe le boitshepo jwa gagwe jwa botlalo, o mpipela maleo fa pele ga sefatlhego sa Modimo - e bong dibe tse ke ithwaletsweng mo go tsona ka ba ka tsalelwa mo go tsona.

Buisa: Bahebera 7:26, 27; 1 Petoro 1:18, 19; 3:18; 1 Bakorinthe 1:30, 31; Baroma 8:3, 4, Jesaya 53:11; Dipesalome 32:1.

TLHALOSO (ka dikai)

A. Tsalo ya ga Krete ke gakgamatso e kgolokgolo mo go tseo di diragetseng (le tseo di tlaa tlang). Mo tsalong é, Modimo o tshotse tlholego/maemo a motho; (tlholego ya botho). Totatota seo re ka se tlhaloganya jang? Mo tsalong eo, rona re amogetse Meomedi/Mmueledi yo a ka re rekollang mo go tiabolo jaaka re utlwile mo Sontageng sa bo 5 le sa bo 6. Ka metlha, Krete o ne a ipitsa "Morwa-Motho".

Potso ke e: A na morwetsana Maria e ne e le motho wa moetsadibe jaaka rona?

Buisa: 2 Samuele 7 yotlhe (segolo-thata ditemana 12-16). Johane 1:1; 17:3; Luka 1:35; Baroma 1:3 (le tse dingwe tseo di supiwang mo ditemaneng tse dingwe).

B. Krete ke *Moishegofatsi* wa rona yoo tletseng. Le dibe tseo ke *amogetsweng* le go *tsalwa* ka tsona o a di tlosa, o a di sira, o a di khurumetsa fa pele ga sefatlhego sa Modimo. Tiro ya gagwe ya Mmueledi, e simolola totatota ko tsalong ya Gagwe. Tsalo ya gagwe tota e ne e le *pogo* ka gonne o ne a tshwanetse go ikokobetsa/go ingotlafatsa gore a tle a tshole maemo a botho (a bobbe).

Potso ke é: Ge bana ba bannye ba badumedi ba swa, a na ba ya tatlhegong?

Buisa: Jesaya 53:11; Baroma 8:3, 4; 1 Bakorinthe 1:30, 31 jalojalo.

SONTAGA SA BO 15

37. Potso: O utlwisisa eng ka mafoko a a reng: "A boga?"

Karabo: Moo go raya gore: Mo malatsing a otlhe a botshelo jwa gagwe mo lefatsheng, bogolo jang kwa bokhutlong jwa botshelo jwa gagwe, o ne a belega bogale jwa Modimo mo mmeleng wa gagwe ka ntlha ya dibe tsa lotso lotlhe loo motho, gore ka pogiso le setlhabelo sa thuanano sa gagwe, a tle a golole mebele le msya ya rona tshenyegong e e sa khutleng - mme a re bonele bopelotlhomogi le tshiamelo ya Modimo le botshelo jo bo sa khutleng.

Buisa: Jesaya 53:4; 1 Petoro 2:24; 3:18; 1 Timotheo 2:6; Jesaya 53:10; Baefeso 5:2; 1 Bakorinthe 5:7; 1 Johane 2:2; Baroma 3:25; Bahebera 9:28; 10:14; Bagalata 3:13; Bakolose 1:13; Bahebera 9:12; 1 Petoro 1:18, 19; Baroma 3:25; 2 Bakorinthe 5:21; Johane 3:16; 6:51; Bahebera 9:15; 10:19.

38. Potso: Ke eng fa a ne a boga ka fa tlase ga moatlhodi Pontio Pilato?

Karabo: Moo, go raya gore: Ene motlhokamolato, o tsena katlholong ya moatlhodi wa selefatshe, gore a tle a re golole mo katlholong e e thata ya Modimo e e neng e re tshwanetse.

Buisa: Johane 18:38; Matheo 27:14; Luka 23:14, 15; Johane 19:4; Dipesalome 69:6; Jesaya 53:4, 5; 2 Bakorinthe 5:21; Bagalata 3:13.

39. Potso: A go sengwe sa botlhokwa mo papolong ya gagwe gofeta fa a ka bo a sule loso longwe?

Karabo: Ee, gonne ka ntlha eo ke dumela fa a itseetse petso e e neng e le mo go nna,

a e ipega - etswe loso lwa sefapaano lo hutsitswe ke Modimo.

Buisa: Bagalata 3:13; Doiteronomio 21:23.

POGO YA GA JESU

TLHALOSO (ka dikai) (Lebelela Potso 37 = A, B, C)

A. Pogo ya ga Jesu e simologa ko *tsalong* ya gagwe go fitlha kwa *sefapanong*. Akanya fela ka *boikokobetso* jwa gagwe, ka maikaelelo a go itekanya le rona ka botlalo, ntleng le dibe tsa rona. Tsalo ya gagwe mo *bojelong jwa dipitsi*; Ena Mogalaledi yo a senang sebe o ipona mo lefatsheng a motilwe/tshasitswe dibe (letlhoo, bobaba, ditshebo). Pogo ya gagwe e fu!he!e!a ntlha e e botengteng kwa sefapanong fa a ne a tshwanetse go swa *loso/lwa/thogako*.

B. Mo nakong yotlhe é, Krete o ne a sikere/jere/rwele pogo/kotlhao ya bosafeleng. Pogo eno ya gagwe e ne e lekanetse sebe sa *losika loo mothokakaretso*. Kgang ya gore motho o santse a ka tseno mo tatlhegong, ga se ka gonno Krete, tuelo ya gagwe e le khutswane. Nnyaa!! O duetse mo go lekaneng.

Buisa: Jesaya 53.

C. Ke tshwanelo ya bo-Modimo gore Krete a re duelle le go re sikarela Kgalefo ya Modimo. Go seng jalo, dibe tsa rona di ka bo di sa duellwa. Krete ga a tiela fela go "boloka mewa ya rona", mme tota o re golola "*mmele le moya*". Mono lefatsheng re phela teng ka *mmele le moya* re le ba ga Krete, mme re tla amogela botshelo jo bo sa khutleng gape ka ona "*mmele le moya*".

Buisa: Jesaya 53; 1 Petero 2:24; 3:18; 1 Timotia 2:6; Johane 3:1; 6:51; Baroma 3:25; 1 Bakorinthe 5:7; 1 Joh. 2:21 (jalo-jalo).

D. Puso e tlhomilwe ke Modimo gore go nne le molao le tolamo (tshiamo) mo botsheiong. Ke kamoo *babusi ba lefatshe* ba busang boemong jwa Modimo, le fa ba sa lemoge.

Pilato o ne a tshwanetse go bo a atlhotse Krete, ka gonno Modimo o ne o ratile gona gore a bo a atlhotswe. O ne a tshwanetse go bo a *bonwe molato*, ka gonno molato wa rona o ne o le mo godimo ga gagwe, mme e se ka gonno ena a ne a le molato.

Buisa: Matheu 27:24; Johane 18:38; Luka 23:14, 15; Jesaya 53:4, 5; 2 Bakorinthe 5:21.

E. Mo go Ditoronomi 21:35, Modimo o tlhalosa jaana: "mongwe yo o lanyegilweng o rogilwe ke Modimo". Buisa gape Bgalata 3:13 Mongwe yo o *bapoisweng*, a lepeletse *gareng* ga *legodimo* le *lefatshe* - ké gore, maoto a gagwe a se ka a kgoma lefatshe, mme ena ka botlalo ga a tshwanelwa ke legodimo Itse jaana gore Baroma e ne e le batho ba ba neng ba dirisa polao ya sefapano mo *makgobeng*. Ka jalo Krete le ena o tshotswe ke Modimo le batho jaaka mongwe yo o rogilweng (yo o hutsitsweng).

Buisa: Bagalata3:13; Ditoronomi 21:23; Baroma 8:3.

SONTAGA SA BO 16

40. Potso: Ke gore eng fa Keresete a ne a tshwanetse go isa losong?

Karabo: Ka gonno, go ya ka fa tshiamo le boammaaruri jwa Modimo, go bo go se mokgwa ope o dibe tsa rona di ka duelelwang ka one, go feta fa o ka duelelwa ka loso lwa Morwa Modimo.

Buisa: Genesi 2:17; Baroma 8:3, 4; Bahebera 2:14, 15.

41. Potso: Ke ka ntlha ya eng fa a bile a fitlwa?

Karabo: Moo, ya bo en e le tshupo ya fa ruri a bile a swa.

Buisa: Ditiro 13:12; Matheo 27:59,60; Luka 23:53; Johane 19:38.

- 42. Potso:** Mme fa e le nnete gore Keresete o ne a re swela, go tla jang gore le rona re bo re swa?
- Karabo:** Kana loso lwa rona ga se tuelelo ya dibe tsa rona, nyaa. Mme ke go apola ka loso dibe tsa rona, le go fetela kwa botshelong jo bosakhutleng.
- Buisa:** Mareko 8:37; Dipesalome 49:8; Bafilipi 1:23; Johane 5:24; Baroma 7:24.
- 43. Potso:** Ke mosola ofe o re o bonang gape mo setlhabelong sa ga Keresete le mo losong lwa gagwe mo sefapaanong?
- Karabo:** Ke gore ka thata ya gagwe, motho wa rona wa bogologolo o bapotswe nae, a swa nae, a ba a fitlhwa nae - e le gore keletso le thato ya thaelo ya senama, di se ka tsa tlhola di bona taolo mo go rona ka gope -mme rona ka rosi re tle re o ineela ka tebogo.
- Buisa:** Baroma 6:6, 12; 12:1-
- 44. Potso:** Ke eng fa go bile ga twe: "Yo o fologetseng kwa felong ga baswi?"
- Karabo:** Seo ke boikgomotso jwa me jwa botlalo mo tlhabanong ya me e e thata, gore Mong wa me e bong Morena Jesu Keresete, ka ntlha ya pogisego ya gagwe e e se nang go lekannngwa, le ka matlhoko, tshogo le matshwenyego a go tsena felong ga baswi le matsanko a a sisimosang a o a boneng, bogolo jang kwa sefapaanong - o mphenyeditse mathata a otlhe a ba a nkgolola.
- Buisa:** Dipesalome 18:5, 6; 116:3; Matheo 26:38; 27:46; Bahebera 5:7; Jesaya 53:5.

TLHALOSO (ka dikai)

- A. Go ya ka setlhare se kitso ya molemo le bosula ko tshimong ya Edene, Modimo o reile Adama a re: "Motlha o jang leungo la selthare sé, ruri o tla swa". Seno ke netefatso ya gore Modimo o beile katlholo ya loso godimo ga motho, mo bosuleng bongwe le bongwe joo, a bo dirang; ke tuelo go dibe tsa rona, mme go tla katlholo eo, Krete ke ene a re emetseng.
- Buisa:** Genese 2:16, 17; Baroma 8:3, 4; Bahebera 2:14, 15; Baroma 5:12.
- B. Go bontsha fa totatota Krete a ne a sule, o ne a tshwanetse go fitlhwa. Mmele wa gagwe o fitlhlwe. Phitlho eno ya gagwe le yona e ne e le sesupo sa *boingotlo/boikokobetso/boinyenyefatso* jwa gagwe (Krete). (Krete o nyenyefaditswe tota ka loso go feleletsa ka phitlho.) Krete o *sikere* jalo *thogako* ya rona go fitlhella kwa losong. *Lemoga!!* Lebitla la gagwe le thibiwa ka letlapa/samente –*Goreng??*.
- Buisa:** Matheo 27:59, 60; Luka 23:53; Johane 19:38; Ditiro 13:29.
- Loso lo re emetse rotlhe, mme le fa go le jalo, moengele wa lona o sule/o suthisitswe/o koafaditswe fa pele ga badumedi -ga a na thata epe mo modumeding. Krete o *rejaretse thogako ya sebe*. Le fa re golotswe mo thateng ya tiabolo, re ntse re le baetsadibe go ya losong. Le fa go le jalo loso lo, ga le na kutlwiso/botlhoko epe mo go rona. Gape-gape, loso ke kgoro eo re tsenang ka yona go ya botshelong jo bo sa khutleng. Paulose a re: "... re fegelwa ka, rosi mo teng ga rona . . ." (Baroma 8:22; 13:23). O'bolelang ka go re jalo?
- * Motlha mebele ya rona e swang, dibe tsa rona le tsona di swa ka gotlhe-gotlhe.
- Buisa:** Mareka 8:37; Pesaleme 49:8; Bafilipi 1:23; Baroma 7:24.
- D. Ka ntlha ya *tumelo*, le rona re na le kabelo mo losong lwa ga Krete. Loso lo, lo fentse sebe. Thata ya ga Krete e fentse motho wa rona wa bogologolo. Motho yo, o bapotswe le Krete, o swile le Krete, a ba a fitlhwa le Krete. *Motho o'wa rona wa kgale ke keletso le thato ya thaelo ya senama*, mme ga di tlhole di na le taolo epe mo go rona. Le fa motho wa rona wa kgale a ntse a phela, fela ga a sa re busa, ga a sa na thata eo.
- E. **Dihele:** Krete o ne a se totatota kwa tulong eo e bidiwang "dihele" (BOBIPO), mme kangkgolo ke ya gore Krete, mo tseleng e ya gagwe ya pogo, o ne a *tshwanetswe* ke

dipogo le ditlhabi tsa dihele (Bobipo). Moo e ne e le maemo a a boteng teng a pogo ya gagwe, a sa bogele dibe tsa gagwe, mme a bogela rona, ka ntlha ya dibe tsa rona.

LEMOGA

Kotlhao, godimo ga *sebe*, ke loso. Mme go ntse fela jalo le ko diheleng, go na le *losa lwa bosakhutleng*. Teng moo Kreste o ne a tshwanetse go re golola.

SONTAGA SA BO 17

MOSOLA WA TSOGO YA GA KERESETE MO GO RONA

45. Potso: Tsogo ya ga Keresete mo losong e na le mosola ofe mo go rona?

Karabo: Go dilo dile tharo: *Sa ntlha* ke gore ka tsogo ya gagwe, Morena Jesu Keresete o re fenyeditse loso, gore a tle a re dire baabelwa mo tshiamelong e o e re tliseditseng ka loso lwa gagwe. *Sa bobedi* ke gore ka ntlha ya thata ya gagwe, le rona re tsosediwa kwa botshelong jo boa. *Sa boraro* ke gore: Tsogo ya ga Keresete ke peeletso ya gore re tla tsogela poloko.

Buisa: Baroma 4:15; 1 Petoro 1:3; 1 Bakorinthe 15:16; 6:4; Bakolose 3:1, 3; Baefoso 2:5, 6; 1 Bakorinthe 15:20, 21.

TLHALOSO (ka dikai)

Losa lwa ga Keresete ke tuelo ya dibe tsa rona, mme le fa go le jalo, seno se ka bo se se na thuso epe mo go rona, *fa Keresete akabo a sa tsoga*. Ka tsogo, Keresete o supile gore o fentse loso. Ka jalo, Keresete o kgona go re fa, go re abela tshiamelo/tshwanelo, eo a re e fileng ka loso lwa gagwe.

Keresete o tsogile, ka jalo Bakeresete/Badumedi le bona baa tsoga, ba tsogela kwa botshelong jo bo sa. Seno ke gore, re tshelela go isa tlotlisong ya ga Keresete, gore leina la gagwe le roriswe.

Gape, Keresete Morwa wa Modimo, o na le tlholego ya botho ya nnete. Gangwe fela motho yó, Keresete, o tsogile go tswa losong go ya bophelong/mmeleng wa botho; le rona fela jalo, re tla tsoswa ka mebele go tswa losong.

Buisa gape: Baroma 4:25; 1 Petoro 1:3; 1 Bakorinthe 15:16

TLHALOSO (ka dikai)

Losa lwa ga Keresete ke tuelo ya dibe tsa rona, mme le fa go le jalo, seno se ka bo se se na thuso epe mo go rona, *fa Keresete akabo a sa tsoga*. Ka tsogo, Keresete o supile gore o fentse loso. Ka jalo, Keresete o kgona go re fa, go re abela tshiamelo/tshwanelo, eo a re e fileng ka loso lwa gagwe.

Keresete o tsogiie, ka jalo Bakeresete/Badumedi le bona baa tsoga, ba tsogela kwa botshelong jo bo a. Seno ke gore, re tshelela go isa tlotlisong ya ga Keresete, gore leina la gagwe le roriswe.

Gape, Keresete Morwa wa Modimo, o na le tlholego ya botho ya nnete. Gangwe fela motho yó, Keresete, o tsogiie go tswa losong go ya bophelong/mmeleng wa botho; le rona fela jalo, re tla tsoswa ka mebele go tswa losong.

Buisa gape: Baroma 4:25; 1 Petoro 1:3; 1 Bakorinthe 15:16; Bakolose 3:1-3; Baefese 2:5, 6 jalo-jalo.

SONTAGA SA BO 18

TLHATLOGO YA GA KERESETE GO YA LEGODIMONG

46. Potso: O tlhaloganya eng ka mafoko a a reng: "Yo o tlhatlogetseng kwa legodimong."

- Karabo:** Ke tihaloganya gore: Mo ponong ya barutwa ba gagwe, Keresete o ne a tihalogela kwa legodimong, mme gone o re tswela molemo go baa a tla boa gone go tla go athola batshedi le baswi.
- Buisa:** Ditiro 1:9; Mareko 16:19; Luka 24:51; Bahebera 9:24; 4:14; Baroma 8:34; Bakolose 3:1; Ditiro 1:11; Matheo 24:30.
- 47. Potso:** A mme jaana Keresete ga a tlhole a le mo go rona go isa bokhutlong jwa lefatshe, jaaka a na a solofetsa?
- Karabo:** E re ka Keresete e le motho wa nnete, le Modimo wa nnete, fa e le ka fa bothong ga a tlhole a leyo mo lefatsheno: mme fa e le ka fa bomodimong le bogosing le bopelotlhomoging jwa gagwe le Moya, teng ga a re katoga.
- Buisa:** Matheo 28:20; Bahebera 8:4; Matheo 26:11; Johane 16:28; 17:11; Ditiro 3:21; Johane 14:18; Matheo 28:20.
- 48. Potso:** Jaanong ka bomotho bo se gotlhegotlhe kwa bomodimo bo leng gone, a jaana bomotho le bomodimo ga bo kgaogane ka pharologanyo mo go Keresete?
- Karabo:** Nyaa, ruri nyaa; gone bomodimo ga bo agelelwe ka sepe, mme bo gotlhe. Mme o ka nna gone gore bomodimo bo kwa ntle ga bomotho jwa gagwe jo a bo amogetseng, mme le fa go ntse jalo bo kopantswe le botho ba gagwe.
- Buisa:** Jeremia 23:24; Ditiro 7:49; Bakolose 2:9; Johane 3:13; 11:15; Matheo 28:6.
- 49. Potso:** Go na le mosola ofe mo tihatlogong ya ga Keresete?
- Karabo:** Go dilo di le tharo: *Sa ntlha* ke gore: Ke mmueledi wa rona kwa legodimong fa pele ga sefatlhego sa ga Rraagwe. *Sa bobedi* ke gore: Mebele ya rona e na le peeletso kwa legodimong, le gore ene jaaka a le tlhogo ya rona, le rona o tlaa re itseela kwa o gona, rona ba re leng ditokololo tsa gagwe. *Sa boraro* ke gore: O re rometse Moya wa gagwe go nna peeletso ya rona e 're tlaa batlang thata ya gagwe ka yona, e bong kwa Keresete a dutseng gona a le ka fa seatleng se se tona sa Modimo - e seng e e mo lefatsheng.
- Buisa:** 1 Johane 2:1; Baroma 8:34; Johane 14:2; 17:24; 20:17; Baefeso 2:6; Johane 14:16; 16:7; Ditiro 2:33; 2 Bakorinthe 1:22; 2 Bakorinthe 5:5; Bakolose 3:1.

TLHALOSO (ka dikai)

- A. Totatota sena se re tihalosetsa gore Keresete o boetse gape kwa *legodimong*, koo a tswang teng. Mo tihatlogong e, ya go ya legodimong, Keresete o *tseile mmogo*, *mmele wa botho*. Mmele ó wa botho, ga wa sala kwa morago mo lefatsheng.
- Tihatlogelo legodimong é, le go tla/go khutla gape, ke dilo tseo di pataganeng; di mmogo. Go tswa mo tihatlogong e, o tshwaragane le go ipaakanyetsa go tla/go boya gape, a tla mo lefatsheng go tla go athola.
- B. Pele Keresete a tihatlogela kwa legodimong o rile: "Ke na le lona ka malatsi otlhe go ya bokhutlong jwa lefatshe" (Matheo 28:20). O ne a buwa jalo le fa a ne a ntse a itse gore o tla tihatlogela kwa legodimong. O ne a buwa jalo ka gone o ne a itse gore Ena ke Modimo, mme ka jalo o gotlhe.
- C. Potso eno e mo tseleng ya go tlosa tatlhego eo e leng:
- Mmele wa botho wa ga Keresete o dirilwe gore e nne wa Modimo, mme o mo gotlhe.
 - Mmele wa ga Keresete o ne a na le mmele o o ka kgaoganang, mme ka jalo totatota o ne a na le mmele wa tlhologo ya Modimo fela.
 - bomotho le boModimo jwa ga Keresete di ka kgaogangwa.
- Ga go jalo - Keresete a ka se nne motho ka nako nngwe, mme ka nako nngwe a nne Modimo. Nyaa! Ka metlha yotlhe, o *dilopedi tse ka go lekana*.

D. Keresete, jaak a Mopristamogolo a le mongwe fela, o re direla, le go tla fa pele ga Rraagwe jaaka Mmuelêdi. (A re ipotse gore gona jaaka *Moporofeta* le *Kgosi* ya rona, o re direlang?)

Mmele wa ga Keresete wa botho ke *peeletso* (pledge/security) ya rona/mo go rona kwa legodimong, gore mebele ya rona ya botho le yona e tle e fitlhelle kgalalelo. (Taba e botlhokwa thata !! Keresete ke tlhogo ya rona bao re dumelang mo go ena; rona kereke ya gagwe / mme rona re ditokollo tsa gagwe - mme o tlaa re itsella koo a leng teng kwa legodimong.)

Moya o o Boitshepo wa ga Keresete, o re o file le ona go nna *peeletso* ya rona go re dirala baagi ba legodimo eseng ba mo lefatsheng.

SONTAGA SA BO 19

50. Potso: Ke ka ntlha ya eng fa go bile go okeditswe ka mafoko a a reng: "Mme o dutse ka fa seatleng se se tona sa Modimo?"

Karabo: Ke ka gonne e le gone mo Keresete a go tthatlogeletseng kwa legodimong, go tla a iponatsa teng fa a le tlhogo ya Kereke ya Bokeresete, mme Rara o busa dilo tsotlhe ka ene.

Buisa: Baefeso 1:20;23; Bakolose 1:18; Matheo 28:18; Johane 5:22.

51. Potso: Te tsela molemo ke eng mo kgalalelong ya Kgosi ta rona e bong Keresete?

Karabo: Lwantlha ke gore: Rona ditokololo tsa gagwe, o re romela dineo tsa legodimo ka Moya wa gagwe o o Boitshepo; mme go tloga foo, o tlaa re lwela ka natla ya gagwe mo babeng botlhe, a ba a re boloka.

Buisa: Ditiro 2:33; Baefeso 4:8; Dipesalome 2:9; 110:1,2; Johane 10:28; Baefeso 4:8.

52. Potso: O gomotsega jang ka ntlha ya go tla gape ga Keresete, go tla go atlhola batshedi le baswi?

Karabo: Ke gobo nna, mo dikutsafalong tsotlhe le mo ditekong tsa me tsotlhe ke ntse ke lebeletse ene Mmoloki wa me jaaka Moatlhodi yo o tswang legodimong ene, yo ka esi ka ntlha ya me; a kileng e ema tsheko ya katlholo ya Modimo, mme a ntlosetsa petso. Ke ene yo o tla nyeletsang baba ba me le ba gagwe; mme fa e le nna le baitshenkedwi ba bangwe, o tlaa re tseela kwa ga gagwe, e bong kwa boiketlong le kgalalelong ya legodimo.

Buisa: Bafilipi 3:20; Luka 21:28; Baroma 8:123; Tito 2:13; 1 Bathesalonika 4:16; Matheo 25:41; 2 Bathesalonika 1:6; Matheo 25:34; 2 Bathesalonika 1:7.

SONTAGA SA BO 20

KA GA MOYA O O BOITSHEPO LE KGALALETSO YA RONA

53. Potso: O dumela eng ka ga Moya o o Boitshepo?

Karabo: (i) Ke dumela gore Moya o o Boitshepo le Rara le Morwa, ke Modimo wa nnete le wa bosakhutleng.

(ii) Ke o neilwe gore ka tumelo ya nnete ke nne moabelwa wa tsa ga Keresete.

(iii) O a nkgomotsa, le gona o agile mo go nna ka bosakhutleng.

Buisa: 1 Johane 5:7; Genesi 1:2; Jesaya 48:16; 1 Bakorinthe 3:16; 6:19; Ditiro5:3,4; Bgalata4:6; Matheo 28:19, 10; 2 Bakorinthe 1:22; Baefeso 1:13; Bagalata 3:14; 1 Petero 1:2; 1 Bakorinthe 6:17; Johane 15:26; Ditiro 9:31; Johane 14:16; 1 Petero 4:14.

TLHALOSO (ka dikai)

1. Fela jaaka Beibele, Katekisisa ga e re bolelle thata ka ga Motho ya wa Moya o Boitshepo. Le fa go le jalo, gotlhe mo Beibeleng re lemoga tiro/kgolo ya ona. (Mokwadi wa Beibele, mang kgotsa mang, o dirile jalo ka tshutsumetso ya Moya o o Boitshepo.)
2. Moya o o Boitshepo ga se fela *Moya wa Modimo*, mme ka boona ke *Motho wa Modimo*; ke MOGOMOTSI.
3. Moya o Boitshepo o re fa tumelo, eo ka yona re nnang le karolo mo tshiamong ya ga Krete. (Re kgona go dira tiro ya Boprsta/Batlhanka/Bathusi; Re kgona go dira tiro ya Boporofeta/Baruti, Bareri ba Evangedi; Re kgona go dira tiro ya Bogosi/Bagolo/Bagogi/Balaodi, Botsisa kagiso, - kgatlhanong le sebe, le tiabolo.)
4. Ga tweng ka ga Moya o Boitshepo mo go *Johane 14:16*]

SONTAGA SA BO 21

54. Potso: O dumela eng ka ga Kereke e e boitshepo e e ka gotlhe?

Karabo: Ke dumela gore Morwa Modimo o iphuthetse phuthago ya gagwe mo tshikatshikeng tsotlhe go tswa kwa tshimologong ya lefatshe go ya bokhutlong jwa lona, ka Moya wa gagwe le ka Lefoko la gagwe - kopanong ya tumelo, o bile o sireletsa phuthago e ya gagwe le go e babalela; mme fa e le nna, ke tokololo ya yone e e tshedileng, le gona ke tla aga ke le tokololo ka bosakhutleng.

Buisa: Baefoso 5:26; Johane 10:11; Ditiro 20:28; Baefeso 4:11; 13; Genesi 26:4; Tshenolo 5:9; Baroma 8:29; Baefoso 1:10;13; Jesaya 59:21; Baroma 1:16; 10:14; 17; Baefoso 5:26; Ditiro 2:42; Baefeso 4:3-5; Dipesalome 71:17; 18; 1 Bakorinthe 11:26; Matheo 16:18; Johane 10:28;30; Dipesalome 129:15; 1 Johane 3:14; 19-21; 2 Bakorinthe 13:5; Baroma 8:10; Dipesalome 23:6; 1 Bakorinthe 1:8, 9; Johane 10:28; 1 Johane 2:19; 1 Petero 1:5.

55. Potso: O itse eng ka ga kopano ya baitshepi?

Karabo: *Lwa ntlha* ke itse gore badumedi botlhe, mongwe le mongwe wa bone ke tokololo ya ga Morena Jesu Keresete, mme ba na le seabe mo matlotlong a gagwe. *Lwa bobedi* ba na le go ikitse fa ba na le go dirisetsa poloko ya ba bangwe dineo tsa bona; mme ba supa seo ka tebogo le ka boipelo.

Buisa: 1 Johane 1:3; Baroma 8:32; 1 Bakorinthe 12:12, 13; 6:17; 12:21; 13:1,5; Bafilipi 2:4, 8.

56. Potso: O dumela eng ka ga boitshwarelo jwa dibe?

Karabo: Ke dumela gore Modimo, ka ntlha ya tefelego ya ga Keresete o ka se tlhole a rata go gopola bolelele jwa me, le fa e le yona tlhago ya me e e sekametseng boleong; eo ke tshwanetseng go e lwantsha mo botshelong jotlhe jwa me. Mme ka kutlwelobotlhoko o nnaya tshiamo ya ga Keresete, gore ke se tlhole ke atlholwa ke Modimo.

Buisa: 1 Johane 2:2; 1:7; 2 Bakorinthe 5:19; Baroma 7:22;25; Jeremia 31:34; Miga 7:19; Dipesalome 103:3, 10, 12; Johane 3:18; 5:24.

TLHALOSO (ka dikai)

1. Kereke e boitshepo, e e ka gotlhe, ya Bokreste ke *badumedi botlhe ba nnete* (Buisa Sontaga sa bo 1), kgotsa bakgetwa ba *dipaka* le *ditulo tsotlhe* - ba kereke nngwe le nngwe.
2. Le fa ka mo ntle re bona *dikereke tse di ntsi, badumedi ba nnete ke bongwefela* jo bo

sa bonweng, gonne botlhe ba bofeletswe mo go Kreste, eleng *Tlhogo*, ka *tumelo* ya nnete. Kreste ke *Tlhogo*, mme bona ke *mmele*.

3. Dikereke tse di ntsi tseo re di bonang ka matlho, ke ka ntlha ya sebe. Nnete ya Modimo e botlhokwa go feta dikereke tseo re di bonang ka matlho tse dintsi.
 4. Buisa *Boipolelotumelo jwa Nederland Art. 29*, mme o utlwe gore kereke ya nnete e bonwa ka eng.
- B.
1. *Bagaledi* ke batho bao ba kgethegileng, e le *leruo* la Morena. Ba ga laleditswe jaaka *leruo* la Morena.
 2. Ba galaleditswe mo go Kreste, ka gonne a ba dueletse dibe tsa bona.
 3. Ke *babidiwa ba ba boitshepo*, gonne ba tshwanetse go phela ka metlha ka kgalalelo.
 4. Fa re galaleditswe mo go Kreste, re tshwanetse go ratana, mme re bontshane lerato le.
 5. Gatweng ka ga lerato mo go *1 Johane 2:4-11*
- C.
1. Re na le *molato ka metlha* fa pele ga Modimo. Le fa re le badumedi, re tshwanetse go lwantshana le sebe mo lefatsheng ka metlha yotlhe.
 2. Fela ka ntlha ya *dipogo tsa ga Kreste*, Modimo ore tshwarela dibe tsa rona.
 3. Ke ka moo Modimo ore fang *tshiamo ya ga Kreste*. Le fa re le *phoso*, re *attholelwa tshiamo*, ka gonne Kreste, Moemedi wa rona, a *se na molato*.
 4. Buisa *Sakaria 3* – o utlwe gore ga tweng ka ga kgang é.
 5. Kreste Ene mo go *Johane 3:18* a reng ka ga kgang é?

SONTAGA SA BO 22

57. Potso: Kgomotso ya gago mo tsogong ya mmele ke eng?

Karabo: Ke gore: ga se moya wa me fela o tlaa tsosediwang morago ga botshelo jo go nna le Keresete Mong wa one; mme one mmele wa me o tlaa tsosiswa ke thata ya ga Keresete, mme o tlaa kopanngwa le moya wa me, le go nna go tshwana le mmele e e galaleditsweng wa ga Keresete.

Buisa: Luka 16:22; 23:43; Bafilipi 1:21, 23; Jobe 19:25, 26; 1 Johane 3:2; Bafilip 3:21.

58. Potso: Ke kgomotso efe e o nang nayo mo go reng: "Botshelo jobosa khutleng?"

Karabo: Ke ka gobo, ka gonne jaanong ke ikutlwa mo pelong tshimologo ya boitumelo jo bo sa khutleng; morago ga botshelo jono, ke tla rua poloko e e tletseng e e sa bonweng ka matlho le fa e le go utlwiwa ke tsebe epe kgotsa go tswa mo pelong ya motho; ke tle ke galaletse Modimo ka bosakhutleng, polokong eo.

Buisa: 2 Bakorinthe 5:2, 3; 1 Bakorinthe 2:9.

TLHALOSO (ka dikai)

- A.
1. *Mewa ya badumedi*, gosweng ga yona, e ya, *ka yona nako eo* (dadelik), ko go Kreste ko kgalalelong ya *legodimo*.
 2. Motlhang Kreste a tlang, *tsogo ya mebele* e tlaa diragala.
 3. Mmele le moya wa modumedi, di kopana gape, mme di tlaa phela mo kgalalelong le Kreste, mo lefatsheng le letsha.
 4. Mebele le mewa ya *ba ba sa dumeleng*, di tla kopana gape, mme di tla latlhelwa mo *mollong wa dihele* o o sa feleng.
 5. *Buisa Tshenolo 20:11 - 15* - gatweng ka ga tsogo ya bafu le katlholo ya bofelo.

6. Buisa Tshenolo 21:1-8 - gatweng ka ga legodimo le letsha?

- B. 1. Botshelo jo bo sa khutleng bo simolla gona mo botshelong jo. (Johane 6:47) "Yo o dumelang mo go nna o na le botshelo jo bo sa khutleng." Ke eng seo se dirang gore o bone botshelo jo bo sa khutleng mo botshelong jono?
2. Morago ga botshelo jo, re amogela gape *tshegofatso e e tletseng*, ka gonne, kutlobotlhoko, le sebe di re fetile ka bo sa khutleng, ka gonne re tla be re le mo Moreneng ka bosakhutleng, go mo direla ego mo rorisa.
3. Gatweng ka ga tshegofatso e e sa feleng mo go I Bakorinthe 2:9 le II Bakorinthe 5:1?

SONTAGA SA BO 23

59. Potso: Go thusa eng go dumela mo go tse tsotlhe tse?

Karabo: Ke ka gobo: ka ntlha ya ga Keresete ke siamisitswe fa pele ga Modimo, mme e bile ke dirilwe mojaboswa jwa botshelo jo bosakhutleng.

Buisa: Habakuke 2:4; Baroma 1:17; Johane 3:36.

60. Potso: O siamisitswe jang fa pele ga Modimo?

Karabo: Ke ka ntlha ya tumelo mo go Morena Jesu Keresete fela; gore le fa ka bo ga me nka ingongoregela gore ka kganetsanyong le melao ya Modimo, mme ke o leofetse mo go boitshegang, one, ga o nnyatse ka gope. Le gona le fa ke ka bo ke ineetse mo tsheyegong ka botlalo, Modimo o ntse o nkeme tlhakoreng ka gale. Mme ka ntlha ya kutlwelobotlhoko le tshiamo le boitshepo jwa ga Keresete ke amogetswe. Mme ke ntse jaaka e kete ke weditse kutlo yotlhe jaaka Keresete a di ntiretse, ke ka moo ke nang le go amogela tsotlhe ka tumelo.

Buisa: Baroma 3:21, 22, 24; 5:1,2; Bagalata 2:16; Baefoso 2:9; Bafilipi 3:9; 7:23; Tito 3:5; Doiteronomio 9:6; Esekiele 36:22; Baroma 3:24; Baefoso 2:8; 1 Johane 2:2; 2:1; Baroma 4:4; 2 Bakorinthe 5:19; 5:21; Baroma 3:22; Johane 3:18.

61. Potso: Ke ka ntlha ya eng fo o re, o siamisitswe ka ntlha ya tumelo fela?

Karabo: Ga se gore ke ka ntlha ya botlhokwa jwa tumelo ya me ke kgatlha Modimo, nyaa; mme bogolo jang ke ka tefelelo le tshiamo le boitshepo jwa ga Keresete ke ntlafalwang fa pele ga Modimo ka tsona. Le gore ke palelwa ke go e amogela le go ituella yona ka tsela e sele fa e se ka tumelo fela.

Buisa: 1 Bakorinthe 1:30; 2:2; 1 Johane 5:10.

TLHALOSO (ka dikai)

- A. 1. Tsotlhe tse re di dumelang, ke tsotlhe tse di akareditsweng mo di-Artikeleng tse di lesome le bobedi tseo re se tseng re di buisitse.
2. Ka jalo, ka ntlha ya tumelo, ke amogela:
- (a) Tshiamo fa pele ga Modimo; ke gore ke tlhagelela ke se na molato ka baka la ga Krete.
- (b) Botshelo jo bo sa khutleng e le boswa; ke gore jaaka ngwana wa ga Rraetsho wa Magodimo, ke amogela botshelo jo bo sa khutleng jaaka boswa.
3. Wena, jaaka ngwana wa kgolagano (selekane), a o na le tshwanelo le tshiamelo ya go kopa seabe sa boswa jo?
- B. 1. Karabo e na le dikarolo di le pedi tseo o tshwanetseng go di gakologelwa:
- (a) Gore o tle o siame fa pele ga Modimo, o tshwanetse go dumela mo go Jesu Krete.
- (b) Ke ka ntlha ya kutlwelobotlhoko le tshiamo le boitshepo jwa ga Krete fela gore ke

siamelwe fa pele ga Modimo - eseng ka gore nna ke siame, ke boitshepo, ke dira tse di siameng – Nyaa!!!

2. Paulo a reng ka ga se mo go Baroma 3:21-24?
 3. Go siama fa pele ga Modimo ga se gore rona ka borona, re tlhwekile, re tlhomame. Re tlaa be re le ba ba itaolang mo dilong tsa ba bangwe jaaka Bafarasai.
 4. Letshwao tota la pharologanyo la mosiami fa pele ga Modimo ke gore a itse dibe tsa gagwe le ditlalelo tsa gagwe. (Letswalo) Segakolodi sa gagwe se mo latofatsa-ka dibe tse a di dirileng le kafa ditshekamelong tsa dibe (maleo) tseo di santseng di mo kgomare tse.
 5. A go a tlhokega gore o itse (maleo) dibe tsa gago le ditlalelo tsa gago go ka nna le seabe mo kgomotsong, mo botshelong le mo go sweng?
 6. Ga re tshwanelwe ke tshegofatso é ya rona; re e amogela fela ka ntlha ya kutlwelobotlhoko; ke gore re amogela sengwe seo se sa re tshwanelang.
 7. Le fa go ntse jalo, re amogela tshiamo e e tletseng gonne é tshwanela Krete ka botlalo.
 8. Seatla seo ke amogelang neo e ya ga Krete ya kutlwelobotlhoko ka sona, ke tumelo.
 9. Go amogela tumelo go tswa kae?
- C. 1. Tlhokomela, modumedi, gore o se ke wa ikgodisa gonne ó dumetse. Ga o dumele ka ntlha ya gore ó le botoka go gaisa batho ba bangwe.
2. Kwa ntle ga tumelo, motho ga a kitla a maogela tshiamo go tswa go Modimo - fela jaaka o ka se ka wa kgona go tshwara sengwe o se na seatla.
 3. Ka jalo, o tlhoka tumelo; fela tumelo ka boyona ga se tuelo.
 4. Pawulose a reng ka ga se mo go Baefese 2:8, 9?

SONTAGA SA BO 24

62. Potso: Go tla jang gore ditiro tsa rona tse di molemo di tlhoke tshiamo fa pele ga Modimo kgotsa go ka nna seabe sa tshiamiso ya me?

Karabo: Ke ka gonne tshiamo e e ka tshokelang katlholo ya Modimo e tshwanetse ya bo e le e e itekanetseng ka botlalo; mme e dumelelane le molao wa Modimo gotlhelele; gape le gore ditiro tsotlhe tsa rona tsa botshelo jono, tsotlhe di se botlalo mme di aparetswe ke boleo.

Buisa: Bagalata3:10; Doiteronomio27:16; Jesaya 64:6.

63 Potso: Go tla jang gore ditiro tsa rona tse di molemo di se na tuelo etswa Modimo o solofeditse tuelo jaanong le botshelo jo bo tlang.

Karabo: Ke ka gobo tuelo e, e sa tswe mo tirelong, mme e tswa mo bopelotlhomoging.

Buisa: Luka 17:10.

64. Potso: A mme jaana seo ga se rute batho tlhokomologo le boikepo?

Karabo: Nyaa, gonne ga go kgonege gore mongwe yo o tlhomilweng mo go Keresete ka tumelo ya nnete a ka tihoka go medisa maunga a tebogo.

Buisa: Matheo 7:18; Johane 15:5.

TLHALOSO(ka dikai)

A. Ga se ka me tlha re ratang gore gotwe ditiro tsa rona tse di siameng ga di na mosola fa pele ga Modimo, gonne bofarasai bo tletse mo go rona. Ditiro tse di siameng fa pele ga Modimo di tshwana le *tshetele ya. maaka*, kgotsa seaparo se se *onetseng*. Fa pele ga

Modimo ga se sireletse dibe tsa rona.

- B. Ee, ke nnete Modimo oa duela, o ie-bogela ditiro tse di molemo (Kwalolla Matheu 25:21, 23).

Modimo o duele ka moahu/kutlwelobotlhoko, mme e seng ka *ditiro* tsa rona, ka gonne:

- (a) Tsona ditiro tse di molemo tse, ka botsona e setse e le maungo a *mohau/kutlwelobotlhoko*. Ka jalo re ka kgona go dira *ditiro tse di molemo* fa e le gore re tsetswe sesa ka Moya wa Modimo . . . ditiro tse di molemo ke ditiro tsa Modimo mo go rona.
- (b) Ditiro tsa rona tse dintlente ga di a *tlala* (is onvolkome) ebile ga di a *tshwanelwa ke tuelo* (verdien geen beloning nie). Tuelo fa e le teng, e sala e ntse e le ya *mohau* (genadeloon).
- C. Gantsi batho ba botsa jaana: "Go thusang gore ke dire, fa ditiro tsa me di sa tshwanelwe ke tuelo ka gope?" Go rialo ba bona go se na molato fa o *amogela tsotlhe mahala*. Beibele ya re: Ka gonne ke amoge tse tsotlhe mahala, jaanong ke dira tsotlhe ka tebogo. Buisa gape *Luka 7:36-47*. Seno se re ruta gape jaana gore ke tshwanelo gore modumedi wa nnete a nne le ditiro tse di molemo fa pele ga Modimo, mme e le *tshupo ya tebogo* - e le leungo la seo modumedi a leng sona - o *tshwanetswe ke go leboga Modimo ka ditiro tse*. Gore setlhare sa leungo se bonwe gore ke sona tota, se bonwa ka goenya leungo leo; ga sena tuelo epe me go sona. Se tshwanetse go enya leungo. Le modumed fela jalo; a Leboga Modimo ka Tsona.

Buisa gape: Matheu 7:1-20 (Thatathata 15-20); Johane 15:1-8.

SONTAGA SA BO 25

KA GA DISAKARAMENTE

- 65. Potso:** E re ka e le ka ntlha ya tumelo fela re nang le seabe mo maungong a ditiro tsa ga Keresete, jaanong tumelo ya go nna jalo e tswa kae?
- Karabo:** E tswa mo Moyeng o o Boitshepo; ona o jala tumelo mo pelong tsa rona ka thero ya Efangele e e boitshepo -mme o e nonotshe ka tiriso ya disakaramente.
- Buisa:** Baefoso 2:8; 6:23; Johane 3:5; Bafilipi 1:29; Matheo 28:19; 1 Petoro 1:22, 23.
- 66. Potso:** Disakaramente ke eng?
- Karabo:** Ke dikano le matshwao a a boitshepo a a bonalang a a tlhomamisitsweng ke Modimo gore fa re ka a dirisa, *re tle re utlwisise tsholofetso ya Efangele ka botlalo*. Go rialo gore: Modimo o re itshwaretse dibe ka ntlha ya setlhabelo sa ga Keresete se se dirafetseng sa ba sa wediwa o sefapaanong, wa re abela botshelo jo bosakhutleng, ka bopelotlhomogi.
- Buisa:** Genesi 17:11; Baroma 4:11; Doiteronomio 30:6; Lefitiko 6:25; Bahebera 9:7, 9; 24; Esekiele 20:12; Jesaya 6:6,7; 54:9.
- 67. Potso:** A jaanong Lefoko le disakaramente di tlhomamiseditswe go re kaela setlhabelo sa ga Jesu Keresete kwa sefapaanong fa e le yona motheo wa poloko ya rona?
- Karabo:** Ee, ruri Moya o o Boitshepo o re ruta mo Efangeding mme o re tlhomamisetsa jalo ka disakaramente gore poloko e e tletseng ya rona e thailwe mo setlhabelong sa ga Keresete, e re e weleditsweng kwa sefapaanong.
- Buisa:** Baroma 6:3; Bagalata 3:27.
- 68. Potso:** Keresete o tlhomamisitse disakaramente di le kae mo Kgolaganong e Ntsha?
- Karabo:** O tlhomamisitse disakaramente di le pedi, e bong kolobetso e e boitshepo le selalelo se se boitshepo.

TLHALOSO (ka dikai)

A. Motho, o kgona go dumela fela ka ntlha ya gore Moya o Boitshepo e le Ona o go fang tumelo. Moya ó, ka boona, o dirisa *didiriswa* go dirisana le tumelo mo dipelong tsa rona.

Ela tlhoko - Moya ó, ke oo Krete a re tlogelletseng ona, go nna MOEMEDI WA RONA. O dirisa BARERI ba Lefoko le Ona, mme o nontshe sé ka DISAKARAMENTE.

Buisa: Ditiro 8:26-40; 16:13,14; Baefeso 2:8; Matheu 28:19; 1 Petero 1:22,23.

Gantsi tumelo e *bohowa* mme e fenngwa ke *tiabolo*, dithaelo tsa lefatshe, le dipelo tsa rona tseo di tletseng sebe. Ka jalo-Modimo o tiisa/kwentsha tumelo ya rona ka go dirisa **DIDIRISWA TSA MOHAU**, ebong:

(a) THERO YA EVANGEDI (BEIBELE)

(b) TIRISO YA DISAKARAMENTE

Ka jalo go a itlhalosa gore kwa ntle ga EVANGEDI le DISAKARAMENTE, tumelo ya rona e ka koafala, mme la bofelo ya swela ruri. Tseno tse re tshwanetse go di dirisa ka metlha yotlhe mo botshelong jwa rona. Ka mantswa a mangwe, Evangedi le Disakaramente, ke *dijo tsa tumelo*.

B. DISAKARAMENTE: Lefoko lé, ga le tswe mo Beibeleng, mme le kaya *dimakatso* kgotsa *sephiri*. Ke matshwao ao a botshang *setlhabelo sa ga Krete mo sefapanong*, ebong:

(a) **METSI** - mo kolobetsong a bontsha madi a Gagwe ao a re tlhatswang dibe.

(b) **SENGWE LE VEINE MO SELALLONG** - di bontsha mmele wa gagwe o o robetsweng rona, le madi ao a tsholletsweng rona.

Gape DISAKARAMENTE ke matshwao (ditempe) a nnete, a Modimo mo baneng ba Ona.

Mo Testamentang ya Kgale, go ne go diriswa matshwao afe mo boemong jwa Kolobetso le Selallo?

Buisa: Genese 17:9-12; Baroma 4:11; Doiteronomio 30:6; Bahebera 9:7.

SONTAGA SA BO 26

KA GA KOLOBETSO E E BOITSHEPO

69. Potso: O bontshiwa lego tlhomamisediwajang ka kolobetso e e boitshepo gore setlhabelo se le sengwe sa ga Keresete se se dirafetseng kwa sefapoonong se go siametse?

Karabo: Ka kolobetso ke lemosiwa gore Keresete .o tlhomamisitse tlhapisokgolo e, mme mo go yone o bile o solofetsa gore kgotlelego ya moya wa me e tlhatswitswe ke madi a gagwe le Moya wa gagwe, moo go raya gore: ke ntlafadditswe mo dibeng tsa me tsotlh'e jaaka e kete ke tlhatswitswe mo metsing a a tlosang leswe la mmele.

Buisa: Matheu 28:19; Mareko 16:16; Ditiro 2:38; Johane 1:33; Matheu 3:11; Baroma 6:3, 4; 1 Petero 3:21; Mareko 1:4; Luka 3:3.

70. Potso: Go raya eng fa go tse: Go tlhatswiwa ka madi le ke Moya wa ga Keresete?

Karabo: Go raya kamogelo ya itshwarelo ya dibe go Modimo ka bopelotlhomogi, e le ka ntlha ya madi a ga Keresete a o a re tshololetseng kwa sefapaanong fa a *intsha setlhabelo*; gape le gore re itshepisiwe ke Moya o o Boitshepo go tla re ipelela go nna ditokololo tsa ga Keresete; e le gore dibe di tle di nyelele, mme rona re itshelele mo botshelong jo bo sa nyatsegeng.

Buisa: Bahebera 12:24; 1 Petero 1:2; Tshenolo 1:5; 7:15; Sakaria 13:1; Esekiele

36:25; Johane 1:33; 3:5; 1 Bakorointhe6:11; 12:13; Baroma 6:4; Bakolose 2:12.

71 Potso: Keresete o re solofeditse kae gore o rata go re tlhatswa ka madi a gagwe le ka Moya wa gagwe - jaaka fa re itlhatswa ka metsi a kolobetso?

Karabo: O re solofeditse motlhang go tlhomamisiwang kolobetso, fa go ne go twe: "Ka moó he, yang lo dire merafe hotlhe barutwa, lo ba kolobetse mo leineng la Rara le la Morwa le la Moya o o Boitshepo (Mat. 28:19) – mme yo o dumelang a ba a kolobediwa, o tlaa pholosiwa (Mareko 16:16). Tsholofetso e e umakwa gangwe le gape, le gongwe le gongwe mo Beibeleng fa go buiwang ka ga kolobetso teng fa e le tlhapisetso ya botsalwagape le nilafatoo mo dibeng; Tito 3:5; Ditiro 22:16.

TLHALOSO (ka dikai)

A. Metsi mo kolobetsong ke letshwao fela leo le kaelang ko *mading* le ko *moyeng* wa ga Kreste. Tiro ya *metsi* mo mmeleng wa motho ke go *tlhatswa* tshila ya mmele fa o le leswe. Mme *tshila ya moya wa rona* yona e phepafatswa ka *madi le Moya* wa ga Kreste.

Lemoga!! Metsi mo kolobetsong ga se ona a *tlhatswang* dibe tsa rona. Ka jalo, go a itlhalosa gore ga go tlhokafale gore mo kolobetsong motho a tsene ka mmele otlhe. (Buisa Johane 13:9. 10).

B. Metsi ga se pontsho/sesupo fela, mme gape ke *letshwao la nnete* - ke netefatso. Ke gore fela jaaka fa o netefatsa, o bona *tsamaiso* ya kolobetso, le *dibe tsa gago ka nnete* di tlhatswitswe ka *madi le Moya wa ga Kreste*. Go ya ka fa Beibeleng (Baroma 9:6-18) ga se botlhe bao ba kolobeditsweng ba leng lesego - nyaa - go ya ka fa Modimo o ratang ka teng.

C. *Go tlhatswiwa ka Moya wa ga Kreste*: Lemoga, le fa o itshwaretsewe dibe tsa gago, ga se *gore ga o tlhole o na le sebe*, ka gonne tshila ya sebe yona e santse e kgomaretse mo go wena, mme wena o sekametse ko sebeng. Tlhatsuwo e ya tshila ya sebe ka Moya o boitshepo, ke tiragalo ya botshelo jotlhe. Moya o, o re natlafatsa gore re tle re kgone go lwantshana le sebe, mme re se fenyê, se fêlê, se swe. (Buisa Baroma 8:10-14).

D. *Tshepiso ya tlhatsuwo ka metsi a kolobetso*: Kreste o tshepisetse gore fa re kolobediwa ka metsi, ke gone fa re tlhatswiwa dibe tsa rona ka madi le Moya wa Gagwe ó Boitshepo. Seno o se tshepisetse fa a ne a laela barutwa ba Gagwe gore ba tsamae le lefatshe lotlhe, ba rere, mme bao ba dumelang, ba kolobediwe mo Leineng la Rara le Moya le Moya o Boitshepo (Buisa Matheu 28:19) - mme yo o dumelang, a kolobediwa, o tla bolokega (kgatlanong le sebe) mme yo o sa dumelerig, o tla atlholwa/otlhaiwa (Mareka 16:16).

E. *Lemoga!* Kolobetso e simoletsewe ke Johane wa Mokolobetsi. Pelepele go ne go kolobediwa baheitene bao ba neng ba amogela tumelo ya Sejuta. Mme go simolla ka Johane, *kolobetso ya tshokologo* go ya tshwarelong ya dibe, e ne ya diragala mo ga bona Bajuta bao ba neng ba sokologa, ba ipobola dibe tsa bone.

DITSEHISISO MO KOLOBETSONG

1. *Modimo Rara* o re tshepisa *kgolaganyo ya mohau ya bosakhutleng*, mme re nna bana le majaboswa a Gagwe, mme O tla re direla tsotlhe ka molemo.
2. *Modimo Mora* o tshepisa gore o re tlhatswa dibe tsa rona tsotlhe ka madi a Gagwe.
3. *Modimo Moya O Boitshepo* o tshepisa go aga mo go rona, o re golaganya le Kreste ka tumelo; tsotlhe tsa tshiamo tsa ga Kreste e nne tsa rona; go re phepafatsa le go re galaletsa gore re tlhagelle fa pele ga Modimo re se na tshila.

TSEO MODIMO O DI BATLANG MO GO RONA MO KOLOBETSONG

1. Gore re amogele/tshegetse ditsholofetso tsotlhe tsa Gagwe mo kolobetsong.
2. Gore re phele ka kutlo go Ona Modimo/Re tshegetse melao ya Gagwe.
3. Gore re mo rate go feta tsotlhe ka dipelo tsa rona tsotlhe, le ka moya otlhe, le ka

kelello/kgopolo yotlhe, le ka thata yotlhe (Matheu 22:37-40). (Batla taolo e, ma go O.T.)

SONTAGA SA BO 27

- 72. Potso:** A jaanong tlhapiso ya bo ka fa ntle jwa mm'ele ke yoha ntlafatso mo dibeng?
- Karabo:** Nyaa, mme madi a ga Morena Jesu Keresete le Moya o o Boitshepo ke tsona fela di re ntlafatsang mo dibeng tsotlhe tsa rona.
- Buisa:** Matheo 3:11; 1 Petero 3:21; Baefeso 5:26; 1 Johane 1:7; 1 Bakorinthe 6:11.
- 73. Potso:** Ke ka ntlha ya eng fa Moya o o Boitshepo o re: kolobetso ke tlhapiso ya botsalwagape le ntlafatso dibeng?
- Karabo:** Modimo ga o rialo kwa ntle lebaka lepe. Mme o re ruta ka ntlha e go re: Fela jaaka kgotlelego ya mebele ya rona e tlhatsiwa ka metsi, le dibe tsa tona di tlhatswiwa ka madi a ga Keresete le ke Moya wa gagwe, mme re di ltseditswe ruri. Mme bogolo jang re itse gape go re: Ka ntlha ya peeletso e e bomodimo le matshwao a nnete, o re tlhomamisetsa fa ruri re ntlafatditswe mo dibeng semoya ga feta fa re tlhatswitswe mebele ka metsi.
- Buisa:** Tshenolo 1:5; 7:14; 1 Bakorinthe 6:11; Mareko 16:16; Bagalata 3:27.
- 74. Potso:** A bana ba bannye le bone ba tshwanetse go kolobediwa?
- Karabo:** E, ka gonne le bone ba ntse ba tshwana fela le bagolo mo Kgologanong ya Modimo le mo go balelelweng mo phuthegong ya ona. Le gone ga ba ngotlafadiwe ka gope ka go farologanngwa le baagolo mo tsholofetsong ya kgololo mo dibeng ka madi a ga Keresete, le Moya o o Boitshepo, ona o o bopang tumelo. Ke ka ntlha eo le bone, ka kolobetso e e leng lotshwao lwa Kgologano mo go bone, ba ka nang le go tsena mo kerekeng ya Bokeresete mme ba kgaoganngwa le bana ba beheitane jaake go ne go dirwa mo metlheng ya Kgologano e Kgologolo ka bogwera - jo ga jaana mo Kgologanong e Ntsha bo emetsweng ke kolobetso.
- Buisa:** Genesi 17:7; Matheo 19:14; Luka 1:15; Dipesalome 22:11; Jesaya 44:1-3; Ditiro 2:39; 10:47; Genesi 17:14; Bakolose 2:11,13.

METSI MO KOLOBETSONG

Kolobetso e tshwanetse go dirwa ka metsi (Buisa Matheu 3:16; Ditiro 10:47). A re lemoge gore seno se ka dirwa ka *go kgatshwa fela* kgotsa ka *go tompunyetswa mo metsing*. Go bangwe bao ba reng *Kolobetso tota* ke go tompunyetswa mo metsing, mme moo re kgatlanong ka *mabaka a a latelang a:*

1. Ga se metsi a kolobetso ka bo-ona a tlhatswang dibe. Metsi mo kolobetsong ke sesupo fela/setshwantsho go madi a ga Krete ao e leng ona a re tlhatswang dibe. Ka jalo, mo kolobetsong, a metsi a mantsi kgotsa a mannye, ga se se se tshwenyang.
2. Ntlha eo e supang ka ga kolobetso (tlhatsuo ka madi a ga Krete) e bidiwa mo Beibeleng, go kgatshiwa ka madi a ga Krete (Buisa/ithute Esekiele 36:25; Baheberu 11:28; 12:24; 1 Petero 1:2).
3. Le fa ko tshimologong kolobetso e ne dirwa ka go tompunyetswa mo metsing, morago ga Krete re bona kolobetso e diragala le mo go bao ba kulang, mme ba kgatshwa ka metsi.

GO KOLOBEDIWA BOMANG?

1. Go bagolo bao ba dumelang.

Kolobetso e diragala mo bagolong ba ba dumelang mme ba sokolaga (Ditiro 8:38; 10:47).

2. Go bana ba badumedi

Mabaka magolo ke a:

- A. Mo Kgolagonong e Ntsha re bona *malapa* ao a neng a kolobediwa (Ditiro 10:47, 48; 16:15; 16:33; 18:8; 1 Bakorinthe 1:19).
- B. Bana ba badumedi le bona ba wela mo kgologanong ya mohau (genadeverbond), mme ditshepiso tseo Modimo o di tshepising mo kgolaganong ya mohau, *Modimo o di tshepisa le bona bana ba badumedi. (Buisa Ditiro 2:39, ka tlhogo).*
Ke ka moo bana le bona ba tshwanetseng go amogela kolobetso jaaka *letshwao la kgologano*. Bana ba badumedi ba *kgethegile*, ke-bana ba Modimo, gonne batsadi ba bona e le badumedi (Buisa 1 Bakorinthe 7:14).
- C. **GO RUPISA:** e ne e le letshwao la *kgolagano* (gareng ga Modimo le motho), mo *letsatsing la BOROBEDI*. Mme kolobetso e tsile/tlile boemong jwa GO RUPISA. (Buisa Bakolose 2:11, 12). Ka jalo go a itlhalosa gore *le bona bana ba tshwanetswe ke kolobetso*.
- D. Gape mo Kgolagonong e Kgologolo, kolobetso e bonelwapele, e a lemotshega, *fa Israele a ne a tshela Lewatle le le Shibidu* (1 Bakorinthe 10:2). Mo tiragalong eo, *bana ba ne ba le teng*. Ka jalo bana ba tshwanetswe ke kolobetso.

GO KOLBEDIWA LENG?

Go ya ka thuto ya Gereformeerde, kolobetso e tshwanetse go dirwa ka pelepele ka fa go kgonagalang. *Mabaka ke a:*

- A. Gagologolo kolobetso ke *sengwe gareng ga Modimo le ngwana* mme go se nne le *mabaka mangwe a malapa*, ao a ka diyang kolobetso. Modimo o rata go bontsha kgolagano ya Ona mo ngwaneng ka KOLOBETSO, mme ga re a tshwanela go nyenyefatsha Modimo, le go diya tshegofatso ya Modimo mo ngwaneng.
- B. Ngwana o bonwa ka thato ya Modimo, mme o tshwanetse go busediwa gape go Modimo ka tebogo ka pele mo go kgonagalang, gore Modimo o tshwaye kgolagano ya One le ngwana.
- C. Kgalefo ya Modimo go bao ba neng ba tlhokomologa go rupisa e ne e le kgolo tota. Modimo O ne a rata go bolaya Mose ka lebaka le. (Buisa Eksoda 4:24-26). Ka jalo le gompiono, mo kolobetsong, boemong jwa go rupisa, kgalefo eo e tla nna teng mo go bao ba diegelang KOLOBETSO.

LEMOGA Ka ntilha ya mabaka a a boletsweng a, ga go na letsatsi leo le kgethetsweng dikolobetso fela mo kerekeng ya Gereformeerde.

GO KOLOBEDIWA KAE?

- A. Moo lekgotla la kereke le leng teng go ka tlhokomela Disakramente tsotlhe di direlwa mo tlhokomelong ya lekgotla - Ka jalo kolobetso, le fa e ka direlwa ko lapeng, lekgotla le setlhopha sa baphuthego le tshwanetse go nna teng.
- B. Kolobetso ke segopotso/segakolodi go bao ba setseng ba kolobeditse, gore le bone ba ikgotse ditshwanelo tsa kolobetso.

Ka jalo ke tshwanelo gore kolobetso e direlwe mo phuthengong, eseng ko malapeng.

SONTAGA SA BO 28

KA GA SELALELO SE SE BOITSHEPO

75. Potso: O botsdhiwa o bo o tlhomamisediwa jang mo Selalelong gore o na le kabelano mo setlhabelong se se sosi sa ga Keresete se se neng sa wediwa kwa sefapaanong - le mo go tsotlhe tsa gagwe?

Karabo: Nna, mmogo le badumedi bothle re laelwang ke Keresete go mo gopola fa re ja senkgwe se se ngathogantsweng; le go nwa senwelo. A ba a solofela a re:

Ruri, mmele wa gagwe o ntlhabetswe mo sefapaanong le madi a gagwe a ntshologetswe mo jaanong ke bona ka matlho - e bong senkgwe sa go Mong wa me se ke se robelwang, ke be ke Abelwa senwelo sa gagwe. Le gore jaaka ke amogela senkgwe le senwelo sa Morena go tswa diatleng tsa moruti go se ja ka molomo - e le ditshupo tsa nnete tsa mmele le madi a ga Keresete - ruri, ene ka sebele, o tlaa fepa moya wa me go isa botshelong jo bo sa khutleng ka mmele wa gagwe o o bapotsweng le madi a gagwe a a tsholotsweng.

Buisa: Matheo 26:26-28; Mareko 14:22;24; Luka 22:19-20; I Bakorinthe 10:16/17; 11:23,25; 12 -13.

76. Potso: Mafoko a a reng: Go ja mmele o o bapotsweng wa ga Keresete le go nwa madi a gagwe a a tshologileng, a raya eng?

Karabo: Moo go raya go re: Go dumela dipogiso tsotlhe tsa ga Keresete, le loso lwa gagwe, ga se, gone fela mo go ka re isang itshwarelong ya dibe le botshelong jo bosakhutleng. Godimo ga moo, ke ka Moya o o Boitshepo o o leng mo go Keresete le mo go rona - o ka re agisanyang ka mmele wa gagwe o o boitshepo; gore le mororo Keresete a le kwa legodimong mme rona re le mo lefatsheng, re ntse ré le nama ya nama ya gagwe, le lesapo la masapo a gagwe; le gore jaaka ditokololo tsa mmele o le mongwe re tla phela le go busa ka bosakhutleng.

Buisa: Johane 6:35, 40, 47-56; Bakolose 3:1; Ditiro 3:21; 1 Bakorinthe 11:26; Baefeso 5:29, 30; 3:16; 1 Bakorinthe 6:15; 1 Johane 3:24; 4:13; Johane 6:57; 15:1-6; Baefeso 4:15, 16.

77. Potso: Keresete o solofeditse kae gore o tlaa fepa badumedi ka mmele wa gagwe le ka madi a gagwe ka go ja senkgwe se se ngathogantsweng le ka go nwa senwelo se se tshetsweng?

Karabo: O ne a solofetsa jalo ka motlha wa tlhomamiso ya selalelo (1 Bakorinthe 11:23-26) mo go tweng: "Morena Jesu o ne a tsaya senkgwe mo bosigong jo o tshwarisitsweng ka jona, a se lebogela, a se nathoganyana a re: Tsayang lo je! Se ke mmele wa me o o neelwang losong boemong jwa lona. Dirang jalo go nkgopola. A na a tsaya senwelo jalo morago ga selalelo a re: Senwelo se ke kgolagano e ntsha ka madi a me. E ne e re fa loo nwa ka sona, lo dire jalo go nkgopola. Gonne ka gale, fa loo ja senkgwe se le go nwa senwelo, lo a bo lo itsise loso lwa Morena, go ya a ba a tle."

Tlhomamiso e e boa e boelelwa ke moapostolo Paulo mo go 1 Bakorinthe 10:16, 17 mo a reng: "Senwelo sa tshegofatso se re se lebogelang, a ga se go nna le kabelo mo mading a ga Keresete le go kopanngwa nao? Le senkgwe se re se nathoganyang, a ga se 'gonna le kabelo mo mmeleng wa ga Keresete? - rona ba re leng bantsi re mmele o le mongwe fela; ka gonne rona rotlhe re tlhakanela senkgwe se le sengwe fela."

Buisa: Matheo 26:26-28; Mareko 14:22-24; Luka 22:10, 19, 20.

SELALLO

1. TLHOMISO YA SELALLO

Se tlhomamisitswe ke Krete (Buisa Matheo 26:17-30; Mareka 14:12-25; Luka 22:7-23; 1 Bakorinthe 11:23-29).

2. SELALLO JAAKA LETSHWAO/SESUPO

Senkgwe seo se rojwang, le weine eo e tshollwang ke ponthso ya *mmele le madi* a ga Krete (mmele o o *robilweng* le madi ao a tsholotsweng a ga Krete). Seo ke sesupo sa gore (mo go nna) fela jaaka *senkgwe se robiwa* le *weine* e tshollwa fa pele ga me, go diragetse fela jalo le

ka mmele wa ga Kreste (o o robilweng) le madi a Gagwe (ao a tsholotsweng) gore dibe tsotlhe tsa rona di itshwarelwe.

3. SELALLO JAAKA SETEMPE/NETEFATSO

Fela jaaka fa o netefatsa/o bona go diragala jalo ka senkgwe seo se robiwang le weina e e tsholwang, (e e nowang) go *nnete* fela jalo ka mmele wa ga Keste o o robilweng, le madi a Gagwe ao a tsholotsweng, gore dibe tsa rona tsotlhe di itshwaretsewe.

4. SELALLO JAAKA SEGOPOTSO SA NAKO YA DIJO/GO JA

Selallo se tshwanetse go re gopotsa ka ga *dipogo tsa go itshwerelwa* le loso lwa ga Kreste. Fa o le modumedu tota, ga wa tshwanela go lebala se le ka motlha ope. Kreste, ka moo, o rile: "DIRANG JALO GO NKGOPOLA" (*Bolela gore ke mo kae mo Beibeleng*).

5. SELALLO JAAKA POROFETO

Selallo ga se segopotso fela sa nako ya dijo; mme se re supetsa gape ko pele kwa moketeng wa lenyalo la kwana, o o santseng o tla (Buisa Tshenolo 19:7-9 sentle.)

Ke ka moo selallo se re supetsang ka teng botshelo jo bo sa khutleng le tshegofatso ya bana ba Modimo ka ntlha ya boinello jwa ga Kreste.

6. SELALLO JAAKA TIRO YA BOIPOLELO/BOIPOBOLO

Ka go dirisa selallo:

6.1 Ke *ipolela* fa ke le raoleofi; gore ke dumela fa Modimo ka Kreste otlha intshwarela; gore ke ikaeletse go utlwella Kreste, le go phela ka metlha go ya ka molao wa Modimo.

6.2 Ke ipobola/ke bolela/ke bontsha *bongwefela/kopano* le badumedi bangwe ka nna. (Lekwalo la Selallo la re - *rotlhe mmogo re mmele o le mongwe*). (Buisa 1 Bakor. 12:12-31 (Lemoga 25-27).

7. DIDIRISWA MOSELALLONG

Rona jaaka MaGereformeerde re dirisa SENWELO eseng *digalasyana* (kelkies) ka gonne:

7.1 Kreste o tlhomamisitse selallo jalo (KWALOLLA MATHEU 26:27).

7.2 Bongwefela, kutiwano le tirisano-mmogo, di itshupa sentle fa go diriswa senwelo se le sengwe, go na le *digalasyana*. Digalasyana di bontsha go *ikgetholla* (individualisties/individualistic) mme seno se kgatlanong thata le boleng jwa selallo.

8. GO JELWA KAE

Ka SeGereformeerde, "go jelwa botlhe mo tafoleng, eseng kwa ditulong. Mabaka:

8.1 Kreste o se tlhomamiseditse fa tafoleng. Kwalolla Matheo 26:20.

8.2 Kreste o se tlhomamisitse go tshwana le *nako ya dijo* (Matheo 26:26-28) mme fa go jelwa ko ditulong, maikutlo a *nako ya dijo* ga a tlhagelle.

8.3 Go jela kwa ditulong go ka tliša botlhaswa, ka gonne tlhokomelo (toesig) ya lekgotla la kereke ga e ka ke ya diragala sentle, go lemoga bao ba tshwanetseng le bao ba sa tshwanelang. (Buisa Sontaga sa bo 30 Katekisima ya Heidelberg).

9. GO IPAKANYETSA SELALLO

Ke selo sa botlhokwa thata gore motho a ipakanye pele a ya go dirisa selallo - Paulose o raya Bakorinthe a re: 1 Bakorinthe 11:28. Go itlhatlhoba go ya jaana:

9.1 Itse dibe tsa gago, ikotlhaye mme o di bolele fa pele ga Modimo.

9.2 Dumela gore dibe tsa gago di itshwaretsewe ka ntlha ya go ineela go Kreste.

9.3 Ipaakanyetse gore ka *tebogo* ga o kitia o wela gape mo sebeng, mme o tliša phela go ya ka molao wa Modimo. (Dintlha tse tharo tse, re di bona kae mo Katikisemeng?)

10. GO TSENA/GO DIRISA SELALLO

Ga se botlhe bao ba tshwanetseng go se dirisa. Go tswa mo go *wena ka bowena* le mo *kerekeng*.

10.1 *Wena ka bowena* (Bona NTLHA 9).

10.2 Ka mo Kerekeng: Selallo se boitshepo, mme se tshwanetse badumedi ba nnete fela. Batho bao ba leng kgatlhanong le Modimo ka metsamao, dipuo, *ditiro tsa bona*, ga ba a tshwanela go ja selallo, gonne go le kotsi mo go bona le mo phuthegong (1 Bakorinthe 11:34).

Batho bao ba ipitsa badumedi fa pele ga Modimo, mme e se ba mannete tota. *Modimo ga o aketswe*. *Go kotsi mo go bona* gonne ba tla welwa ke petso (1 Bakorinthe 11:27-34; II Bakor. 5).

Go kotsi mo phuthegong, gonne le yona e tla welwa ke petso (Buisa Jos. 7; II Bakor. 5).

Go leofile *Agane* a le nosi, mme petso e ne ya wela Israele yotlhe. Mme fa phuthego/lekgotla la kereke le sa tlhokomele seo, phuthego e tla feletsa a silafetse yotlhe.

Ka jalo, pele o tsena mo selallong o tshwanetse:

- Go ipolela boipolelo jwa tumelo.
- Go itshupa ka botshelo jotlhe fa o le modumedi go Krete.
- bo o le tokollo ya phuthego eo (plaaslike gemeente).

Lemoga!! ditokollo tsa diphutnego dingwe di ka- amogelwa fela jaaka baeti mo selallong, fela fa go na le bopaki jo bo tletseng gore le tsona di thomamisitswe, ebile ke badumedi tota.

11. SELALLO JAAKA TAELO

Ke tshwanelo gore re dirise selallo ka gonne Krete o laetse jalo mo go ithalosang. Luka 22:19; 1 Bakorinthe 11:24 "*Dirang jalo go nkgopola*". Yo o sa direng jalo ga a na kutlo go Krete; o a gana; mme fa go le sengwe seo se mo kgoreletsang, o tshwanetse go se tlosa ka pele, mme a tsene mo selallong.

SELALLO

A. Sellalo ke (moletlo) sejo *sa segopotso*. Re gopola dipogo le lefu la ga Krete. Senkgwe le *Weine ke ditshupo* tsa moo. Senkgwe se tshwanetse *go robiwa*, mme *Weine* e tshollwe, ka gonne mmele wa ga Krete o robilwe jalo, mme madi a gagwe a tshologa jale. Go ya ka 1 Bakorinthe 11:12-26 re lemoga gore re tshwanetse go dirisa selallo gore re tle re gopole dipogo tsa ga Krete.

B. Selallo ga se segopotso fela mme ke *nako ya dijo*. Totatota motho o ja le go nwa mmele le madi goya mothong yoo ka ko teng. Seno ke gore Moya o Boitshepo o fepa le go tiisa moya wa gago, ka go tshwaraganya tumelo ya gago thata kwa dipogong tsa ga Krete.

Fa o dirisitse selallo, tumelo ya gago e a natlafatswa - e natlafaditswe. Go ya ka Sontaga sa bo 30, go tewa mongwe yoo a itemogang sebe le tatlhego; yoo a itseng tsela ya polokego, le yoo a itseng gore a ka leboga jang!!! *Tseno ke ditshupo tsa yoo a tiileng mo tumolong ka ntlha ya selallo*.

C. Mmele o o bapotsweng wa ga Krete le madi a a tsholotsweng

Lemoga: Kolobetso le selallo di a tsamaelana.

- (a) Bobeding jwa tsona re tshepiswa ka ga *tshwarelo ya dibe tsa rona* ka ntlha ya go ineela ga Krete kwa sefapanong.
- (b) Bobeding jwa tsona, botshelo jwa rona bo a ntshafadiwa ka Moya o Boitshepo gore

gangwe le gape re *phelele tlotlison* ya Morena.

D. Buisa Luka 22:7-23 (19 le 20). Di ithute! Go ya ka 1 Bakorinthe 11:28 le 29, goreng fa mongwe a tshwanetse go itlhatlhoba pele a dirisa selallo.

SONTAGA SA BO 29

78. Potso: A jaanong senkgwe le weine di a tle di nne mmele le madi a ga Keresete tota?

Karabo: Nyaa, fela jaaka metsi mo kolobetsong a se ka ke a fetoga madi a ga Keresete, le e seng go nna tlhapiso ya dibe ka sebele mme e leng matshwao a semodimo, le dikano tsa nnete. Senkgwe sa selalelo se ntse fela jalo -ga se ka ke sa nna mmele wa ga Keresete ka gope - le fa e le ka mokgwa kgotsa boleng jwa disakaramente, di biditswe mmele wa ga Keresete Jesu.

Buisa: Matheo 26:29; Baefeso 5:16; Tito 3:5; 1 Bakorinthe 10:16; 11:16" Genesi 17:10, 11; Ekesodu 12:11, 13; 13:9; 1 Petoro3:21; 1 Bakorinthe 10:3, 4.

79 Potso: Ke ka ntlha ya eng fa Keresete a rile senkgwe ke nama ya gagwe mme senwelo sona ke madi a gagwe; felo gongwe a re: Ke kgolagano e ntsha mo mading a gagwe? Mme Paulo le ene a re: Ke kopano le mmele le madi a ga Keresete?

Karabo: Keresete ga a rialo fela kwa ntle ga mabaka ape, mme a rialo ka gonne a rata go re ruta gore fela jaaka senkgwe le senwelo di ntse di tshageditse botshelo, mmele wa ga Keresete o o bapotsweng kwa sefapaanong le madi a gagwe a a neng a tshologa gona, ke tsona dijo tse ka tsona meya ya rona e tlaa goroswang kwa botshelong jo bo sa khutleng. Gape le gore ka a ratile go re tlhomamisetsa ka matshwao a nnete a, le dipeeletso tse, gore fela jalo, le rona re fela re la baabelwa mo mmeleng wa gagwe le mo mading a gagwe ka ntlha ya tiro ya Moya o o Boitshepo go feta tiriso ya rona ka molomo, o re amogelang ka one. Le gore dipogo tsa gagwe tsotlhe le jone boitshoko jwa gagwe ke tsa rona, jaaka e kete ke ditefo tsa rona tse ka tsona re di anegelang Modimo ka botlalo.

Buisa: Johane 6:55 le 1 Bakorinthe 10:16.

TLHALOSO (ka dikai)

A. Fela jaaka metsi mo kolobetsong a sa fetogele ko mading a ga *Kreste*, fela jalo le *senkgwe le weine* mo selallong ga di fetogele ko *mmeleng le ko mading* a ga *Kreste*. Senkgwe le weine ka botsona ke matshwao fela ao a bontshang mmele le madi a ga *Kreste*. (Mono go fapaane le thuto ya Roma ka ga senkgwe le weine mo selallong seo ba se bitsang Misa o Boitshepo).

Buisa dibuka tse: Matheo 26:29; Baefeso 5:26; Tito 3:5; 1 Bakorinthe 10:16; Genese 17:10, 11; Eksoda 12:11, 13; 13:9 jalo-jalo.

B. Senkgwe le weine - mmele le madi a ga kreste

Mo selallong go na le tse dintsi go feta matshwao a senkgwe le weine. Moya o Boitshepo le Ona oa dira teng moo. Moya o, o *natlafatsa* tumelo ya rona, kgotsa o re *netefaletsa* ka ga *kopano ya nnete* le *mmele le madi a ga Kreste ka tumelo*. Ke ka moo *Kreste* a bitsang *senkgwe mmele* wa gagwe le *weine madi a gagwe*. Lemoga mo, tsamaelano ya Kolobetse le Selallo.

Buisa: Johane 6:22-59; 1 Bakorinthe 10:16.

SONTAGA SA BO 30

80. Potso: Pharologanyo ke efe mo gareng ga Selalelo sa Morena le MMesa wa Kereke ya Roma?

Karabo: Ke gore Selalelo sa Morena se re supetsa fa re bonye boitshwarelo jwa dibe tsothe tsa rona la ka botlalo -mme e le ka ntlha ya setlhabelo sa ga Jesu Keresete se gangwe fela o kileng a se wetsa sefapaanong: le gore ka rosi re lerilwe kwa go Keresete ke Moya o o Boitshupo - e bong Keresete yo ga jaanong a sa tlholeng a leyo mono lefatsheng, mme a le kwa legodimong, kwa o dutseng gona ka fa seatleng se se tona sa Modimo Rraagwe a re rapelela.

Mme Mmesa wa Roma one o ruta gore: Dipogo tsa ga Jesu Keresete ga di leretse batshedi le baswi boitshwarelo dibe ka gope, gonne Keresete ka bogagagwe o mo senkgweng sa Mmesalle mo veineng -mme o ka nna a rapelelwa teng moo, (e bong mo go tsone). Ka ntlha eo, Mmesa ga o na sekao sepe sa bomolemo, fa e se tatofatso ya setlhabelo sa ga Morena Jesu Keresete le dipogo tsa gagwe, le borapedi jo bo hutsegileng jwa diseto.

Buisa: Bahebera 10:10, 12; Bahebera 7:26, 27 le 9:12, 25; Johane 19:30; Matheo 26:28; Luka 22:19; 1 Bakorinthe 10:16, 17 le 6:17; Johane 20:17; Bakolose 3:1; Bahebera 1:3 le 8:1; Matheo 6:20, 21; Johane 4:21; Luka 24:52; Ditiro 7:55; Bakolose 3:1; Bafilipi 3:20; 1 Bathesalonika 1:10; Bahebera 9:26; le Bahebera 10:12, 14.

81. Potso: Selalelo sa Morena se tlhomamiseditswe bomang?

Karabo: Se tlhomamiseditswe ba ba ipobolang dibe tsa bona mme ba bile ba na le tshepo ya boitshwarelo jwa dibe tsa bona e le ka ntlha ya go rata ga Keresete, le gore dipogo tsa gagwe le loso lwa gagwe di bipe boleo; gape Selalelo, se tlhomamiseditswe ba ba nang le keletso ya gore gangwe le gape tumelo ya bona e nne e kwenele pele - e be e nne e tlhabologe pele. Mme fa e le bakokafadi le ba ba sa tlhabologeleng Modimo ka pelo yotlhe, bona, mo go diriseng Selalelo ga bone ba bo ba ijela le go inwela petso le go ipelesa katlholo godimo fela.

Buisa: 1 Bakorinthe 11:28; 10:19-22.

82. Potso: A mme jaanong mo go ba ba letlelelwang Selalolong go ka letlelelwa le ba ba ipobolang diseto, le ba ba supang ka botshelo gore ke ba ba sa dumelang?

Karabo: Nyaa, ga ba kake ba letlelelwa ka gope; gonne tetlelelo eo e ka itshepolola Kgolagano ya Modimo ya ba ya leretse phuthego yotlhe kgalefo ya ona. Ke ka ntlha eo Kereke ya Bokeresete e nang le go ya ka fa thulaganyong ya ga Keresete le ya Baapostolo ba gagwe ya go tswalela badiredi bao ba diseto ka kwa ntle ka dinotlele tsa puso ya legodimo, go fitlhelela baba ikwatlhayang ba bontsha tlhabologo e ntle mo botshelong jwa bone.

Buisa: 1 Bakorinthe 11:20, 34; Jesaya 1:11; 66:3; Jeremia 7:21; Dipesalome 50:16.

A. Thuto ya Roma ya mmesa (Potso. 80(a))

Go ya ka Kereke ya Roma, baprista ba teng ba tshwanetse go dirisa Mmesa ó ka metlha yotlhe. Go ya ka bona, Mmesa ke setlhabelo sa ka metlha yotlha, seo se se nang madi a ga Krete. Seno se kaya gore pogo le lefu/goswa gangwe fela gwa Krete, go ne go sa lekanela pholoso. Mmesa ono, ga o dirisetswe fela badumedi ba ba tshelang, mme o dirisetswa gape le bao ba ba tlhokofetseng. Fa Mmesa o diriswa, go ya ka Roma, gona fao, senkgwe le Weine di fetogela go mmele le madi a ga Krete. Ke gore, modumedi o ja tota mmele le go nwa tota madi o gagwe. Ba khubama fe pele ga senkgwe le weine é (mmele le madi a ga Krete) go rapela. Buisa Baheberu 7:26 & 27 o utlwe gore ga tweng ka ga Setlhabelo sa ga Krete, se se gangwe fela!

Ao baswi le bona ba ka tsaya karolo mo Selallong?

B. Thuto ya selallo sa Morena kgatlanong le mmesa wa Roma (Potso. 80(b))

Ditlholego tse pedi tsa ga Krete, ebong ya boModimo le ya botho, ga di kgaogane Ka gope - ga di a tshwanela go kgaogana. Fa bo Modimo jwa Gagwe bo leng teng, botho jwa gagwe bo teng. Fa re e ja senkgwe le go nwa weine, re ikgopotsa mmele le madi a Gagwe-tsothe tseo di mo diragaletseng.

Selallo sa Morena se re supetse fa re bone boitshwarelo jwa dibe tsothe tsa rona ka botlalo - (e le ka ntlha ya Setlhabelo sa ga Krete *gangwe fela mo sefaponong - eseng se sengwe, gantsi, goo gongwe*, - mme rona re tsisitwe kwa go Krete ke Moya o o Boiphepo) - Krete jaanong ga a tlhole a le teng mono lefatsheng, o kwa legodimong fa seatleng se se tona sa Modimo Rraagwe, go re rapella.

C. (Potso. 80(c))

TLHALOSO: Go ya ka thuto ya Selallo sa Morena Jesu, Mmesa wa Roma, ga o na Sekao sepe sa bomolemo, fa e se tatofatso ya setlhabelo sa ga Morena Jesu Krete le dipogo tsa gagwe, le borapedi - kobamelo eo e hutsegileng/rogilweng ya medimo ya diseto. Wena, akanya, o batlisisa gore ke goreng fa Mmesa wa Roma e le tatofatso ya Setlhabelo sa ga Krete, le Kobamelo eo e rogilweng.

Potso. 81(a) & (b)

TLHALOSO:

A. Selallo se se Boitshupo se tlhomamiseditswe badumedi ba nnete fela. Matshwao a modumedi wa nnete ke a a latelang a:

1. O itse dibe tse gagwe le bomadumabe jwa gagwe.
2. O itse tsela ya kgololosego.
3. O itse ka moo a ka lebogang ka teng.

B. Ke kae mo katikisimeng ya rona moo re kopanang le Matshwao a' teng? Gona, matshwao a', a amana jang/a dirisana jang/a utlwana jang le mongwe yoo a dirisang Selello sa Morena?

Ao phuthago e ka kgona go otlhaya baitimokanyi (bao ba sa tshwaegeng ka sepe sa bosula ka fa ntle), ka go ba tlosa mo Selallong? (Ee/Nyaa? - Goreng? – Tlhalosa!!)

Potso. 82(a) & (b)

TLHALOSO

Fano, go Kaiwa ka ga batho bao ba leofang mo pepeneneng, ba sa ephitlhe mo sephiring; bao ba bonwang ke mang le mang, mme ba ruta dithuto tseo di fosagetseng. Fano ga go ame baitemokanyi; (bao ba itirang ekete ke bakreste ka fa ntle, etswe ka fa teng ga dikgopolo le mewa ya bona ba se jalo) ka gone kereke/phuthago ga e kgone go bona boteng jwa bona.

Fa phuthago e tlhokomologa kotlhao/kgalemelo, phuthago yotlha ea senyega. (Buisa: 1 Bakor. 5:6 & 7 (1-13). Kgalefo ya Modimo ka ga seo, e wela phuthago yotlhe, ka gone Selallo sa Ona se silafadiwa.

Ntlha nngwe ya botlhokwa ke gore le eseng le ka motlha ope go dumellwa batho bangwe bao ba tswang kwa diphuthagong tse dingwe go dirisa Selallo (BOLELA MABAKA!!)

SONTAGA SA BO 31

83. Potso: Dinotlele tsa puso ya legodimo ke eng?

Karabo: Ke thero ya Efangedi e e boitshupo le tiriso ya kotlo ya sekeresete e bong go tlosiwa mo phuthagong. Ka dilo tse pedi tse, puso ya legodimo e bulelega badumedi, mme ba ba sa dumeleng bone e a ba tswalegela.

84. Potso: Puso yua legodimo e bulwa jang e be e tswalwe jang ka thero ya Efangedi e e

boitshepo?

Karabo: Go ya ka fa taelong ya ga Keresete, mo badumeding botlhe mongwe le mongwe o na le go rerelwa Efangedi; mme ba kaelwe fa, ka ntlha ya tiro ya ga Keresete, Modimo o ba itshwarela dibe gangwe le gape, fa fela ba amogela tsholofetso ya Efangedi ka tumelo ya nnete. Mme mo go ba ba sa dumeleng le ba ba dipelo di thata, gone go supa fa tshakgalo ya Modimo le tshenyego e e sa khutleng e ba dutse godimo ka nako tsotlhe fa ba sa ntse ba ise ba tlhabologe; mme go ya ka fa bosuping jo jwa Efangedi, Modimo o tlaa athola mo botshelong jono le o go jo bo tlang.

Buisa: Johane 20:21-23; Matheo 16:19.

85. Potso: Puso ya legodimo e tswalwa jang e be e bulwe jang ka kotlo ya sekeresete?

Karabo: Go ya ka fa taelong ya ga Keresete, batho ba ba leng ka fa tlase ga leina la BOKeresete mme ba itshekolola BOKeresete ka metsamao (mo thutong le mo botshelong) e re morago ga ba se na go kgalemelwa kgafetsa ka sekaulengwe, e bong go kgalemelwa boitimokanyo mme ba sa tseye mokgalemi tsia ka gope, ba tshwanetse go kgalemiwa mo phuthegong, mme fa ba sa tseye kgalemo ya phuthego tsia, foo ba ilediwa disakaramente ba ba ba kgethololwa mo phuthegong ya BOKeresete; mme Modimo ka osi o ba tswalelela-ntle ga Puso ya ga Keresete - go fitlhela ba tla ba amogelwa seéa botokololong jwa ga Keresete le phuthego ya gagew motlhang ba ikwatlhaileng.

Buisa: Matheo 18:15-17; Bakorinthe 5:4; 5:11; 2 Bakorinthe 6-8.

TLHALOSO (ka dikai)

KOTLHAO

1. Tota kotlhao ke eng mo kerkekeng?

Re ka tlhaloganya kotlhao fela fa re na le tumelo mo go Kreste jaaka.

MOFEMEDI: le MOPHOLOSI wa rona.

1.1 Kotlhao mo kerekeng e lebane le molao wa lorato wa Modimo wa polokego, le pholoso e e sa feleng mo go KRESTE, le karabelo ya rona gona moo.

1.2 Kotlhao e lebane le lerato la rona go Kreste/KGOTSA LETLHOO LA RONA GO ENA.

Ke ka moo Paulose a reng: 1 Bakor. 16:22 "Fa mongwe a sa rate Kreste, a a hutsege (a rogege) Kreste o re swetse mo sefapanong re le baetsadibe. Ena o lebeletse le go batla gore rona re mo rate. Fa re sa dire jalo, re tla bona thogako e e sa feleng go tswa go Rara.

Ka ntlha ya fa kereke e le mmele wa ga Kreste, moo go leng tulo ya bao fela ba mo ratang ka nnete, bao ba sa mo rateng ba tshwanetswe ke go ntshiwa mo kerekeng e, gone ba rogilwe. *Ke yona kotlhao ya kereke.*

Buisa: 1 Bakor. 5 yotlhe sentle; lemoga ditemana 2, 7 le 13.

2. Maikaello a kotlhao

2.1 Gore go nne le thulaganyo e e siameng mo phuthegong ya Morena (KWALOLLA 1 BAKOR. 14:33 le 40).

Temana 33 - Gonne Modimo ga se wa tlhakatlhakanoyo, ke wa kagiso jaaka go ntse mo diphuthegong tsotlhe tsa baitshepi.

Temana 40 - A tsotlhe di dirwe ka maitsholo le ka thulaganyo.

2.2 Gore phuthego e nne phepa le boitshepo, gore ditokollo tseo di sa siamang di se e silafatse.

Buisa: 1 Bakor. 5:1, 2, 6, 7 le 13, sentle.

2.3 Gore moetsadibe a sokologe, a bolokege (1 Bakor. 5:3-5;

Diane 12:1; 13:24; 15:10. Oketsa Diane ka tse pedi, mme o di kwalolle ka botlhanu jwa tsona.

12:1 - Yoo ratang kotlo, o rata kitso; yoo ilang kgalemelo ke seelele.

13:24 - Yo o rekegelang thupa o tlhoile morwawe; yo o mo ratang wa tle a mo otle.

15:10 - Kotlo e e botlhoko e wela yo o tlogelang tsela, mme yo o ilang kgalemelo, o tlaa swa.

10:17 - Yo o elang kotlo tlhoko, o mo tseleng e e yang mo bophelong; mme yo o tlhokomologang kgalemelo o a timela.

23:14 - Ka go mo itaya ka thupa, o tla faposa bophelo jwa gagwe mo felong ga baswi.

Lemoga!! Kotlhao ga se go ikaella go suthisa batho ba ba sa siamang fa pele ga phuthago. Nyaa!! Kotlhao ke gore/e ikaella gore moetsadibe/moleofi **a bolokege.**

3. Tshiamo/tlhokafalo ya kotlhao mo phuthagong

3.1 Gore go nne le *thulaganyo* mo phuthagong.

3.2 Gore phuthago e nne *phepa le boitshepo.*

Lemoga: Phuthago eo e se nang kotlhao, e tshwana le puso eo e se nang sepodisi/sesole.

4. Maikutlo/mokgwa wa kotlhao

Seno se tshwanetse go diragala ka *lorato*, le tshwenyego ya **gore** moleofi yo a sekologe (a ikotlhae) - **Buisa:** Diane 13:24; 1 Bathes. 3:14, 15; Baheb. 12:5-8.

Ka metlha mo tirisong ya kotlhao, re tshwanetse go buwa mafoko a: 2 Bakor. 5:20 (Feletsa) . . . Re rapela mo boemong jwa ga Keresete ra re: Ineeleng go ruangwa le Modimo..

5. Ke tiro ya ga mang ya go otlhaya

5.1 Ke tiro ya modumedi mang le mang (Matheo 18:15-17; Ezek. 3:16-21).

5.2 Thatathata ke tiro ya lekgotla le bagolo - Babusi ba kereke (Matheo 18:17).

6. Tsamaiso ya kotlhao

6.1 Kgalemelo ka badumedi bangwe (Matheo 18:15-17), kwalolla.

6.2 Kgalemelo ka lekgotla - *boemong jwa phuthago* (Matheo 18:17).

6.3 Go suthiswa mo Disakramenteng. Go suthiswa mo disakramenteng go diragala ka gone o ganne dikgalemelo tsa batho, mrae wa ba wa tliswa mo phuthagong. Gape, o ka suthiswa le fa o sa kgalemelwa pele, mme e le ka ntlha ya *sebe se se mo pepeneneng se se makgwakgwa.* (E ka nna ka tidimalo, go sa itsisiwe phuthago).

6.4 Dikgato tseo dilatelwang

Fa motho a le tlhogo e thata, go latelwa dikgato tse tharo, mme go ntse go fiwa sebaka sa go kgalemelwa.

6.4.1 Leina le tulo ya motho yoo, le sebe sa gagwe di a itsisiwe (Klassis e kupilwe thuso). Motho ó, o a repellwa.

6.4.2 Go itsisiwe phuthago, (ntieng le leiha la gagwe), sebe sa gagwe – go kopiwa gore a repellwe. 2 Bakor. 5:20.

6.4.3 Leina, tulo le sebe di a itsisiwe - mme fa a santse a le tlhogoethata, o kgaolwa mo phuthagong. O a repellwa.

Lemoga!! Motho yo o kgaotsweng mo phuthagong, ga se gona fela gore ga e

sa le tokollo ya phuthego, mme go kaya gore o tswalletswe kwa ntle ga puso ya Modimo, mme o tsewa jaaka moheitene le mokgethisi. (*Ithute Matheo 16:13 -19 le 18:15-18*).

SONTAGA SA BO 32

KGAOLO YA BORARO

MABAPI LE TEBOGO

86. Potso: E re ka jaana ka fa ntlheng ya rona re bone kgololo mo bomadimabeng jwa rona ka Keresete, ka ntlha ya bopelotlhomogi e seng ka bodiredi, go tla jang gore re bo re sa ntse re tshwanetse go dira ditiro tse di molemo?

Karabo: Ke ko gonne, e ne ya re morago ga fa Keresete a se na go re reka ka madi a gagwe, a ba a re golola, o na a boa gape a re ntshafaletsa setshwanong sa gagwe ka Moya wa gagwe o o Boitshepo, e le gore

(1) re tle re bontshe Modimo tebogo ya rona ka botshelo jotlhe jwa rona ka ntlha ya bomolemo jwa gagwe,

(2) le gore mongwe le mongwe wa rona a tlhomamisiwe ka maungo a ditiro tse gore o na le tumelo,

(3) mme ka metsamao ya rona e e siameng re tle re itse go gapela Keresete bangwe-ka-rona.

Buisa: Baroma 6:13; Baroma 12:1, 2; 1 Petero 2:5, 9; 1 Bakorinthe 6:20; Matheo 5:16; 1 Petero 2:12; 2 Petero 1:10; Matheo 7:17; Bagalata 5:6, 22; 1 Petero 3:1; le Baroma 14:19.

87. Potso: A Baikepi ba ba tshelang botshelo jwa go tlhoka tebogo, ba ba bileng ba sa tlhabologele kwa Modimong le bone ba ka bona poloko?

Karabo: Nyaa, legoka; gonne Lokwalo lwa re: "Ga go na basiamolodi bape kgotsa baobamedi ba diseto, kgotsa bagokafadi, magodu, batsietsi, matagwa, bakgadi kgotsa bathukhuthi le fa e le bagagapi ba ba ka jang jwa Modimo boswa.

Buisa: 1 Bakorinthe 6:19, 10; Baefeso 5:5, 6; 1 Johane 2:14.

LEMOGA!! Ikgopotse dipotso le dikarabo tsotlhe tsa Sontaga se:

TLHALOSO (ka dikai)

A. Motho o gololosega fela ka *mohau*, mrae morago o buwe o re "*Ke a leboga*" Modimo; ke lebogela *kgololo* ya Gago. Tebogo ya rona go Modimo ke DITIRO TSE DIMOLEMO.

A2. *Setlhare* sa maungo se bonwa ka *maungo* a sona. Ditiro tsa rona tse di molemo di re netefaletsa fa re le badumedi ba nnete tota. Le bafeti ka tsela babogedi, baagisanyi, ba tshwanetse go re *itse*, go re *tshwaya* ka tsona. Ka go dira jalo, re tshwana le *kgogedi*, eo e gogelang bangwe-ka-rona kwa go Krete, gore le bona ba bolokege.

Buisa: Baroma 6:13; Matheo 5:16 mme o dikwalolle. Buisa gape Matheo 7:15-20.

A3. Go na le batho bao ba leng kgopo mo tshokologong, le bao ba leng lefufa mo tebogong. Batho bao ga ba ka ke ba bona polokego le eseng tshhegofatso. Lemoga!! *Setlhare* se se siameng se enya maungo a a siameng. Tumelo ya nnete e lemogiwa ka maungo a a siameng. Ga go kae sepe gore o re o na le tumelo, mme o sa enye ditiro tse di molemo; ka jalo tumelo eo e senang maungo (ditiro tse di molemo) ga e thuse sepe, ebile ga se yona.

Buisa: Jakobo 2:14-18.

SONTAGA SA BO 33

88. Potso: Tlhabologo ya nnete ya motho e na le dikaroi di le kae?

Karabo: Di le pedi. Ya ntlha ke go swa ga motho wa bogologolo mme ya bobedi ke go

rula ga motho yo mosa.

Buisa: Baroma 6:1, 4-6; Baefeso 4:22-24; Bakolose 3:5, 6, 8, 10; 1 Bakorinthe 5:7; 2 Bakorinthe 7:10.

89. Potso: Go swa ga motho wa bogologolo ke eng?

Karabo: Ke boikwatlhao ka pelo yotlhe e bong ipobolo ya gore, rona, ka ntlha ya dibe tsa rona, re gakaditse Modimo mme re tshwanetse go di tloha le go di tshaba.

Buisa: Baroma 8:13; Joele 2:13; Hosea 6:1.

90. Potso: Go rula ga motho yo mosa ke eng?

Karabo: Ke go itumelela Modimo ka pelo yotlhe, ka ntlha ya ga Kresete, le go letsa le go rata go dira ditiro tse di molemo ka fa go ratent ga Modimo.

Buisa: Baroma 5:1-14; Jesaya 57:15; Baroma 6:10, 11; Bagalata 2:20.

91. Potso: Mme jaanong ditiro tse di molemo ke dife?

Karabo: Ke tse di tswang mo tumelong ya nnete fela, go ya ka molaong wa Modimo, e bong tse di direlwang mo tlotlong ya ona: e seng tse di tswang mo go rateng ga motho.

Buisa: Baroma 14:23; Lefitiko 18:4; 1 Samuele 15:22; Baefeso 2:10; 1 Bakorinthe 10:31; Esekiele 20:18, 19; Jesaya 29:13 le Matheo 15:7-9.

TLHALOSO (ka dikai)

A. *Tshokologo* ke tiro/thato ya Modimo mo go rona, mme eseng rona ka borona. Moya o Boitshepo o dira gore tumelo le tshokologo di nne teng mo go rona. Ka go dira jalo, Modimo o *bolaya motho wa kgale*, mme o tsosa motho yo mosa.

Tshokologo ke *leungo la tebogo*. Ke gore motho yo o sekologang, a tlogela dilo tse di maswe, go bontsha fa a na le tebogo mo go ena, mme tebogo eo e enya tshokologo. Ka tebogo e, go bontsha fa re tlogetse dibe, mme re tsamaya mo botshelong jo bo èa, jo bo tlhwekileng ka tebogo go Modimo fa a re golotse mo go Tiabolo.

B. Go swa ga motho wa kgale

Motho yo o tsetsweng seia, a sokologile, o lemoga le go bona dibe tsa gaagwe mo leseding la molao o boitshepo wa Modimo. Ka go dira jalo, o *utlwa botlhoko*, o a *ikotlhaya*, o *tlhoya* dibe tsa gagwe, mme o a di tshabela, o a di katoga. Ka go rialo, *motho wa kgale o a swa*.

Buisa: Baroma 7:16-23.

C. Tsogo ya motho o moša

Tsoga ya motho o mosa, *santlha*, ke go bulega ga matlho a gago gore o bone dilo tse di siameng; go bona tsela ya nnete. *Sa bobedi*, ha o bone tshiamo, o *tsogelwa ke keletso* ya go di dira, e le ka Moya wa Modimo, gore go diragale jalo.

Sa boraro, ha o tsogetswe ke keletso ya go dira tshiamo, o simolla godira tshiamo - o bonala ka ditiro tsa gago tseo di tletseng tshiamo, tse ntle, tse di itumedisang. Ka mo teng ga pelo ya gago, go tlala tēhesego/Modimo - mme eseng Tiabolo.

Buisa: Baroma 6:13 (BATLA DITEMANA TSE DINGWE TSA THUTO E).

D. Ditiro tse di siameng

Ka tebello ya matlho, batho ba bantsi ba lebega o kare ba siame, mme ha re ba lebella ka fa Lefokong la Modimo, ga go jalo. Ka metlha, re se ka *ra metha* ka matlho a rona, mme molao wa Modimo e nne ona *sekala* sa rona. Motho, fa pele ga Modimo, o kgona fela go dira ditiro tse di siameng *fa a dumela mo go Ona Modimo*. Ka jalo, ditiro tsa rona tse di molemo ga di **re** duelle sepe, mme di tshwanetse go nna teng, e le tshupo ya **gore** re a dumela - **e le leungo la setlhare seo eleng tumelo mo go rona**, mme sona setlhare sé, (tumelo), se enya leungo, **eleng** ditiro tse di siameng.

SONTAGA SA BO 34

KA GA MOLAO WA MODIMO

92. Potso: Molao wa Modimo o reng?

Karabo: O bua fela jaaka ka fa o kwadilweng ka teng mo go Ekesodu 20:1-17 le mo go Doiteronomio 5:6-21 e bong mo Modimo o neng wa bua mafoko a otlhe a wa re: "ke nna Morena Modimo wa gago, yo ke ntshitseng mo lefatsheng la Egepeto, mo tlong ya bothlhanka.

1. O se nne le medimo epe e sele kwa ntle ga me.
2. O se ka wa itirela modimo wa seseto, le fa e le setshwantsho sepe sa se se kwa legodimong kwa godimo, le fa e le sa se se mo lefatsheng, gongwe sa se se mo metsing a a kwa tlase ga lefatshe; O se ka wa e obamela, le fa e le go e direla; ka gonne na, MORENA, Modimo wa gago ke Modimo o o lefufa, o ke beletsang bana tshiamololo ya borraabo, go ya losikeng lwa boraro le lwa bone lwa ba ba ntlhoang.

Mme ba le dikete ba ba nthatang, le go tshegetsisa ditaolo tsa me, ke ba direla ka bopelotlhomog.

3. O se ka wa bolela Leina la MORENA Modimo wa gago, mo **go** sa tshwanelang, gonne yo o bolelang Leina la gagwe mo go sa tshwanelang, MORENA ga a kitla a mo lesa a sa mo otle.
4. Gakologelwa letsatsi la Sabata o le itshepise. O dire o bo **o** wetse tiro yotlhe ya gago ka malatsi a le maratara; mme letsatö la bosupa ke Sabata wa ga MORENA Modimo wa gago. Se dire tiro epe ka lona, wena, le morwao le morwadio, le motlhanka wa gago, le lelata la gago, le dikgomo tsa gago, le moeng wa gago yo o mo dikgorong tsa gago.

Ka gonne MORENA o dirile legodimo le lefatshe le lewatle, le tsotlhe tse di mo go ona, ka malatsi a le maratara, mme a ikhutsa ka letsatsi la bosupa. Ke ka moo MORENA a tshegofaditseng letsatsi la Sabata, a le itshepisa.

5. Tlotla rrago le mmago, gore malatsi a gago a nne mantsi mo lefatsheng le MORENA Modimo wa gago o tlaa le go nayang.
6. O se ka wa bolaya.
7. O se ka wa akafala.
8. O se ka wa utswa.
9. O se ka wa supa maaka ka ga mongwe-ka-wena.
10. O se ka wa eletsa ntlo ya mongwe-kap-wena, o se ka wa eletsa mosadi wa mongwe-ka-wena, le e seng motlhanka wa gagwe, le e seng lelata la gagwe, le e seng kgomo ya gagwe, le e seng esela ya gagwe, le e seng sepe se e leng sa mongwe ka wena.

93. Potso: Melao e e lesome e e kgaogantswe jang?

Karabo: E kgaogantswe ka matlapa a le mabedi. Letlapa la ntlha lé re ruta ka fa re tshwanetseng go itshola ka gona mo Modimong, mme le lengwe lone le re ruta se se re tshwanetseng mo go bangwe-ka-rona.

Buisa: Doiteronomio 4:13; Ekesodu 34:28; Doiteronomio 10:3,4; Matheo 22:37-40.

94: Potso: Modimo o kgalema eng mo taolong ya ntlha?

Karabo: Go re: Diseto, boloi, masalamusi, ditumelonyana, kobamelo ya baitshepi kgotsa sebopiwa sengwe le sengwe; ke di ile ke bo ke di tshabe go tla ke bonela moya wa me pofoko mme ke ithute go itse Modimo wa nnete sentle. Ke ikanye ona fela mo matsapeng le mo dipogisegong. Ditle tsotlhe ke di lebelele go tla di tswa kwa go one. Ke o rate ka pelo e e thokgameng, ka poifo ie ka tlotlo; e le gore ke tlogele tlotlo go dibopiwa tsotlhe mme ke kgomarele kgopolo ya go dira thato ya ona fela.

Buisa: 1 Johane 5:12; 1 Bakorinthe 6.10; 10:7,14; Lefitiko 19:31; Doiteronomio 18:9, 10; Matheo 4:19; Tshenolo 19:19 'ne 22:8, 9; Johane 17:3; Jeremia 17:5; 1 Petoro 5:5; Bahebera 19:36; Bakolose 1:11; Baroma 5:3, 4; 1 Bakorinthe 10:10; Bafilipi 2:14; Dipesalome 194:27; Jesaya 45:7; Jakobo 1:17; Doiteronomio 6:5; Matheo 22:37; Doiteronomio 6:2; Dipesalome 111:10; Diane 1:7; 9:10; Matheo 10:28; 4:10; Doiteronomio 10:20; Matheo 5:29; 10:37; Ditiro 5:29

95. Potso: Seseto ke eng?

Karabo: Ke sengwe se motho o se bayang mo boemong jwa Modimo wa nnete, e bong ona o o itshenotseng mo Lefokong la ona. Seseto ke sengwe se motho a bileng a se ikanya bogolo.

Buisa: Baefeso 5:5; 1 Ditirafalo 16:26; Bafilipi 3:19; Bagalata 4:8; Baefeso 2:12; 1 Johane 2:23; 2 Johane:9; Johane 5:23.

TLHALOSO (ka dikai)

A. E ke yona melao e e lesome eo Morena a e fileng setshaba sa Gagwe ko thabeng ya Sinai. Morena o fa setshaba sa Gagwe Taolo é, jaaka *tsela ya tebogo* (mokgwa wa go leboga), gonne pele ga ona ga twe: Ke nna Morena Modimo wa gago, yo ke go ntshitseng mo lefatsheng la Egepeto, mo tlung ya botlhanka." Morena o setse a lokolotse, mme setshaba se tshwanetse go nna le tebogo ka go phela go ya ka molao wa Gagwe.

POTSO 93: KGAOGANYO YA MELAO

Melao e e lesome e kgaogangwa ka ditafole (MATLAPA) di le pedi. Goreng fa go sa twe DIKAROLO mme go twe

DITAFOLE (MATLAPA)? BOLELA KAKARETSO YA MELAO E E LESOME (Matheo 22:37-40).

POTSO 94: ITHUTE TAOLO É KA TLHOGO

Diseto ke sebe sa ko ga loye (sa kgalekgale) - esita le mo tlhabologong. Motho o bopilwe jaaka sebopiwa seo se itshegeditseng ka sengwe. Motho o bopetswe gore a direle Modimo. Mme fela fa a latihelwa ke Modimo wa nnete, o simolla go direla sengwe kgotsa mongwe o sele jaaka modimo wa gagwe. *Tlhokoméla!! go itlotla le go tlotla bangwe go feta Modimo wa gago, ke seseto!!*

Mo taolong é, fela jaaka mo go tse dingwe, re lemoga kutlwelobotlhoko ya Modimo, ka gonne fa Modimo o ka bo o sa re fa tsela ya go phela ka molao wa Gagwe, re ka bo re le mo tatlhegong e kgolo, ka go direla diseto.

Mo taolong é, Modimo o tlhotlheletsa gore ke mo ithute sentle jaaka Modimo wa nnete . . . Molao mongwe le mongwe o na le dikarolo di le pedi: Ke go re, fa molao o re ganela go direla diseto, o tshwaragane le go re tlhotlheletsa gore re direle Modimo o le mongwe fela,

wa nnete.

POTSO 95: SESETO

Motho yo o rapelang seseto, ga a tshwenyegele gore o rapela badimo ba le kae. Badimo/MEDIMO ya gagwe ga e lefufa, ka gonne motho yo, o itirela boena seseto se, go itumedisa ena modiri yó. Mme Modimo wa nnete Ona, ga o na tlotlo epe go seseto sengwe: Ga a itsalanye le medimo e mengwe ka gope.

Buisa: Jeremia 19:8; Habakuke 2:18, 19; Baroma 10:14, 15; 17; 2 Petoro 1:19; 2 Timotheo 3:16, 17.

SONTAGA SA BO 35

96. Potso: Modimo o laela eng mo taolong ya bobedi?

Karabo: O laela gore re se ka ra itirela setshwano sepe sa ona ka gope, le gone re se ka ra o naya tlotlo ka' mokgwa ópe o sele kwa ntle ga o o o laetseng mo Lefokong ia ona.

Buisa: Jesaya 40:18, 19 le 25; Doiteronomio 4:15, 16; Baroma 1:23; Ditiro 17:29; 1 Samuele 15:23, Doiteronomio 12:30 le Matheo 15:9.

97. Potso: Jaanong moo go raya gore ga re a tshwanela go dira setshwantsho ka gope?

Karabo: Ga re a tshwanela go dira setshwantsho sa Modimo ka gope; legale sa dibopiwa tse dingwe sona re letlelelwa go di dira mme e seng go di tlotla kgotsa go direla Modimo ka tsona.

Buisa: Jesaya 40:25; Ekesodu 34:17; 23:24; 34:13; Dipalo33:52.

98. Potso: A mme jaanong ga le a tshwanela go letla ditshwantsho mo dikerekeng, e bong tse di tshwanang jaaka dibuka tse di thusang ba ba sa leng kwa tlase mo thuthong ya borapedi?

Karabo: Nyaa, gonne ga re a tshwanela go ipona ba ba botlhale go feta Modimo, gonne badumedi ba ona ga baa rutwa ke diseto tse di sa bueng, mme ba rutilwe ka thero ya Lefoko la ona le le tshelang.

TLHALOSO (ka dikai)

A. Mo taolong ya "ntlha Modimo o re kgalemella *diseto*, boloi, ditumeloyana jalo-jalo, mme mo taolong eno Modimo o re kgalemella go mo tshwantsha. Motho ka matlho o tletse sebe, mme o rata go bona gore Modimo o ntse jang. Ga go ope yo o ka bonang Modimo, mme a phela. Modimo ke moya, ka jalo a ka se tshwantshiwe. Fela jaaka Modimo o re ganela go dira ditshwantsho, o re tlhotlheletsa go mo direla ka tshwanelo, jaaka a re laolela mo Lefokong la Ona. Motho ga a tshwanela go direla Modimo ka fa o ratang ka teng.

B. Dithwantsho tsa Beibele

Go a diragala gore batho bangwe le dikereke dingwe di dirise ditshwantsho dingwe mo Beibeleng, ka go leka go tshalosa dintlha dingwe, mme seno morago se dirisiwe mo go feteletseng. moo go sa tshwanelang.

Ba bona Beibele e le sengwe seo se sa tshaloganyegeng, mme ba dira ditshwantsho tsa MORENA JESU, le tsa bagaledi bangwe jaaka bo-Maria, mme morago ba obamele ditshwantsho tse, boemong jwa go obamela Modimo. Bangwe ba dumela mo difiliming tsa Beibele, go na le go dumela fela ba sa bona dilo tseo. Seno ke tlolo molao ena e kgolo.

Beibele ke Lefoko la Modimo leo le ka tshalogangwang ke mang le mang.

SONTAGA SA BO 36

99. Potso: Taolo ya boraro ya reng?

Karabo: Ya re: Re se ke ra biletša Leina la Modimo lefela, mme o iletsa go ikanakana lefela - gore Leina la ona le se ke la tlontlolwa, kgotsa go tshameka ka lona. Gape, fa re didimala fa ba bangwe ba le dirisa lefela, re na le kabelano le sebe se segolo se - Ka bokhutshwane re re: Re tshwanetse go dirisa Leina le le boitshepo la Modimo ka poifo le ka tlotlo, e seng ka mokgwa ope o sele. Re tshwanetse ra ipobola ka tlhomamo, ra ba ra o baka ka mafoko le ka ditiro tsa rona.

Buisa: Lefitiko 24:15, 16; Lefitiko 19:12; Matheo 5:37 Jakobo5:12; Lefitiko 5:1; Diane 29:24; Jeremia 4:2 Jesaya 45:23; Matheo 10:32; Baroma 10:9, 10 Dipesalome 50:15; 1 Timotheo 2:8; Bakolose 3:17 Baroma 2:24; le 1 Timotheo 6:1.

100. Potso: A ruri, ke teofo e kgolo go tlotlolola Leina la Modimo ka go ikana fela ka lona le go hutsa ka lona, mo e leng gore Modimo o ka galefela ba ba sa thuseng go thibela seo?

Karabo: Ee, gonne ga go na boleo bope jo Modimo o bo gakalelang bogolo go feta tsuololo ya Leina la ona; ke ka moo, Modimo o bileng o go laeletse katlholelo ya loso.

Buisa: Diane 29:24; Lefitiko 5:1, 24:16.

MOLAO WA BORARO

Potso. 99(a) (Lemoga: Molao oa re Ganela!)

TLHALOSO

Go rogana kgotsa gokgala le go tiaela (go tshameka ka sengwe/mongwe, ke mokgwa o o sa siamang) ke thapelo ya Seheitane, mongwe yoo se nang Modimo. Yoo, ga a rapelle kgololosego, mme o rapella Katlholo ya Modimo mo go ene.

Gape, ke boikarabelo jwa rona go kgalemela bao ba dirisang leina la Morena lefela/mo go sa tshwanelang, ka gonne fa re didimala, go kaya gore le rona re na le kabelano le sebe se segolo se.

Potso. 99(b) (Lemoga: Molao o re Bontsha tsela)

TLHALOSO

Re tshwanetse go dirisa Leina le le boitshepo la Modimo ka poifo le ka tlotlo, eseng ka mokgwa ope o sele. Re tshwanetse ra ipobola ka tlhomamo, ra ba ra o baka ka rnafoko le ka ditiro tsa rona.

Motlhapadi mo kerekêng le mo botshelong jwa sedumedi, kgotsa mo tshebeletsong ya Modimo, ga a kake a falola petso ya Modimo. Ga re a tshwanela go dirisa Leina le botlhaswa, re sa akanye sepe, re sa tlotle.

Leina la Modimo le boitshepo, ka gonne Ona O le boitshepo. Ke ka moo Modimo o galefang thata godimo ga Leina la Ona leo le tlontlollwang.

Buisa: Dibuka tse: Lefitiko 24:15, 16; Diane 29:24; Jesaya 45:23; Matheo 5:37; Baroma 19:9, 10; 1 Tim. 2:8 le tse dingwe.

Potso. 100

TLHALOSO (Maitsholo a Roma Go ya ka Molao ó)

Fa o buisa Diane 29:24, o tlhalosetswa sentle gore, seana sa re: Yo o jang le legodu, o a itlhoya. (Ke gore le ena ke legodu leo le tshwanetsweng ke go tlhoiwa, go atlholelwa bogodu); gape seane sa re: o utlwa go rogakwa yo o sa begeng legodu, mme ga a le bege. Ka mantswa

a mangwe. Ke gore, le rona re tshwanetswe ke katlholo yona eo e atlholelwang yoo tlontlolang Leina la Modimo, fa re mo lesa re sa mo kgalemele; ke gore: re ja le ena tseo a di utswitseng!!

Potso ke e: Ke buka e feng gape mo Beibeleng eo e bolelang jaaka. Diane 29:24?

SONTAGA SA BO 37

101. Potso: A mme jaanong re tshwanetse go ikana ka Leina la Modimo mo tumelong ya nnete?

Karabo: Ee, ga jaana gore le fa mmuso o ka lopa ikano eo mo moaging, kgotsa go ka nna tlhokego nngwe epe fela tebang le ikano ya boikanyego mo boammaaruring; gotlhe moo go batlega go direlwa mo tlotlong ya Modimo le mo tlotlong ya bangwe-ka-rona; gonne maikano a, a thailwe mo Lefokong la Modimo. Ke ka ntlha eo baitshepi ba neng ba ikana ka kelotlhoko le ka tshwanelo mo Kgolaganong e Kgologolo le mo go e Ntsha.

Buisa: Doiteronomio 6:13; 10:20; Jesaya 48:1; Bahebera 6:16; Genesi 21:24; 31:53; Joshua 9:15; 1 Samuele 24:23; 2 Samuele 3:35; 1 Dikgosi 1:29; Baroma 1:9; 9:1 le 2 Bakorinthe 1:23.

102. Potso: A go a tshwanela go ikana ka baitshepi kgotsa ka setshedi se sele?

Karabo: Nyaa, gonne fa re dirisa ikano e e tlhomameng, re a bo re kaya fa re ikanya Modimo ka botlalo, re bile re o supa fa o le ona moitse wa dipelo; o o nayang tshupo ya nnete, mme o ka re otlhaya fa re dira ikano ka lefela e bong tlotlo e e sa tshwanelang sebopiwa sepe.

Buisa: 2 Bakorinthe 1:23; Baroma 9:1; Matheo 5:34;36; Jakobo 5:12.

Potso. 101 (a) & (b)

TLHALOSO (Fa o Kopiwa Go ikana)

Goa diragala gantsi gore motho mo maemong mangwe a dikgang, a kopiwe go ikana. Mme le fa gole jalo, motho o tshwanetse go nna tlhoko thata ka ga seo, gonne e le tiro e e boitshepo. Mo taolong é ya boraro, leina la Modimo le masisi thata.

Fa go tlhokafala jalo gore ikano e nne teng, a e nne ikano ya boikanyego mo nneteng; go direlwe mo tlotlong ya Modimo le mo thotlong ya bangwe-ka-rona; gonne maikano a, a theilwe mo lefokong la Modimo.

Lemoga gore go bonolo/go tiwaelegile jang go buwa o re: "ka Modimo ruri"! Mme le mo maemong mangwe mo go sa tlhokafaleng, o kopiwa go buwa jalo.

Gantsi, le puso ka bo yone, e na le go kopa ikano. Mme go na le gona go ka tlhalosa sengwe, ntleng le go dira maikano ape!

Buisa: Deut. 6:13; Jesaya 48:1; Joshua 9:15; Baroma 1:9; 2 Bakorinthe 1:23 le tse dingwe.

Potso. 102

TLHALOSO (Ikano ka dilo dingwe)

Tiragatso é, e fitlhelwa thata mo Baromeng. Seno tota-tota ga se Utlwale fela jaaka motlae/motshameko, mme gape ke thogako/tlhapa, ka gonne fa o dirisa ikano e e tlhomameng, oa bo o kaya fa o ikanya Modimo ka botlalo, ebile o bo o supa fa e le Ona fela Moitse wa dipelo tsa rona. Ka jalo, go ikana ka baitshepi kgotsa ka Setshedi se sele, go raya gore, o se fa tlotlo e e sa tshwanelang, boemong go Modimo.

Buisa: Matheo 5:34-36; Baroma 9:1; Jakobo 5:12 le tse dingwe.

SONTAGA SA BO 38

103. Potso: Modimo o a reng mo taolong ya bone?

Karabo: Lwa ntlha, Modimo o laela gore tirelo ya Kereke e bong thero ya Lefoko ya ona e tshagediwe; le mo dikolong. Le gore ka lesatsi la Sabata e bong la boikhutso, ke tshwanetse go dira ka iketleetsa yotlhe go tthatlogela mmogo le phuthego kwa tempeleng go ya go reetsa Lefoko la ona, le go ya go amogela Disakaramente tsa ona, le go isetsa Morena mekokotlelo, le go ya go ntshetsa bahumanegi dineo tsa lorato. Mme lwa bobedi: ke tshwanetse go nna ke ikhutsetsa ditiro tsa me tse di bosula ka malalsi otlhe a botshelo jwa me, gore Morena a tle a ntlhotlhetse ka Moya wa gagwe go fitlha boikhutso jo bosakhutleng bo ntsheimologela mo botshelong jo.

Buisa: Tito 1:5; 2 Timotheo 3:14; 1 Bakorinthe 9:131, 14; 2 Timotheo 2:2; 3:15; Dipesalome 40:10, 11 le Dipesalome 68:27; Ditiro 2:42; 1 Timotheo 4:13; 1 Bakorinthe 14:29 le 11:33; 1 Timotheo 2:1; 1 Bakorinthe 14:16 le Jesaya 66:23.

Potso. 103(a) Molao wa bone (Letsatsi la Sabata)

TLHALOSO

Lemoga jaana gore mono ga go bolelwe ka seo o sa tshanelang go se dira ka letsatsi leno la ikhutso, fela go bolelwa ka seo o tshwanetseng go se dira. Mo letsatsing leno la ikhutso, re na le tiro eo e re emetseng, eo re tshwanetseng go e dira. RE LAELOTSWE JALO KE MODIMO. TIRO KE YA GORE RE TSHWARAGANE LE DILO TSA MODIMO.

Mono re tlhalosetswa ka ga tsotlhe tseo; di welang mo tirelong-Modimo-Thero ya Lefoko e tshagediwe; le mo dikolong; go rapelwe mmogo; go opelwe difela mmogo; go amogela Disakaramente mmogo le ba bangwe; re kope Modimo mmogo; re ipobole mmogo; re kope tseo re di tlhokang mmogo; re ntshetse bahumanegi dineo tsa lerato.

Potso. 103(b)

Ditlolo tsa rona tsa malatsi otlhe

TLHALOSO

Go ya ka botho jo bo fokolang jwa rona, re silafala tsatsi lengwe le lengwe ka ntiha ya sebe. (Potso ke e: O gopola SONTAGA SEFE MABAPI LE GOLEOFA GA RONA GA MALATSI OTLHE?) Ka jalo, leraoga gore Sabata e akaretsa botshelo jotlhe jwa gago jwa malatsi otlhe.

Kajalo, o tshwanetse go ikhutsetsa ditiro tsa gago tse di bosula ka malatsi otlhe a botshelo jwa gago. O tshwanetse gobolaya dibe tsagago (motho wa kgale) mme o nne moëa gape, o tsamaye mo botshelong jwa bo/Modimo. Seno se direga fela ka MORENA, ka tlhotlhetso ya Ona ka Moya o o Boitshepo wa Ona, mo go wena. Ka ntlha eo, o kgona gosimolla ditiro tsa gago gape mo malatsing ao a latelang Sabata, (go fitlhela boikhutso jo bo-sa-khutleng bo go simologela mo botshelong jo.)

SONTAGA SA BO 39

104. Potso: Modimo o batla eng mo taolong ya botlhano?

Karabo: O mpatla gore ke supe tlotlo le lorato le boikanyego mo go rre le mme le mo go botlhe ba ba nkokameng go ntaola; le gore ke ipeye ka fa tlase ga thuto ya bona e e molemo; ke bo ke nne le boitshoko mo makoeng a bona, gonne e le ka fa keletsong ya Modimo gore o re buse ka diatla tsa bone.

Buisa: Baefeso 6:1, 2, 5; Bakolose 3:18, 20, 22; Baefeso 5:22; Diane 1:8; 4:1; 15:20; 20:20; Ekesodu 21:17; Baroma 13:1; Diane 23:22; Genesi 9:24; 1 Petoro 2:18; Baefeso 6:4, 9; Bakolose 3:20; Baroma 13:2, 3; leMatheo 22:21.

TAO/MOLAO WA BOTLHANO

TLHALOSO

- A. Thata le Kutlo ke dintlha-kgolo tse pedi moo bophelo jotlhe bo itshetlegileng teng. Akanya fela ka ga motsadi le ngwana; morutabana le morutwana; puso le setshaba, mothapi le mothapiwa.
- B. Motswedi wa thata yotlhe le kutlo yotlhe ke lelapa. Fa mongwe a na le kutlo go motsadi wa gagwe, moo ga o ithute fela gonna le kutio go ba bangwe, mme ekare morago wa letela/emela kutio mo baneng ba gago le mo go bao ba leng ka fa tlase ga gago. Mongwe yo o ka nnang le kutlo, a ka bontsha bonolo/boikokobetso le maitseo mo go ba bangwe, fa tota a bileditswe seo.
- C. Santlha, re tshwanetse go nna le Kutlo, ka gonne Modimo o re file batsadi le bangwe ka mo godimo ga rona. O ba tsentse mo tirong/maemong/pitsong (amp) ka fa godimo ga rona, mme ka ntlha ya tiro eo ba e filweng ke Modimo, re tshwanetse go ba tlotla.
- D. Lemoga! tlotlo ya rona go batsadi ba rona le go bangwe bao ba leng bagolo mo go rona, ga se kotlo ya bokgoba e e tsidifetseng eo e gatellang. Nyaa! Ke kutlo eo e nang le lerato la ngwana. Gape, re dira seo ka gonne Modimo o rata bao o ba re neileng.
- E. POTSO KE E: Ao motho o tswanetse go nna le kutlo go batsadi ba gago le go bao ba beilweng ka fa godimo ga gago, *mo maemong otlhe* (Buisa: Ditiro4:19, 20).

SONTAGA SA BO 40

105. Potso: Modimo o laela eng mo taolong ya borataro?

Karabo: O laela gore ke se ka ka bopela kgotsa ka mataretsa mongwe-ka-nna bosula bope ka gope, le fa e le ka mafoko, le fa e le ka ditiro tsa mokgwa o sele, le gona ke se ka ka mo tlhoa kgotsa ka mo koafatsa, le fa e le go mmolaya, mme mabifi otlhe ke a ithole - le nna ka nosi ke se ka ka nna le kgopolo epe ya keletso ya boikaofatso bofe kgotsa bope ka gope. Ke ka moo Mmuso o tlhomotseng tshaka ya go thibela polao.

Buisa: Matheo 5:21, 22; 26:52; Genesi 9:6; Baefeso 4:26; Baroma 12:19; Matheo 5:25; 18:35; Baroma 13:14; Bakolose 2:23; Matheo 4:7; Genesi 9:6; Ekesodu 21:14; Matheo 26:52; le Baroma 13:4.

106. Potso: Mme ntlhang o ka re taolo e e bua ka ga polao fela?

Karabo: Ka kgalemo ya polao Modimo o re ruta gore modi wa polao ke letlhoo le kgalefo, le kilo e bile ke polao tota.

Buisa: Diane 14:30; Baroma 1:19; 1 Johane 1:11; Jakobe 1:20; Bagalata 5:19-21 le 1 Johane 3:15.

107. Potso: A mme jaanong go le kanye go tlhomama mo go reng re se ka ra bolaya bangwe-ka-rona jaaka go setse go kile ga tlhaloswa?

Karabo: Nyaa, ga go a lekana. Gonne Modimo o ganetsa lefufa le kilo, mmogo le kgakalo le kgalefo; o bile o laela gore re rate bangwe-ka-rona jaaka re ithata. Re ba itshokele, re agisanye nabo ka bopelonomi le ka boutlhwelobotlhoko le ka go ba bontsha botsalano, e le gore, re ba role mathata a bone ka natla ya rona - le go direla baba ba rona sentle.

Buisa: Matheo 22:39; 7:12; Baroma 12:10; Baefeso 4:2; Bagalata 6:1, 2; Matheo 5:5; Baroma 12:18; Luke 6:36; Matheo 5:67; 1 Petoro 3:8; Bakolose 3:12; Ekesodu 23:5; Matheo 5:44 le 45; Baroma 12:20.

MOLAO WA BOTSHELELA

TLHALOSO:

- A. Taolo e, jaaka ditaolo tsotlhe, e a akaretsa. Letlhoo le dikgopolomaswe, di akareditswe mono.
- B. Goreng fa polao, go ya ka tebello ya Sekreste, e tshwanetse go atlholwa ka loso? (Buisa: Genesi 9:6; Ekesodu 21:24).
- C. Ke mang yo o tshwanetseng go atlholela loso mo mmolaing? (Buisa: Baroma 13:4).

Potso. 106

- A. Goya ka Matheo 5:21, 22 ikutlwele gore Modimo a reng ka ntlha e. (BUIA THATA LE DITEMANA TSEO DI TLHAGISITSWENG MO POTSONG E').
- B. Gape, go na le letlhoo le le siameng. Ikutlwele mogo Ps. 139:21, 22, gore Tafita a reng. (Ithute ditemana tse ka tlhogo).

Potso. 107

- A. Le rona ka borona re na le molato wa polao, fa re ipona re se na molato kgatlhanong le tebe go ya mebele ya bangwe ka rona. Re se ka ra nna le dikakanyo, maikutlo, le maikaello a a sa siamang kgatlhanong le bangwe ka rona. O tshwanetse go rata mongwe ka wena le go mo direla tshiamo ka gotlhe. Lefufa, kilo, kgalefo, di tswe mo go rona, go sale lerato, nnete, tlotiego, tshiamo, bonolo, boikokobetso, kutlwelobotlhoko, kagiso. Seno ke seo tota molao o batlang gore re se dire.
- B. Ikutlwele gore Modimo a reng ka ga baba ba rona mo go Matheo 5:43;46, mme o buise ditimana tseo di tlang ka fa ltase ga potso le karabo 107.

SONTAGA SA BO 41

108. Potso: Taolo ya bosupa e re ruta eng?

Karabo: E re ruta fa Modimo o hutsitse itshekologo yotlhe - le gore le rona re e ile mme re tshetele mo bophepeng - e bong bophepa jo bo mo lenyalong le le boitshepo kgotsa kwa ntle ga lona.

Buisa: Lefitiko 18:28; Juda 23; 1 Bathesalonika 4:3-5; Bahebera 13:4 le 1 Bakorinthe 7:7.

109. Potso: A mo taolong e, Modimo o kgalemela kgokafalo le masula a a ntseng jalo fela?

karabo: Gonne mebele ya rona le meya ya rona e le ditempele tsa Moya o o Boitshepo / ke ka moo o rata gore re tshegeste bophepa le boitshepo - mme o kgalemelela itshekologo yotlhe, le dipuo tse di bosula, le megopolo e e maswe; le dikeletso tse di bosula; ee, le tsona tsotlhe tse di isang thaelong.

Buisa: Baefeso 5:3, 4; 1 Bakorinthe 6:18-19; Matheo 5:27, 28; Baefeso 5:18 le 1 Bakorinthe 15:33.

MOLAO WA BOSUPA

TLHALOSO

Potso. 108

- A. Ka metlha TIABOLO o ruta motho gore a dire ka gorata/goitaola mabapi le maikutlo a bonna/bosadi. Seno se tsisa boitaolo le botlhaswa, tseo eleng lenyatso le tlontlollo mo go seo Modimo o se ikaeletseng mo maikutlong a bonna/bonamagadi. Ka go dira jalo, motho o ipaya mo rnaemong a phologolo, le go ipaya ka fa tlase ga bophologolo. Ka go dira jalo, motho o gaiswa ke phologolo ka boitshwaro – o latlha botho
- B. Modimo o bopile motho gore a nyale, mme a dirise maikutlo a bonna/bosadi ka tsela e e siameng, ya botho, eseng ya bophologolo mme o tlhomile lenyalo gore (motho) a

tsamaise/dirise maikutlo. Go sego lekau le lekgarebe bao ba itsholang ba phepafetse. Ka tshhegofatso ya Modimo, lenyalo la bona e nna Paradeisi mo iefatsheng.

- C. Modimo o file motho seaparo le maikutlo a go swaba (ditlhong) jaaka thebe/seitshireletso kgatlanong le sebe, godimo ga molao wa bosupa. Ke kamoo TIABOLO a dirang matsapa otlhe go apola motho le go mo tlosa maikutlo a goswaba/ditlhong. Gantsi, go tlhoka ditlhong ke sesupo sa banna le basadi mo diaparong tse dikhutswane, mo go thumeng, mo mabopong a lewatle/dinoka, le mo mebileng tota.
- D. Buisa: 1 Bakorinthe 6:18-20, mme o utlwe gore "tanse" e ntse jang, goya ka molaetsa o.
- E. DIBAESKOPO LE TV di na le mosola le maswe (tshiamo le tshiamololo). **TLHALOSA**

Potso. 109

- A. Jaaka ditaolo tse dingwe, taolo é le yona e akaretsa tsotlhe tseo di nang le seabe mo tirong é - jaaka ditakatso tse dibosula, dipuo le megopolo e e maswe, dipuo tse di maswe.
- B. Utlwa gore Krete a reng mo go Matheo 5:27, 28, mme o ithute ditemana tseo ka fa pelong.

SONTAGA SA BO 42

110. Potso: Modimo o iletsa eng mo taolong ya borobedi?

Karabo: Mo taolong e, Modimo ga o thibele go utswa fela, e leng seo mmuso le one o se otlhayang; mme o bile o bua gape le ka bogodu le ditiro tsotlhe tse di bosula, le megopolo ya boferere e re e gopolang - e bong dikgopolo tsa go ithuela di-tsa-bangwe-ka-rona ka maano a go tshosa dikgoka kaketso, jaaka dikakanyo tsa phoro, boitsalanyo jwa itimokanyo, go ikatisetsa madi mmogo le tjojo le go jabetsa kgotsa mokgwa mongwe le mongwe o Modimo o gananang nao - Godimo ga moo gape Modimo o kgalema le jone bopelotshetlha, le go dirisa dineo tsa one ka mokgwa o o sa tlhomamang.

Buisa: 1 Bakorinthe 6:10; 1 Bakorinthe 5:10; Jesaya 33:1; Luke 3:14; 1 Bathesalonika 4:6; Diane 11:1; 16:11; Esekiele 45:9, 10; Doiteronomio 15:13; Dipsalome 15:5; Luke 6:35; 1 Bakorinthe 6:10; Diane 23:20, 21; Diane 21:20.

111. Potso: Mme Modimo o go laela eng mo taolong e?

Karabo: O ntaela gore ke thuse mongwe-ka-nna ka gotlhe ka fa nka kgonang ka teng, le gore ke mo tshole sentle ka mokgwa o le nna ke ratang batho ba ntshola ka ona; gape le gore ke dire ka boikanyego gore ke kgone le go thusa batlhoki.

Buisa: Matheo 7:12 le Baefeso 4:28.

MOLAO WA BOROBEDI

TLHALOSO

Potso. 110 & 111

1. Molao wa borobedi o kaya dintlha tse di latelang tse:

- (a) se ka wa utswa dilo tsa mongwe ka wena (moagisanyi wa gago).
- (b) Dilo tsa mongwe ka wena le tsa gago, ke tsa Modimo.
- (c) Molao o, ga o ame fela ditiro tseo puso e di atlholang, mme o ama tshiamololo/bosula bongwe le bongwe joo bo amang tshiamo/tolamo/nnete.
- (d) Mo dilong tsa mongwe ka wena, o se ka wa nna lonya/lefufa. Ka metlha o mo thuse gotswetsa maekaello a gagwe le go sireletsa/gofapha/go kganela ditshenyegelo tseo di ka mo tlhagelang, ka gonne o tshwanetse go mo rata, go bontsha lerato la gago mo go ena. Tsena ke tseo di siameng tseo molao ó o di batlang mo go wena.

2. Dilo tsa gago/leruo la gago ke la Modimo - ka jalo o tshwanetse go le kgobokanya/go le batla le go le rua, le go le dirisa sentle (you must acquire it, possess it and spend/use it correctly). Seno se kaya gore, o se ke wa tswa pelo, o se ke wa nna botlhaswa/wa senya/lesalaga ka dilo tseo. Ke wena molebeledi/motlhokemedi wa dilo tsa Modimo.
3. Buisa Maleagi 3:8, o ikutlwele gore ga tweng ka mongwe yoo sa ntsheng dikabelo tsa gagwe go Modimo! Ao le wena o ntse jalo? (o tia nna jalo?)

SONTAGA SA BO 43

112. Potso: Taolo ya borobongwe e batla eng?

Karabo: E mpatla gore ke se ka ka supela ope ka kako - le fa e le go sokamisa mafoko a ga ope - le e seng go tsuolola kgotsa go mo atlhola ka gope. - Mme ke itse fa maka le tsietso e le ditiro tsa ga Satane - ke di ile gore ke tle ke ithole bogale jwa Modimo - le gore ke rate tshiamo le boammaaruri - ke bue tolamo - mme ke ipobole ditlolo; ke be ke sireletse ditshiamelo tsa mongwe-la-nna ka natla ya me yotlhe.

Buisa: Diane 19:5, 9; Diane 21:28; Dipesalome 15:3 le 50:19,20; Baroma 1:30; Matheo 7:1; Luke 6:37; Johane 8:44; Diane 12:22; 13:5; 1 Bakorinthe 13:6; Baefeso 4:25 le 1 Petoro 4:8.

MOLAO WA BOROBONGWE (MAKA)

TLHALOSO

Dintlha tse pedi tsa molao ó ke gore: (a) O se ka wa buwa maka. (b) O buwe nnete. Re tshwanetse go-itse le go-dumela gore maka a tswa mo go tiabolo - Ke tlhotlheletso ya ga tiabolo - tiabolo ga a na nnete le ka gope. Buisa Genese 3:4 & 5, mme oa kwalolle.

LEMOGA! Maka ke puo eo e tswang mo mothong ka loleme lwa gagwe. Ke tokollo e e makatsang, eo e dirang tshiamo le tshiamololo, mo mmeleng. Ka loleme, motho o tsisa/(buwa) kagiso; gape o tsisa ntwaga; o buwa nnete le maka; o buwa tsa lerato le letlhoo jj. Buisa Jakobo 3:112, ka kelotlhoko, mme o ithute mokgwa wa loleme. Tsotlhe tsa tshiamololo, ke thaelo ya tiabolo.

Ka jalo mongwe le mongwe o tshwanetse go ithokomela fa a buwa ka metlha, gore a se buwe maka, mme a buwe nnete/tshiamo, ka gonne sengwe le sengwe seo motho o se buwang, se emetswe ke katlholo ya sona motlha letsatsi la Katlholo. Buisa Matheo 13:36 & 37, mme oa kwalolle.

SONTAGA SA BO 44

113. Potso: Taolo ya bolesome e re alela eng?

Karabo: E re laela gore go se ka go ba go re le ka mothla ope ga nna le keletso mo dipelong tsa tona kgatlanong le taolo epe ya Modimo; le gore ka maikutlo otlhe re ilane le dibe tsotlhe go ya go ile; mme re rate tshiamo.

Buisa: Baroma7:7.

114. Potso: A mme jaanong ba ba tlabologetseng Moreneng, bona ba ka tshegetsisa ditaolo tse ka botlalo?

Karabo: Nyaa, gonne le bone baitshepi ka bosiga ba na kutlo e e tletseng fa ba sa ntse ba le mo botshelong jono - le fa go ntse jalo ba na le boikemisetso jwa go simolola go tshela ka fa ditaolong tse tsotlhe, e seng tse dingwe fela.

Buisa: 1 Johane 1:8; Baroma 7:14, 15; Moreri 7:20; 1 Bakorinthe 13:9; Baroma 7:22 le Diepsalome 1:2.

115. Potso: Ke go reng fa jaanong Modimo o re itsise melao e e lesome e ka bogale jo bo kanakana mo e keteng ga go ope yo a ka e tshegetsang?

Karabo: La ntlha ke ka gonne mo botshelong jwa rona jotlhe re tshwanetse gore ikutlwa fa re le ba losika lwa tefo - mme ke ka moo re ka itseng go ithuta ka tlhoafalo, ra ba ra nna le keletso ya itshwarelo ya dibe le go batla tshiamelo mo go Keresete. - Gape le gore re tlaa dira ka tlhoafalo re iketleeditse, re rapela go kopa le tshegofatso ya Moya o o Boitshepo, go tla be re ntshafadiwa motsetshwanong sa Modimo - mme re tla fitlha botshelong morago ga jo.

Buisa: Baroma 3:20; Johane 1:9; Dipesalome 32:5; Matheo 5:6; Baroma 7:24. 25; 1 Bakorinthe 9:24; Bafilipi 3:12-14.

TAELO YA LESOME (KELETSO YA BOSULA)

A. TLHALOSO

Fano re tlhalosetswa ka ga go eletsa go go bosula. Lemoga! motho a ka eletsa go nna le koloi, e le keletso eo e siameng ya gore, motlha ke dirang, ke nnang le madi, ke ya go reka koloi, ka ntlha ya mabaka ano le ale. Ka go rialo, motho yo o kopa Modimo gore o mo thuse, a gole, a tle a itirele, mme atle a kgone goithekela koloi ya gagwe. Eno ke keletso e e siameng.

Mme keletso e e sa siamang ke ya gore o bone sengwe sa mongwe, mme o eletse gore e kabo e le sa gago, o se swatole mo go ena.

Ka jalo, Modimo o ganetsa keletso e e jalo ya bosula, mme o dumellana le eo e siameng. O tshwanetse go itumella tsotlhe tseo di siameng.

Molao ó, ke tshwetso/phelletso ya melao yotlhe, le boteng teng jwa yona. LEMOGA! tiro nngwe le nngwe ya bosula, e tswa mo keletsong e e maswe, ê e bosula eo e kgalemelwang mono ke Modimo. (Buisa: Genesi 3:6 - mme o e kwalolle.)

B. TSHEGETSO YA MOLAO

A re lemoge gore le fa re ka re re tlhabogetse go Modimo, ga re kake ra kgona le ka motlha ope go tshegetsana ditaelo tsa Modimo, gonne ga re na kutlo e e tlatseng, fa re sa ntse re le mo botshelong jono. Lebadi la sebe le sa mpe le baba; tiabolo o ntse a re raela. (O gopola Songata se fe mono/fano fa ka ga bomadimabe jwa rona?) BUISA: Baroma 7:19.

Le fa go le jalo, re na le boikemisetso jwa go simolla go tshela ka fa ditaolong tse tsa Modimo tsotlhe, e seng dingwe tsa tsona fela; boikemisetso jo, bo tswana le phatsana ya peo e nnyane mo gare ga matlapa, mme morago e mele, e nne peo e ntsi. Jaaka ge re boletse, motho ga a tshwanela go kgetha melao eo e mo natefelang fela. O na le boikarabelo jo bogolo jwa gotshegetsana ditaelo tsotlhe tsa Modimo. BUISA: Baroma 7:14-25. Ka iketlo & 1 Bakorinthe 13:9.

C. LEMOGA

Ntleng le Molao wa Modimo, ga re kake ra phela ka tshiamo - ka gonne:

- (a) Ga re ka ke ra kgona go itse bogolo jwa dibe tsa rona le bomadimabe jwa rona.
- (b) Ga re ka ke ra kgona go itse ka fa re ka gololosegang ka teng mo dibeng tse le mo bomadimabeng jo.
- (c) Ga re ka ke ra kgona go itse go phela ka tebogo go Modimo mo kgolosegong ya rona. (O gopola Sontaga se fe?) Go rialo, ke gore re tshwanetse go amogele gore re ba losika kwa ga Adama.

Ka go itse le go amogela jalo, re tlaa dira ka tlhoafalo e kgolo, re rapela go kopa boitshwarelo, le tshegofatso ya Moya o Boitshepo, go re ntshafatsa mo setshwanong sa Modimo.

Buisa: Baroma 3:20; 1 Johane 1:9; Dipesalome 32:5; Bafilipi 3:12-14.

SONTAGA SA BO 45

KA GA THAPELO

116. Potso: Ke ka ntlha ya eng thapelo e le botlhokwa mo Bakereseteng?

Karabo: Ke ka gonne thapelo e le yona tsela e re ka isetsang Modimo ditebogo ka yona. Le gore ke ka gonne bopelotlhomogi jwa Modimo le Moya o o Boitshepo di Potso.a bao fela ba ba o rapelang ka pelo yotlhe, ba ba o leboga.

Buisa: Dipesalome 50:14; Matheo 7:7; Luke 11:9, 13; Bathesalonika 5:17.

117. Potso: Ke eng se se mo thapelong e e kgatlang Modimo le o e reetsang?

Karabo: La ntlha ke gore: Ka pelo yotlhe re kope Modimo wa nnete, ona o o re itshenoletseng mo Lefokong la ona, mabapi le tsotlhe tse o re di laetseng go di rapelela.

La bobedi ke gore: Re tshwanetse go itse tse re di tlhokang, le bomadimabe jwa rona ka botlalo - gore re tle re tise go ipobola fa pele ga sefatlhego sa kgalalelo ya ona.

La boraro ke gore: Re nne le tlhomamiso ya gore le fa re ne re sa tshwanelwa mme ka ntlha ya ga Keresete Morena wa rona, ruri o utlwa merapelo ya rona jaaka o re solofeditse mo Lefokong la ona.

Buisa: Tshenolo 19:10; Johane 4:22-24; Baroma 8:26; 1 Johane 5:14; Jakobo 1:5; Johane 4:24; Dipesalome 145:18; 2 Ditiragalo 20:12; Dipesalome 2:11; 34:19; Jesaya 66:2; Baroma 10:14; Jakobo 1:6; Johane 14:13; Daniele 9:18 le Matheo 7:8 le Dipesalome 27:8.

118. Potso: Modimo o re laetse gore re o kope eng mo thapelong?

Karabo: O re laetse gore re o kope tsotlhe tse di tlhokwang ke moya le mmele, e bong tse Morena Keresete a di sobokantseng mo thapelong e o e re rutileng, ka esi.

Buisa: Jakobo 1:17 le Matheo 6:33

119. Potso: Thapelo eo e a reng?

Karabo: E a re: Rara wa rona yo o kwa legodimong, Leina la gago a le itshepisiwe; Bogosi jwa gago a bo tle; Go rata ga gago a go dirwe mono lefatsheng jaaka fa go dirwa kwa legodimong. O re fe gompiano sejo sa rona sa letsasi, Mme o re itshwarele melato ya rona, jaaka le rona re itswarela ba ba nang le melato le rona. O se re gagele mo thaelong. Mme o re golole mo go o o bosula; gonne Bogosi ke jwa gago, le thata, le kgalalelo; ka bo se na bokhutlo. AMEN.

Buisa: Matheo 6:9-13 le Luke 11:2-4.

KA GA THAPELO

Potso. 116 TLHALOSO

A.I. Fa re lebella boteng jwa thapelo, go na le mefuta e le mebedi ya thapelo kgotsa dintlhakgolo tse pedi mo thapelong nngwe le nngwe, ebong:

1. Thapelo ya tebogo: Teng moo, re leboga Modimo godimo ga kgololo ya rona, le dineo tsotlhe tsa mmele le moya tseo a re fang tsona.
2. Thapelo ya kopo: Teng moo re kopa Modimo tsolhe tseo re di tlhokang go re fa tsona (le ba bangwe). Go kopa ke sesupo le itemogo ya rona gore re ba Modimo, re ka fa tlase ga taolo le thata ya Ona; gape ke sesupo sa tebogo ya rona go Ona gore ke Rara wa rona ka Morena Jesu.

A.II. Go rapella kutlwelobotlhoko (mohau) le Moya O Boitshepo ke sengwe se se kgonagalang

ka gonne ke dilo tseo motho a setseng a di amogetse. Kwa ntle ga Moya O Boitshepo, motho ga a kake a kgona go rapela. Seno ke nnete eo re ka se kgoneng go e tlhaloganya, mme re tshwanetse go e kgomarela jaaka bana.

Buisa: Luke 11:9 & 13, Dipesalome 50:14; Bathes. 5:17 jj.

Potso. 117

B. TLHALOSO (THAPELO EO E TSHWANETSENG MODIMO)

Gore re rapele sentle, ka tsela eo e tshwanetseng:

(a) re tshwanetse go itse Modimo sentle, gore ke o na fela Modimo wa nnete, wa boikanyego le wa lerato. Mme seo/kitso eo re ka kgona go nna le yona fela fa re itse BEIBELE, re e buisa ka gale, gonne ke gona moo Modimo o buwang le rona teng; gape re ka kgona go itse le go utlwa Modimo fa re tsamaya ditshebeletso tsa kereke ka gale, gonne ke moo Modimo o re fang melaetsa teng ka barongwa ba Ona.

(b) Sa bobedi, gore re rapele sentle, re tshwanetse go ikitse/go itlhaloganya sentle. Seno re ka se kgona fela ka go itse dibe le bomodimabe jwa rona. Re itse, re be re amogele fa re le baetsadibe; re se ka ra ipona re siame. Ka go itse le go amogela jalo, ga re ka ke ra swaba go tla fa pele ga Modimo go ipobola bomadimabe jwa rona.

Buisa: Luka 18:9-14 sentle. (Ga tweng moo go ya ka thapelo ya nnete?)

(c) Sa boraro, re tshwanetse go ema re tiile, re sa belaele gore Modimo o utlwa thapelo ya rona, ka ntlha ya ga Krete fela, Moreswedi. Kgangkgolo ke gore, rona mo thapelong, ga re a tshwanela go itshoga, kgotsa go ipelaela, ka go nne Karabelo ya Modimo ga e diragale ka ntlha ya rona, mme e teng fela ka seo Krete a re diretseng sona, (gore swela mo sefapanong).

Buisa: Johane 15:7 le o e kwalollo - BATLA DIBUKA TSE DINGWE GAPE TSA MOLAETSA O.

Potso. 118 (TSEO MODIMO O RE DI LAETSENG GO DI MO KOPA)

TLHALOSO

Go rapela ke taelo ya Modimo, mme ga se boithatelo jwa rona. Modimo o re laetse gore re mo rapele. Go seng jalo, thapelo e ne e tla re go sa leng e be e se na mosola ope, e sa utlwagale. Modimo o re tlhokomela mmele le moya. Ka moo re tshwanetse go rapella tsotlhe tseo re di tlhokelang mewa le mebele ya rona.

Gantsi re tsaya ditshwetso ka borona tseo la bofelo di re swabisang, ka gonne re dirile jalo kwa ntle ga thapelo, re sa kopa Modimo.

Thapelo ke kopo ya tsela, lesedi la sengwe le sengwe seo re ratang go se dira. Ka jalo, thapelo le tiro di tsamaya mmogo, ga di kgaogane ka gope. (RAPELA MODIMO PELE O DIRA SENGWE.)

LEMOGA: Seno se kaya gore motho wa nnete, wa modumed, ga a rapele fela motlha ena a ikutlwang go rapela.

Potso. 119 (ITHUTE THAPELO E MME O SE TSWAFE GO RAPELA LE KA MOTLHA OPE.)

SONTAGA SA BO 46

120. Potso: Ke ka ntlha ya eng fa Keresete a na a re laela go bitsa Modimo :Rara wa rona?"

Karabo: Ke gore e re fela kwa tshimologong ya thapelo ya rona, re nne le maikutlo a bongwana a go ikanya le go boifa Modimo seo ke ona motheo wa thapelo ya rona - Ke gore Modimo o ntse Rraetsho ka Keresete - mme a rata go re fa tse re di kopang ka thapelo ya nnete go gaisa ka mokgwa o borraetsho ba

selefatshe ba ka re direlang ka teng.

Buisa: Matheo 7:9-11 le Luke 11:11-13.

121. Potso: Ke ka ntlha ya eng fa go bile go okeditswe ka gore: "Yo o kwa legodimong?"

Karabo: Ke gore: le ka motlhaope re se ka ra ba ra lekanyetsa sepe sa bogosi jwa Modimo ka tsa selefatshe; le gore ka thata ya ona re nne le tsholofelo ya go ka amogela tsotlhe tse di tlhokwang ke mmele le moya.

Buisa: Jeremia 23:23, 24; Ditiro 17:24, 25, 27 le Baroma 10:12.

Potso. 120: KRESTE A RE RE RE; RARA WA RONA

TLHALOSO

Kreste ke KGORO, KGATO eo re tsenang ka yona fa re ya kwa Modimong. Le mo thapelong go ntse fela jalo. Le fa Leina la gagwe Kreste, le sa tlhagelle gope mo thapelong e, ke ENA a re fileng RARA WA RONA yo ka boena, ka go re swela mo sefapanong, gore re se ka ra nna bana ba ga TLABOLO.

Fa re bitsa Leina, RARA, Modimo o nna gaufi le rona thatathata. Rona ka borona, re nna gaufi jaaka METSWALLE LE Jaaka BANA ba Ona. GOPOLA fela ka ga wena, o le ngwana fa pele ga motsadi wa gago: o nna le boikanyego, le tlotlo maitseo mo go ena motsadi wagago. KA JALO, FA PELE GA MODIMO GONA??

Buisa: Math. 7:9-11 le Luk. 11:11-13.

Potso. 121 (YO O KWA LEGODIMONG)

TLHALOSO

A re itseng jaana gore Modimo ke RARA wa rona, mme ga se motho. Re gopole ka metlha yotlhe gore ke Modimo, mme rona re tshwanetse go mo tlotla, le go mo obamela ka metlha yotlhe. Modimo jaaka MOGODIMO yo o dulang kwa legodimong, ke MOTHATAYOTLHE, yo o kgonang go dira tsotlhe, go tswa kwa go Ona. Ga go na thata/puso epe ya lefatshe eoe ka lekanngwang le bogolo/thata ya ONA.

Buisa: Jer. 23:23, 24; Dit. 17:24, 25, 27; 13 Bar. 10:12.

SONTAGA SA BO 47

122. Potso: Thapelo ya pele ke efe?

Karabo: Ke e e reng: "Leina la gago a le itshepisiwe" - e bong mo go rayang gore Modimo o re neye kitso ya go o itse ka tlhomamo. - Mme mo tirong tsotlhe tsa *one* re o galaletse ka ntlha ya tlhalefo, le tshiamo, le kutlwelobotlhoko, le bonatla jwa one jwa boammaaruri, le bonatla jwa one kgalalelong. Le gore rona, mo botshelong jwa rona jotlhe re siametse ditiro tsa rona, le mafoko a rona, le megopolo kgotsa metsamao ya rona; gore Leina la gagwe le se ka la tsuologa ka ntlha ya rona, mme le Potso.e tlotlo le pako.

Buisa: Johane 17:3; Jeremia 9:24, 31. 33. 34; Matheo 16:17; Jakobo 1:5; Dipesalome 119:105, 137; Luke 1:46, 47, 68, 69; Baroma 11:33; Dipesalome 71:8; 115:1.

Potso. 122 (THAPELO YA PELE)

LEINA LA GAGO A LE ITSHEPISIWE

TLHALOSO

Leina la Modimo le itshepile, le a galalela, mme le tla nna jalo ka bosakhutleng. Rona ga re ka ke ra le itshepisa go feta ka moo le leng ka teng. Ka jalo re rapela jaana gore:

- (a) Re itse Leina la Gagwe fa le itshepile, mme re le gopole jalo jaaka Ona Modimo o itshenotse mo lefatsheng la Ona.
- (b) Re lemoge gore thata yothle, botlhale, tshiamo, bonnete, kutlwelo-botlhoko, ke tseo di bonwang mo ditirong tsotlhe tsa Modimo, tseo di dirang gore re lemoge Modimo sentle, re Mo belafalle, re Mo itumelle, re MO rorise. Ka jalo re tshwanetse go mo itse, le go mo galaletsa mo ditirong tsa Ona.

Buisa: Dipes. 71:8; 115:1; 119:105; Jer. 9:24, 31, 33, 34; Math. 16:17; Luk. 1:46,47,68,69; Joh. 17:3; Bar. 11:33.

SONTAGA SA BO 48

123. Potso: Thapelo ya bobedi ke efe?

Karabo: Ke e e reng: "Bogosi jwa gago a bo tle"; e bong mo go rayang gore Modimo o re buse ka Lefoko la ona le ka Moya wa ona - gore re nne ba ona ka bosakhutleng. Le gore Modimo a tlamele Kereke o bo o e atise, o thuge ditiro tsotlhe tsa mmaba le puso tsotlhe tse di leng kгатlhanong nao; ee, le mano otlhe a thaelo a a iketleeletsang go kгатlhana le Lefoko la ona le le.

Boitsbepo, go fitlhela botlalo jwa puso ya ona bo be bo tle, - e bong motlhang Modimo o tla nnang tsotlhe mo go botlhe.

Buisa: Dipesalome 143:10 le 119:5; Matheo 6:33; Dipesalome 51:20 le 122:6; 1 Johane 3:8; Baroma 16:20; Tshenolo 22:29; Baroma 8:22, 23 12 1 Bakorinthe 15:28.

Potso. 123 (THAPELO YA BOBEDI) PUSO YA GAGO A ETLE

TLHALOSO

- A. A re lemoge jaana gore KEREKE ke yona MOTHEO/TSHIMOLOGO/KUTU ya TSHIAMISO YA PUSO YA MODIMO. Modimo a siamisa Puso ya Ona ka go fedisa pusoya TIABOKLO.
- B. MO tshiamong e ya puso ya Modimo, Modimo O dirisa rona batho ba Gagwe jaaka masole a Gaagwe. Rona batho ba Modimo (badumedi, bakreste), re KEREKE eo e kгатrathang (eo e lwang). Re tshwanetse go dira ka thata gore KEREKE puso e ya Modimo e gole, e ntsifale.
- C. Lesole ka bolona le tshwanetse go nna le kutlo, go dira seo le se laolelwang. Ka metlha ga re ikobele Modimo go tswa ka fa dipelong tsa rona, moo e e leng boagelo jwa dibe tsa rona.
- D. Lesole le tshwanetse go sireletsa Kereke ya lona kгатlhanong le go wa, go phutlhama le go tlaselwa ke dira. Ke teng moo, mo moruti, mogolo, le motlhanka, ba tshwanetseng go nna le tshwaragano; ba dirisane mmogo, ba thusane mo tirong e ya Modimo, eleng go disa Kereke ya Modimo. Seno ke tiro ya Modimo, mme bona ke barongwa ba Ona.
- E. Lesole la nnete mo Kerekeng ya Modimo, le tshwanetse go godisa Kereke ya lona. Eno ke tiro ya Modimo tota, mme Ona O dirisa batho ba Ona ba O bakgetileng go dira tiro é ya borongwa, mme bona ba tshwanetse go dirisana mmogo mo go yona.
- F. Modimo O tshwanetse go senya le go phatlatsa ditiro tsa ga TIABOLO le bathusi ba gagwe, ka maikaello a gore puso ya Ona e gole e be e ananele.
- G. Puso ya Modimo go le nnete e tlaa gola thata, e tlaa, e natlafala, mme e gape puso ya TIABOLO. Seno se tlaa itshupa motlhang Krete a tlang gape, eleng KGOSI ya rona godimo ga maru a legodimo.
- H. Gore go tle go nne jalo mo go rona, re tshwanetse go rapela ka thatathata.

Buisa: Dipes. 143:10; 119:5; 51:29; 122:6; Math. 6:33.

SONTAGA SA BO 49

124. Potso: Thapelo ya boraro ke efe?

Karabo: Ke e e reng: "Go rata ga gago a go dirwe mono lefatsheng jaaka fa go dirwa kwa legodimong."

Mme moo go bo go raya gore: Rona le ba botlhe, Modimo o re neye kgopolo ya go se dire ka fa go rateng ga rona - mme kwa ntle ga kganetso epe, re dire fela ka fa go rateng ga ona - e le gore mongwe le mongwe a nne boikanyo mo maemong a gagwe fela jaaka baengele le bone ba dira kwa legodimong.

Buisa: Matheo 16:24; Tito 2:11, 12; Luke 22:42; Baefeso 5:10; Baroma 12:2; 1 Bakorinthe 7:24 le Dipesalome 103:20,21.

Potso. 124 (THAPELO YA BORARO) - "THATO YA MODIMO"

TLHALOSO

A. Fano re tlhalosetswa DITHATO tse PEDI tsa Modimo, ebong:

(i) Thato e e mo phatlalatseng.

(ii) Thato e e fitlhegileng.

1. Thato e e phatlalatseng/e e mo pepeneneng, re e itse go tswa mo LEFOKONG Jwa Ona. (BEIBELE). Teng moo, Modimo O re laela ka moo re tswanetseng go itshola ka teng gore re mo tlotlise.

2. Thato e e fitlhegileng ya Modimo, ga e itsege ka gope mo go rona. Go raya gore tsotlhe di diragala go ya ka fa Ona o ratileng, oratang, le ka fa o tiaa ratang ka teng mo THULAGANYONG YA ONA YA BOSAKUTLENG?

B. Go ya ka Katikisima, mo thapelong eno, go gateletswe thata go THATONG ya Modimo e e mo pepeneneng. Re rapela jaana gore o re dire bao ba re nang le KUTLO ka thata ya Ona go ya ka fa taelong ya Beibele.

C. Mo thapelong é, rona ka borona re ithapella gore BORONA BO TLOGE, mme re nne le KUTLO fa pele ga Modimo.

D. Thapelo eno e akaretsa ditiro tsa malatsi otlhe tsa rona, mo botshelong jo. Tiro ya me, go yoo ke mo direlang, ke PITSO/TAELO E E TSWANG MO SEATLENG SA MODIMO. Ka jalo ke tshwanetse go e dira ka mafolofolo le ka botshepegi, fela jaaka baengele ba dira tiro ya bona kwa legodimong.

E. Buisa Luk. 22:42, mme o utlwe gore ao thapelo ya ga Krete e tshwana le thapelo eno. Buisa le MORERI 9:10, me o utlwe gore yona e amana jang le thapelo e.

Buisa: Ps. 193:20, 21; Math. 16:24; Luk. 22:41; Barona 12:2; 1 Bakor. 7:24; Baefeso5:10.

SONTAGA SA BO 50

125. Potso: Thapelo ya bone ke efe?

Karabo: Ke e reng: "Re fe gompiano sejo sa rona sa letsatsi".

Moo go supa gore re batla tsotlhe tse di tlhokwang ke mebele ya rona mo Modimong - e le gore re itse ka gona fa e le ona fela motswedi wa tse di molemo - le gore: go ipabalela ga rona kgots go dira ga rona, le fa e ka nna dineo tsa ona, fela fa di se na tshegofatso ya Modimo, ga di kitla di re tswela molemo ka gope. Le gore re tiiose ikanyo ya rona mo dibopiweg tsotlhe mme e e bee mo go ene fela.

Buisa: Dipesalome 145:15 le 104:27; Matheo 6:26; Jakobo 1:17; Ditiro 14:17; 17:27; 1 Bakorinthe 15:58; Doiteronomio 8:3; Dipesalome 37:16; 127:1, 2; 55:23; 62:11; 146:3; Jeremia 17:5, 7.

Potso. 125 (THAPELO YA BONE) "SEJO SA MALATSI"

TLHALOSO; LEMOGAJAANA:

Sejo sa tsatsi lengwe le lengwe, ke gotlhe goo go tshwanetseng mmele wa gago. Seo ga sea tshwanela GO TLHAELA, le e seng GO NNA MOTLELE.

Modimo ke MOTSWEDI wa tsotlhe tseo re nang le tsona mo lefatsheng. Kwa ntle go tshagofatso ya Modimo, motlele le khumo ya motho mo lefatsheng, ke lefela la mafela. Tsotlhe tse, di ka go koafatsa, tsa go diga, tsa go dira sekatana mo moeng.

I POTSE FELA GORE KE GORENG FA WENA MOTHO O TSHWANETSE GO RAPELLA DIJO TSE DI FA PELE GA GAGO MO TAFOLENG ... PELE O DI JA

Buisa: Ps. 127; 145:15; Jer. 17:5, 7; Math. 6:26; Ditiro 14:17; 1 Bakorinthe 15:58; Jak. 1:17, le tse dingwe.

SONTAGA SA BO 51

126. Potso: Thapelo ya botlhano ke efe?

Karabo: Ke e e reng: "Re itshwareele melato ya rona, jaaka le rona re itshwarela ba nang le melato le rona."

Mo go raya go re: Ka ntlha ya madi a ga Keresete Morena wa rona, a boleo jwa rona, le botlhoka-itshwaro jwa rona, thaelesego ya rona e e re manameng ka metlha, re se di balelewe; - fela jaaka le mo go rona re bona bosupi jo jwa bopelotlhomogi jwa gago ka go itshwarela bangwe-ka-rona ka pelo yotlhe.

Buisa: Dipesalome 51:3 le 143:2; 1 Johane 2:1; Baroma 8:1 le Matheo 6:14.

Potso.126 (THAPELO YA BOTLHANO) "MELATO YA RONA" TLHALOSO

Melato ya rona ke ditiro tsotlhe tsa rona tseo di sa siamang fa pele ga Modimo, le bangwe ka rona; le ditshila tsotlhe tseo di re kgómaretseng. Go itshwarelwa ke gore Modimo o se di tlhokomele; o se di lebele/o se di tsee tsia, etswa di ntse di le teng. LEMOGA . . . Ga go na itshwarelo ya dibe tsa rona eo e ka kgonagalang kwa ntle ga MADI A GA KRESTE . . . (Goreng, fa o bona?)

Ka ntlha ya gore dibe tsa rona di itshwaretswe, le rona re tshwanetse go nna le maikutlo a go itshwarela bangwe ka rona, go tswa botebong jwa dipelo tsa rona. Go nna le maikutlo a go itshwarela bangwe ka rona, ke sesupo sa gore ke ona maungo a gore dibe tsa rona di itshwaretswe. Buisa Math. 18:15;35 sentle, o utlwe gore ao o tlhologanya sentle ka ga itshwarelano ya dibe tsa rona.

Buisa gape: Ps. 51; 143:2; Baroma 8:1; 1 Johane 2:1 le tse dingwe.

SONTAGA SA BO 52

127.Potso: Thapelo ya borataro ke efe?

Karabo: Ke e e reng: O se re gogele mo thaelong, mme o re golole mo bosuleng."

Ka go rialo go raya go re: E re ka ga jaana rona ka rosi re le bokoa go ka ikemela, le gore baba ba rona, e bong Satane le lefatshe, mmogo le yona nama ya rona ka yosi, di sa wetseng go re tlhasela, re eletsa go ka tiisiwa ke Moya o

o Boitshepe gore re tle re se ka ra koafala ka gope mo ntweng ya semoya, mme ra fenngwa. Mme re nne re natlafaditswe ka nako tsotihe, go fitlhelela bofelong re feny.

Buisa: Johane 15:5; Dipesalome 103:14; 1 Petoro 5:8; Baefeso 6:12; Johane 15:19; Baroma 7:23; Bagalata 5:17; Matheo 26:41; Mareko 13:33; 1 Bathesolonika 3:13; 5:23.

128. Potso: O feleletsa jang thapelo ya gago?

Karabo: Ka re "Gonne bogosi ke jwa gago, le thata, le kgalalelo, ka bo se na bokhutlo." Gonne tsotlhe re di kopa mo go wena, gonne wena jaaka Kgosi ya rona le Mothatayotlhe wa rona, o na le thata le natla ya go re naya tsotlhe tse di molemo; e le gore Leina la gago le le boitshepo le tle le bakwe ka bosakhutleng; e seng la rona.

Buisa: Baroma 10:12; 2 Petoro 2:9; Johane 14:13; Jeremia 33:8, 9; Dipesalome 115:1.

129. Potso: Lefokonyana le le reng: "AMEN" le raya eng?

Karabo: Le raya go re: Mo botlalong jotlhe, Modimo o utlwile thapelo ya me go feta ka fa ke ikutlwang ka teng, tebong le topong ya me mo go ona.

Buisa: 2 Bakorinthe 1:20 le 2 Timotheo 2:12.

Potso. 127 (THAPELO YA BOTSHELELAO "KGOGELO")

TLHALOSO

A. Lemoga: Modimo ka bo Ona, ga o gogele motho mo thaelong, mme o ka letlella gore rona re raelesege. Seno se kaya gore rona mo thaeleseong nngwe le nngwe re ka latlhega, ra raelesega, ra repetlana, raa' swa, fa Modimo ka boona O sa re sireletse, ka ntlha ya gore:

1. Rona ka borona re koafetse, re bokowa thata-thata moo re ka se kgoneng le ka motlha ope go ka itshireletsa/go ka itwanela,
2. Tiabolo, e leng mmaba wa rona wa loso, lefatshe le nama ya rona, di sa emiseng go re tlhasela.

Akanya fela gere ke ka mabaka a feng a mabedi ao Jutase a ekileng Krete ka ona. (Buisa Luka 22:31-34).

Gape, akanya gore ke ka lebaka le fe gore Petoro a se ka a latlhegela ruri, a sa kgaogana le Krete ka gotlhegotlhe jaaka Jutase (Buisa Luka 22:32).

Buisa: Johane 15:5; Ps. 103:14; 1 Pit. 5:8; Baefeso 6:12; Baroma 7:23; Bag. 5:17; Math. 26:41; 1 Bathes. 3:13; 5:23.

B. Potso. 128 (TSHWETSO YA THAPELO)

"Gonnebogosi ke ja gago . . ."

TLHALOSO

Lemoga: Mokgwa o thapelo é e fellang ka ona, ga se thorisotlotliso mme ke kopo, boipuella, boikopelo,

Re kopa eng, re ipuella mo godimo ga eng?

1. Godimo ga thata yotlhe ya Modimo. Modimo O kgona go re naya tsotlhe fa re di kopa. O ntse jalo, ke Mothatayotlhe.
2. Godimo ga tshiamo/bogalaledi jwa Modimo, fa re o galaletsa, re rorisa Leina la Modimo, o utlwa dithapelo tsa rona. Rona ga re ka ke ra kgona go kopa Modimo ka maemo a rona

fela, gonne re silafetse e le ruri.

Potso. 129: AMEN

TLHALOSO

Lefoko lé, AMEN, ga se fela sesupo sa gore thapelo ya rona e fitlhile mo bokhutlong; NYAA . . . Lefoko lé, le kaya gore re na le tumelo; ke netefatso/pontsho ya gore re dumela gore Modimo o utlwa thapelo ya rona; mo botialong jotlhe, Modimo o utlwile thapelo ya me go feta ka fa nna motho ke ikutlwang ka teng fa ke ntse ke rapela.

Lefoko lé, ke la SEGERIKA, mme le kaya gore, AMMARURI / TOTATOTA . . . le bontsha NETEFATSO.

Buisa: 2 Bakor. 1:20 le 2 Tim. 2:12.